

DYUS YUWE SAN MATEO FI'JNI

Jesucristo ji'j nyafiiteywe'shtyi pta'shni
(Lc. 3.23-38)

1 ¹ Jesucristo ji'j nyafiiteywe'sh quimteva tyāatycu pta'shi' ayte'.
Jesucristo' Abrahan David ji'cj yu'. ² Abrahana' Isaac neycu yu',
naapcachja' Isaacja', Jacob neycu yu'. Atsa' Jacoba', Judáwe'sh neycu yu'.
³ Juda' Fares vite' Zara neycu yu', atsa' njí'ja' Tamarcu yaase yu'. Faresa'
Esrom neycu yu', naapcachja' Esroma', Aram neycu yu'. ⁴ Arama', Aminadab
neycu yu', naapcachja' Aminadaba' Naason neycu yu'. Atsa' Naasona',
Salmón neycu yu'. ⁵ Salmona' Booz neycu yu', naapcachja' njí'ja' Rahabcu
yaase yu'. Booz'a' Obed neycu yu', atsa' njí'ja' Rutcu yu'. Obed'a' Isái neycu
yu', ⁶ naapcachja' Isaía', jycaajsa David neycu yu'. Atsa' jycaajsa Davida',
Salomón neycu yu', atsa' Salomón njí'ja' Urias nyu yu'c nyafii tyāac yu'.
⁷ Salomona' Roboam neycu yu', naapcachja' Roboama', Abias neycu yu'.
Atsa' Abiasa', Asa neycu yu'. ⁸ Atsa' Asa', Josafat neycu yu', naapcachja'
Josafatja', Joram neycu yu'. Jorama', Uzias neycu yu'. ⁹ Uziasa' Jotam
neycu yu', naapcachja' Jotama', Acaz neycu yu'. Atsa' Acaza' Ezequías
neycu yu'. ¹⁰ Ezequiasa' Manasés neycu yu', atsa' Manasesa' Amón neycu
yu', naapcachja' Amona' Josías neycu yu'. ¹¹ Josiasa' Jeconiaswe'sh neycu
yu'. Tyāa ensuty Israelwe'sha' Babilonia quiwen jyūna u'jni yuu. ¹² Atsa'
Jeconiasa' Salatiel neycu yu', naapcachja' Salatiela', Zorobabel neycu yu'.
¹³ Zorobabela' Abiud neycu yu', atsa' Abiuda' Eliaquim neycu yu'. Eliaquima',
Azor neycu yu'. ¹⁴ Azora' Sadoc neycu yu', atsa' Sadocja', Aquim neycu yu',
naapcachja' Aquima' Eliud neycu yu'. ¹⁵ Eliuda' Eleazar neycu yu', atsa'
Eleazara' Matán neycu yu', naapcachja' Matana', Jacob neycu yu'. ¹⁶ Jacoba'
Jose neycu yu', naapcachja' Jose' Maria nmi'c yu', Cristo Jesus yaasesa njí'j.
¹⁷ Abrahan ji'ljty isate', catorce ney u'juetstec Davida' upyjna ūsu'. Atsa'
David ji'ljty isate', qui' vite catorce ney u'juetstety Israelwe'sha' Babilonia
quiwen jyūna u'jni yuu. Tyāajū qui' isani qui' vite catorce ney u'juetstec
Cristo' upyjna ūsu'.

Jesucristo upyni

(Lc. 2.1-7)

¹⁸Jesucristo upyni' na'wēc yuu: Jesus nji'j Maria' José yacj imi'ya' puuty we'wenic ji'pju'. Nava ij fi'nzemey, nasa ji'pjuc Dyus Espiritu caavya'ja'jni. ¹⁹Tyajy nmi' Josea' tyāawe'sh leytyi cytey nwēese'jna fi'nzesac yu'. Nava Maria nasa ji'pjuni yu's cjuēswe'shtyi pāatyji'cjmée, paatste tyuteeya'vac yu' nasa jiyunimeete. ²⁰Sa' tyā'wē yajcyna ūsiyna, csha'wte Dyus angel vyaarra na'jīc:

—José, David ji'j, iindy nyu yuuwa'jsa Maria's jypa'gaya' wa'lnu, na'wē nasa ji'pja' nava tyā' Dyus Espiritu caavya'ja'jni'. ²¹Maria nchi'c āaga vyaate', tyā'sa' Jesus yasene'nga. Tyā'wē cysusni yuuna, tyāa pa'gatey tyajy nasa pcaltewe'shtyi nwe'wewa'jsa' jīnac we'we.

²²Tyā'wē yuuc, nava tyāniitey Dyus yuwe pta'shsa's Dyusí caaūusutje'tje' na'wēc we'we tyāa cytey yuucajnrráac tyā'wē yuu. ²³Tyā' na'wēc we'we:

Teech cna'sa' teech nchi'c ji'pjuna.

Tyā' Emanuel cysusni yuuna jīc.

Tyāa Emanuel jīnisa': Dyusa' cue'sh yacj ūsa' jīni'.

²⁴Tyajū' Josea' deenijū yajcyrra', Dyus angel we'weni's nwēese'jrra Maria tyajy nyu yuuwa'jsa's nvijtme'. ²⁵Nava ptam na'wē ij yu' fi'nzemeeta', María nchi'c āaga yuupcach. Sa' Maria nchi'c āaga yuute', tyā'sa' Jesus yasec qui'p.

Sec cāanijuwe'sh Jesusa's wechaya' pa'jni

2 ¹Jesusa' Belen chjambtec upy, Judea quiwete. Tyān ensu tyāa quiwesu jycaajsa' Herodescu yu'. Naapcachja' Jerusalen chjambte manz pitstjē'j pa'lty sec cāani quiwejuwe'sh estrellaty jiisa. ²Sa' na'jīnaty pējy:

—¿Mtee ūsna judiuwe'shtyi jycaajwa'jsa āchj u'se upysa? Cue'sha' tyajy upyni's pta'shsa estrella's uytja'w sec cāani quiweju, tyāasatja'w wechaya' yuwé'.

³Tyā'jīte', Herodesa' wala cuj yajcycu, tyā'wēy Jerusalen chjambte nasava jyucaysa. ⁴Tyajū' jycaajsa' sacerdote npiitstjē'jwe'sh vite' ley caapiya'jsawe'sh jyucaysaty pa'yarra' paapējycu:

—Cristo' ¿mteega upywa'jsa yu'? jīte', pta'shtyi:

⁵—Judea quiwete Belen chjambtec upywa'jsa yu'. Tyajīic Dyus yuwe pta'shsa' na'jīna fi'j:

⁶Judá quiwete Belen chjamb tyā'wē maa chjambteva jytjaacue ājmeeecuesame'.

Tyāa pa'gatey Belen chjambuj teech npiitstjē'jsa casejrra Andy nasa Israelwe'shtyi jype'jwa'jsa' jī'c.

⁷Tyā'jīte', Herodesa' estrella's uysaaty paatste pa'yarra pējycu:

—¿Macue tyach yuutsna estrella vyaani? jīna wala ew paapējyrrac

⁸Belenna caaj na'jīna neewe'werra:

—Cyte me'jwe, sa' wala ew paapēyine'cue tyāa luuch ma'wēsateva. Sa' ew jiyurra', andya's pta'sshine'cue, atsa' andyva wechaya' u'ljue'nja jīte',



(San Mateo 2.1)

⁹estrella's uysaawe'sha' u'jty. Naapcachja' sec cãani quiweju estrella uyne'ta tyãa estrella' tyãawe'sh yatste vyaana u'jrra mteene' luuch ũsu' tyãa cajcuete pa'jrrac cytee yuju. ¹⁰Tyã'wẽ estrella qui' vyaate', wala wechaty, ¹¹sa' yatte u'carra luucha's uytyi nji'l yacj. Sa' peejyũcuerra' luucha's wechaty. Tyã'wẽ yũurraty tyãawe'sh peeswa'l jyũrra u'jni's pjaanderra pees: vyuu bej, incienso vite' mirra. ¹²Tyã'wẽ yũuniijũ' cus csha'wte pta'shnity yuu Herodes tashna qui' shawendcajmén. Atsa' vite dyi'jsuty shawendna u'lj.

Egipto quiwen ũpjna u'jni

¹³Estrella's uysaawe'sh u'jniũ', José csha'wte', Dyus angel vyaarra na'jic: —Quiiterra me'l ũpjna Egipto quiwen luuchcuẽ's pe'jrra pety nji'l yã'ljrra. Sa' cytee ũsune'nga andy qui' pta'shpcach. Tyã'wẽme', Herodesa' luuchcuẽ's icjya' pacueya'va' jite', ¹⁴Jose' cusrrãa pe'jna Egipto quiwen u'cj. ¹⁵Sa' cyteety ũsu' Herodes uupcach. Dyus yuwe pta'shsa we'werra': Egiptoju pa'yatj Andy Nchi'ca's jic tyãa cytey yuucajnrrãac tyã'wẽ yũu.

¹⁶Estrella's uysaawe'sh tyã'wẽ Herodesa's weechsa na'wẽ vite dyi'jsu u'jni's jiyurra', seena' wala ũusachac. Sa' luuchtyi quii'cj Belen chjambtewe'sh vite' peecu'jsuwe'sh yã'ljrra jyuca, luuch e'nz añu ji'pjsate cãjpcach. Estrella's uysaawe'sha' macue tyach yã'lj yuutsteva pta'shne'ta tyã'sna jiyurrac tyã'wẽ e'nz añu ji'pjsate cãjpcach quii'cj'jna ũsu' Herodesa'. ¹⁷Dyus yuwe pta'shsa Jeremias na'jina fi'jni cytey yuuc:

¹⁸Teech ajte Ramá yaasesate ptjũusec

Seena' pembeena ñus we'weni.

Tyā' Raquelcu tyā'wē ũ'ne' tyajy luuch pa'gate,

Sa' quishi'tsme!, tyā'wēty icjni yuu naa pa'ga jī'c.

¹⁹Egipto quiwete ũsrra José csha'wte!, Dyus angel vyaarra na'jīc Herodes uunijū':

²⁰—Āchja' luucha's icj wēesava uuyā'jty, atsa' pe'jrra shawendna me'j Israel quiwení jīte!, ²¹Jose' shawendna u'cj Israel quiwen luuch pety njī'j yā'jrra. ²²Nava Herodes pa'gate nchi'c Arquelao Judeate jycaajna ũste jiyurra', ũucjcu cytee pa'jya' yu'. Sa' csha'wte! pta'shnic yuu, tyāasac Galilea quiwen u'j. ²³Cytee pa'jrra', tee chjamb Nasaret yaasesatec u'p-ya' u'j. Nyafiitey Dyus yuwe pta'shsawe'sh we'werra', Jesusa' Nasareno ya'cysusuna jī'ty tyā'jīni cytey yuucajnrráac tyā'wē yūu.

Juan Bautista nasa u'pnimée quiwesu Dyus yuwe's pta'shni

(Mr. 1.1-8; Lc. 3.1-9, 15-17; Jn. 1.19-28)

3 ¹Tyāa ensu' Juan Bautista' Dyus yuwe's pta'shna pa'cj Judea quiwesu nasa u'pnimeesu. ²Sa' na'jī'c:

—Pcaltiyi nvijtrra Dyus tashte mishawendwe. Tyā'wēme!, Dyus jycaajwa'j ena' ājyā'cj jī'c.

³Naa Juana'scu we'wena fi'j Dyus yuwe pta'shsa Isaiasa' na'jīna:

Nasa u'pnimée quiwesu sus we'weni ptjūusec:

Dyus pa'jwa'ja's mpjeu'jwe,

Dyi'ja's cu'le pjaandena jī'c.

⁴Juana' camello cjas atyj atjrra cja'tycu jytundu!. Sa' tyajy ũ'nisa yu!, cja'sh wala chji'ndy miltyi yu!. ⁵Cytee wēse'jya' pa'jty Jerusalenuwe'sh vite! Judea quiwesuwe'sh jyuca vite! Jordan yu'wala utyasuwe'shva. ⁶Sa' tyā'wē pcalsatja'w jīna Dyusa's perdon pējyna pa'jsaty! Juana' Jordan yu'walate bautisaī'c.

⁷Nava fariseowe'sh vite! saduceowe'sh tyā'wē tjengya' yujte uyrra', Juana' na'jī'c:

—I'cue'sha' ul weesweesa jil'ji'cue tyāa pa'ga castigo seena'sa yuja!, atsa' tyajū iyuwa'ja's ¿quimga pta'sh? ⁸Tyā'wē castigo seena'saju iyuwa'ja's jiyuyā'jrra!, ewrráa yūuna mfi'nzewe, cyaj maava ew fi'nzeni's uysa!: Naawe'sha' pcaltiyi nvijtrra Dyus luuch yuj yuuta sūjutyna. ⁹Tyā'jīte!, i'cue'sha' na'wē iwejch yaacynuwe: Cue'sha' Abraham jil'tja'w na' pcalsameetja'w sūjna yaacywa'j jil'pjmée i'cue. Na'jī'tj na!: Naa cuet yujtyva Abraham jil'j vit-ya' ājana Dyusa!. ¹⁰Tyā'wē ew fi'nzemeete!, ama' ij yā'j ũsa' fytūutashtyi spē'tjya!. Maa fytūutashva ew yūnsameetyi' spē'tjrra ipyte cambwa'jrráa yuuna. ¹¹Andya' i'cue'shtyi' yu'terráatj bautisaī' pcaltiyi nvijtrra Dyus tashte shawendsaty!. Nava andy e'suj vite yuja' tyā' Dyus Espiritu ipy na'wēsate bautisaīna. Tyā' andyte jytjaacue ājawa'jsa!, atsa' andya' tyajy pelgatyriráa yujtyva ũsya' seelpimeesatj. ¹²Tyā' scuutyj cweejya'jni plaatu's cuse at yā'jrra ũsa' na' scuutyja's tamaju tyundena sūupil'jna. Tyā'wē yūurra scuutyja's jyaawuuna. Nava tama yu'sa' cambuna ipy bagachte yujva ũchjawa'jmeesate jī'c.

Jesus ya'bautisāyini
(*Mr. 1.9-11; Lc. 3.21-22*)

¹³Naapcachja' Jesusa' Galilea quiweju yujrra Jordan yu'wala pucate Juan ūsnite pa'cj, Juan yu'te bautisāycajn. ¹⁴Nava Juana' Jesusa's bautisāy wēemeerra na'ljīc:

—Wejy yuuva indy andya's bautisāywa'lsang, sa' ¿ma'wēnga andya's pi'qui' indya's bautisāycajn? jīte', ¹⁵Jesusa' na'wēc pas:

—Dyus jytjāasni's cytey yuuní wejy ewna jīte', Juana' cytey nwēese'cj. ¹⁶Atsa' Jesusa' yu'te ya'bautisāyrra casejetspcachja', cielu' pjaatec, atsa' Jesusa' uycu Dyus Espiritu tumb chijme na'wēsa tyajy cajcuete quijatste. ¹⁷Atsa' we'weniva ptjūusec cieluju na'ljīna:

—Naaí Andy Nchi'c wala wendynisa'. Tyāa pa'ga wala wechana ūstju jīc.

Echtjēlj' Jesusa's īshii wēeni
(*Mr. 1.12-13; Lc. 4.1-13*)

4 ¹Tyajū' Dyus Espiritu' Jesusa's pe'jna u'cj nasa u'pnimée quiwesu, cyteea' echtjēlj' īshii wēeni fi'nzeya'. ²Sa' cuarenta en cuarenta cus quijva ūmée u'prra', Jesusa' wēc. ³Atsa' echtjēlja' Jesus tashte utyaarra na'ljīnac we'we ewmée vit wēerra:

—Dyus Nchi'c dyijrra', naa cuettyi pan myuucanj jīte', Jesusa' na'wēc pas:

⁴—Dyus librute na'ljīc: Nasa' pan yacjrráa yu' ityi fi'nzemeetyna, naasáa jyuca Dyus we'weni yacj yuurráa ityi fi'nzetyna jīc.

⁵Tyajū' echtjēlja' Jesusa's pe'jna u'cj Jerusalen chjambna, sa' cyteea' dyuus yatte ēete caateca'jrra, ⁶na'wēc jycaaj:

—Dyus Nchi'c dyijrra', ay ēejū mūpj. Tyāa pa'gategy Dyus librute na'wēc we'we':

Dyusa' tyajy angeleswe'shtyi jycaajana indya's nwe'wecajn.

Atsa' tyāawe'sha' cusete jypa'gatyna,

lindy chinda cуетte cpā'yuucajmen jīna fi'ljni' jīte',

⁷Jesusa' na'wēc pas:

—Vite ajte Dyus librute' na'wēc we'we':

Indyna jype'jsa Dyusa's jycaajwalj' jipjmeeng jīna fi'ljni' jīc.

⁸Tyajū' echtjēlja' qui' pe'jna u'cj vits walate, sa' tyāajū maa quiwesu chjambtyiva seena' zhichuesa's caavya'jac. ⁹Sa' na'ljīc:

—Andya's peejyūcuerra neewe'wene'nga atsa' andya' na'sa' jyuca indya's ūsu'nja jīte', ¹⁰Jesus pasrra':

—Echtjēlj', andy tashu mtyuté, tyāa pa'gategy Dyus librute na'ljīc:

Indyna jype'jsa Dyusrrá's neewe'wewa'ja', sa' tyāarrá's selpiwa'ja' jīna fi'ljni' jīte',

¹¹echtjēlja' Jesus tashu tyuteec, atsa' Dyus angeleswe'sha' pu'chya' paljty.

Galilea quiwesu Jesus mjiiya' tacjni

(Mr. 1.14-15; Lc. 4.14-15)

¹²Juan Bautista' cyuupjni ūsa' jini's Jesusa' jiyurra', Galilea quiwen u'cj. ¹³Nava Nasaret chjambte yu' yujumée, Capernaum chjambtec u'p-ya' u'j. Tyāa chjamba' Zabulón vite' Neftalí quiwe tyāa ja'ndasuc ūsu' icj pucaga. ¹⁴Tyā'wē yūuc nava Dyus yuwe pta'shsa Isaias fi'jni cytey yuucajnráac tyā'wē yūu. Tyā' na'ljīnac fi'j:

¹⁵ Zabulón Neftalí tyāawe'sh quiwesu u'psa,
Vite' icj pucasu dyi'j u'jna ūsa' tyāa ja'ndasu u'psa,
Vite' Jordan yu'cuteju, sec cāani ju'nguwe'sh,
Vite' Galilea quiwesu judiu ji'jmeesawe'sh

¹⁶ Tyāa nasa' chji'ndyte ūssa na'wē ūsrava,
Eena'sa's uytyi.

Sa' uuní na'wērráa yā'j ūsteva,
Eena'sa' cweetjcu ji'c.

¹⁷Tyājū' Jesusa' Dyus yuwe's pta'shya' tacjcu:

—I'cue'sha' pcaltyi nvijtrra Dyus tashte mishawendwe. Tyā'wēme',
Dyus jycaajwa'j ena' ājyā'cj ji'c.

Wendy uwesáa pajnzsaty Jesus pa'yani

(Mr. 1.16-20; Lc. 5.1-11)

¹⁸Jesusa' Galilea icj pucasu u'juetsrra', e'nz pyacjtyi uycu, Andres vite nyacja's Simon Pedro ji'ty tyāawe'shtyi. Tyāawe'sha' wendy uwesaaty yu', tyāasaty wendy ucje's icjte acjna ūsu'. ¹⁹Atsa' Jesusa' na'ljic:

—Andy yacj myujwe, atsa' Dyus jii nasaa pcjajwa'jsa vitu'nja i'cue'shtyi'. ²⁰Tyā'jitspcachja', wendy ucjety nvijtrra tyāa yacj u'ljty.

²¹Atsa' Jesusa' tyāajū wejcuē u'jnarráa, vite e'nz pyacjtyi uycu, Zebedeo nchi'cwe'sh Jacobo vite' Juan tyāawe'shtyi. Tyāawe'sha' barcote ney yacjtyi u'p yu', wendy ucje's pā'cjna. Atsa' Jesusa' pa'yac.

²²Naapcachja' barco vite' tyāawe'sh neyna nvijtna'va Jesus yacj u'ljty.

Nasa seena' wala cujsaty Jesus caapiya'jni

(Lc. 6.17-19)

²³Jesusa' Galilea quiwe jyucac pecūj, judiwe'sh pcjaacjeni yat-su Dyus jycaajwa'j yuwe ewsa's pta'shna, tyā'wēy nasa quij weete ātsa'satyva jyuca nuycatyjic. ²⁴Tyājū' Siria quiwesuwe'sh jyuca jiyuty Jesus tyā'wē yūuni's. Tyāa pa'gaty fiyfiy ātsa'satyva jyuca jyūna pa'j, aca ji'pjsa vite' ech iiyamunisa vite' wēechpa'jsa vite' ēseyā' ājasameetyva jyuca. Tyā'wēsātycu Jesusa' nuycatyji. ²⁵Tyājū' Jesus yacj pi'cyna u'ljuya' nasa wala utyaaty, Galileajuwe'sh vite' Decapolis quiwesuwe'sh vite' Jerusalenuwe'sh vite' Judea quiwesuwe'sh vite' Jordan yu'cutejuwe'sh.

Tjä'j vitste Jesus caapiya'jni

5 ¹Nasa wala kuj casejte uyrra', Jesusa' tyajy tyjityjnisawe'shtyi tjä'tjec pe'jna u'j. Atsa' tyäawe'sha' tyajy tashte utyaate', ²na'wëc caapiya'jya' tacj:

Quim wechana fi'nzewa'jsatyqui

(Lc. 6.20-23)

³Wala yuj wecha yuja' Dyusa's peejyrra pacuesáa yacja', tyäa pa'gatey tyä'wë yüusa' Dyus jycaajna üsnite u'caya' äjawa'jsata' naa pa'ga.

⁴Wala yuj wecha yuja' ewmeete fi'nzeni's jiyurra ü'nena Dyusa's yaacysa yacja', tyäa pa'gatey tyä'wë yüusa' Dyus cviisha'jni yuuwa'jsata' naa pa'ga.



(San Mateo5.2)

⁵Wala yuj wecha yuja' wa'lmée Dyus tashte utyasáa yacja', tyāa pa'gately tyā'wē yūsáa' naa quiwe jyuca tyāawe'sh jīrrarráa yuuna pa'jwa'jsa' naa pa'ga.

⁶Wala yuj wecha yuja' Dyus dyi'pte ew fi'nzewa'ja's yuurráa ūusuj jyuca yajcyrra pacuesáa yacja', tyāa pa'gately tyā'wē yūsaa'tyi' Dyusa' pu'chjina.

⁷Wala yuj wecha yuja' vitety peeygājna fi'nzesa yacja', tyāa pa'gately tyā'wē yūsaa' Dyus peeygāanity fi'nze' naa pa'ga.

⁸Wala yuj wecha yuja' ūuste quīj pcala's yujva ca'ga'jmée fi'nzesa yacja', tyāa pa'gately tyā'wē yūsaa' Dyusa's uyya' ājawa'jsata' naa pa'ga.

⁹Wala yuj wecha yuja' puimée fi'nzewa'ja's pacuesáa yacja', tyāa pa'gately tyā'wē yūsaa' Dyus luuchta' naa pa'ga.

¹⁰Wala yuj wecha yuja' Dyus yacj fi'nzepa'ga yajtsena fi'nzesa yacja', tyāa pa'gately tyā'wē yūuni fi'nzerrava Dyus jycaajna ūsnite u'cawa'jsata' naa pa'ga.

¹¹I'cue'sha' wala yuj wechana mfi'nzewe, andyna nwēese'pja'garráa nasa' wēeshuna pcyuuna quījquījva ewmée nuywe'wetsteva. ¹²Tyāa pa'gately cielute' wala yuj jypa'gawa'j ji'pji'cue naa pa'ga. Dyus yuwe pta'shsa tyāniiteywe'shtyi tyā'wēty pcyuu na' āchjva tyā'wēyrráa yuutyna, nava ūusmée wechana mfi'nzewe.

Naa quiwete nenga na'wē pēetjerna eena' cweetjwa'jsa

(Mr. 9.50; Lc. 14.34-35)

¹³I'cue'sha' nenga na'wē naa quiwete pēetjewa'jsa i'cue. Nava nenga' shūucājrra', ¿ma'wē pēetjyecy? Quīj yūuwa'j yujva selpimeena, naasáa pujmbrra nasaa wacji'cji'jwa'jrráa yuuna.

¹⁴I'cue'sha' naa quiwete eena' cweetjsa i'cue. Teech chjamb tjā'j vitsga ūssa' ¿nasa uynimée ūsma'c? ¹⁵Lampara's apjrra tyajya' tyā'wē ya'pqui'ta'tsme', wejyva āatec ya'tyaja', yatte jyuca cweetjcajn. ¹⁶Tyā'wēy i'cue'shva eena' mcweetjwe nasaa dyi'pte, cyaj i'cue'sh ew fi'nzeni's uyrra', Dyus ewsa ūsyuju'ga jīna we'wetyna i'cue'sh Tata cielute ūssa's.

Moises leya's Jesus āate caapiya'jni

¹⁷Moises ley vite' Dyus yuwe pta'shsawe'sh caapiya'jni tyāaty nwēese'jya'méene' yuwé' sūjna yaacynuwe andya's. Tyā'wē yūuya' yuwe'tsmeetj, wejyva tyāa leya's jytjaacue ew āate caajiyu'jya'tj yuwé'. ¹⁸Isatj pta'shi', cielu pety quiwe yā'jrra scjēwpcach tyāa leytyi' le'chcuerráa yujva e'scjē nvijtmée jyuca nwēese'jwa'tja'. ¹⁹Tyāa pa'ga maava tyāa ley jycaajnyity wala le'chcuēesa quijteva selpiwal'jmeesa na'wē tjengte tyāaty' nvijtrra, nasatyva tyā'wē yūuya' ūírráa caapiya'jana na', tyā'wē yūsaa' Dyus jycaajna ūsnite le'chcuerráa seelpisa' jīni yuuna. Nava tyāa leytyi' le'chcuerráa yujva nvijtmée jyuca nwēese'jrra vitetyva tyā'wēy nwēese'jya' caapiya'jsa', Dyus jycaajna ūsnite wala seelpisa' jīni yuuna. ²⁰Na'j'i'tj na': i'cue'sha' caapiya'jsawe'sh vite' fariseowe'sh fi'nzenite jytjaacue ew fi'nzemeerra', bagachte yujva Dyus jycaajna ūsnite u'caya' ājameene'cue.

Üuschawa'jme'
(Lc. 12.57-59)

²¹I'cue'sh yatsgawe'shtyi na'jîna caapiya'jni's iiwêse'jne'cue: Nasa icjwa'jme'. Tyã'wême', nasa icjsatyi's maatyva castigãywa'j yuuna jî'ty. ²²Nava andya' na'wê'tj jycaaja': Nasa yu's icjmeerrava, peecy yacjtjê'ja's üuscha yaacypa'garráa tyãava yuuwesa castigãywa'j yuuna. Meerrava peecy yacjtjê'ja's váa atsewe'wena atsa' tyã'sa' cjuêswe'sh tashte jyûna u'jni yuuna. Sa' peecy yacjtjê'ja's wêeshute', tyã'sa' castigo infiernote acjwa'j yuuna. ²³Tyã'wê Dyusna peeswa'j ofrenda's jyûna pa'jrra altalte acjme'y yaaquivá'nga iindy yacjtjê'j indya's atseni's, ²⁴sa' tyã ofrenda's altal pucate nviitna'va u'juene'nga iindy yacjtjê'ja's perdon pëjyja'. Tyã'wê yûurra tyãa ofrenda's altalte acjene'nga.

²⁵Maava indya's atsesa päätyjî'cjrra cjuês tashna jyûna u'juetste', cjuês tashte pa'jme'y dyi'cja mpuutywe'we cjuês tashte jyûna u'cjamen. Tyã'wême' cjuêsa' policiawe'shtyi ducjte', tyãawe'sha' carcelte tyajatyna. ²⁶Andya' isatj we'we', tyajüyã'ja' casejya' äjameene'nga vvyu nme'y jî'pjuni's ducjmeerra yu'.

Ptamsa vite yacj pcal yuuwa'jme'

²⁷I'cue'sha' iiwêse'jne'cue na'jîna nyafiitey caapiya'jni's: Ptamsayã'ja' vite yacj pcal yuuwa'jme' jîni's. ²⁸Nava andya' na'wê'tj jycaaja': Vite yacj yu' pcal yuumeerrava, teech u'ya's ewmêe yajcyrra tjengni yacjrráa, pcal yã'cj yu' tyajy üuste.

²⁹Yafya' indya's pcalte cweete'pjchãj yuutste', cutyil'jrra mwãataj. Wejyva teech yafyrrá's iviiturra', cacue jyuca yu' infiernote acjni yuunimêe wejy ewa'. ³⁰Meerra' patsu cuse tyã'wê pcalte cweete'pjchãj yuutste', spê'tjrra mwãataj. Wejyva teech cuserrá's iviiturra', cacue jyuca yu' infiernote acjni yuunimêe wejy ewa'.

Ptamusa' tyuteewa'jme'

(Mt. 19.9; Mr. 10.11-12; Lc. 16.18)

³¹Tyã'wêy nyafiitey na'jîna pta'shni'sva iiwêse'jne'cue: Maava nyu yacj tyuteetsrra', tyãa tyuteni's etste fil'jrra nviitwa'ja' jînaty caapiya'ja'. ³²Nava andya' na'wê'tj jycaaja': Nyua' vite yacj pcal yûuterráa nmi'a' tyuteeya' äjana. Tyã'wême', pcal yûusameete peecyrráa nmi'a' tyuteerra', vite yacj pcalte weteewa'ja's dyil'j pjaandesa yuuna. Tyãa pa'ga maa pitstjê'jva tyãa u'y nviitnisa yacj ptamuurra', tyãava pcaltec wetesá yuuna pa'ja'.

Jurãywa'jme'

³³I'cue'sh yatsgawe'shtyi na'wê caapiya'jni'sva iiwêse'jne'cue: Dyus yase's cysusrra jurãyni's iishiimêe cytey yuuwa'ja' jî'ty. ³⁴Nava andya' na'wê'tj jycaaja': Cytey yuune'jmeerra', ma'wêsarráa yujtyva cysusna jurãywa'jme'. Cielu's cysusna jurãynuwe, tyã' Dyus jycaajna üsni' naa pa'ga. ³⁵Sa' quiwe'sva cysusna jurãynuwe, tyãa quiwe' dyuus chinda tyaa'jwa'j vitnisa' naa pa'ga. Sa'

Jerusalennava cysusna jurãynuwe, tyãa chjamba' jycaajsa chjamba' naa pa'ga. ³⁶Sa' peecy dyictje's cysusnava jurãynuwe, tyãa pa'gatey indya' quijte yujva seelpimeesang Dyus dyi'pte naa pa'ga. Tyãasa teeche dycjasrrãa yujnava chijme vit-ya' ajawa'jsameeng, sa' cjũhva vit-ya' ajameene'nga. ³⁷Jurãywa'j peejyme', isasa's teeche jwendrrãa mwe'wewe, jũrra' jii iitj jãna, jiimeerra' jiimeetj jãna. Tyã'wẽme', ishiina we'wenisa' echtjẽj cwe'we'jni'.

Iindeewewa'jme'

(Lc. 6.29-30)

³⁸I'cue'sha' iiwẽse'jne'cue na'jina nyafiitey caapiya'jni's: Indy yafya's cpã'vitte', ca'tuva tyã'wẽy myũu. Sa' iindy quijta's chcajndete', ca'tuva tyã'wẽy myũu j'i'ty. ³⁹Nava andya' na'wõtj jycaaja': Indyna ewmẽe yũusa's ca'tuja' iindeewenu. Tyã'wẽ yũumẽe, iindy dyi'pga pejtyate', ca'tu ju'nguwe'shnava petyacajn mes. ⁴⁰Meerrava indya's pãatyji'cjrra iindy cmiisa's cusa'jatste', jycaatsni atynava mes jyũna u'cjan. ⁴¹Teeche ta'ngute pa'j tu'srra nvijt-ya' u'jwa'ja's jycaatje', e'nz ta'ngute pa'j nvijt-ya' me'j. ⁴²Maava quijrrãava indya's tjãaste', mes. Sa' pqui'tje', wa'lwa'jme' j'i'pjrra'.

Atsesaty peeygãawa'ja'

(Lc. 6.27-28, 32-36)

⁴³Nyafiitey na'jina caapiya'jni'sva iiwẽse'jne'cue: Nasaty'i' mpeeygãj, nava atsesa yuuty'i' peeygãanu j'i'ty. ⁴⁴Nava andya' na'wõtj jycaaja': I'cue'shtyi atsesaty'i' mpeeygãjwe, sa' cysewna ewmẽe we'wesaty'i' ca'tu' ewrrãa mwe'wewe. Atsesaty'i' ew yũuna mfi'nzewe. Wẽeshuna pcyuusaty'i' tyãawe'sh pa'gate Dyusa's mneewe'wewe nwe'wecajn. ⁴⁵Tyã'wẽ yũurrarrãa i'cue'sh Tata cielute ùssa luuchrra tyã'wẽ yuune'cue. Tyã' maa nasatyva seca's caacweetje'je'c, ewsa ma'c yuu meerra' ewmeesa ma'c yuu nava jyucaysaty. Sa' tyã'wẽy nusnava caja'c, ew yũusa ma'c yuu meerra' ewmẽe yũusa ma'c yuu nava jyucaysaty. ⁴⁶Tyã'wẽ i'cue'shtyi peeygãasarrãaty ca'tuva peeygãjrra', ew yũusatja'w ¿jãya' ajama'cue? Macue nasa ewmeesa gobierno jii vyu pcjacjawswe'shva tyã'wẽ yũuwa'jrrãa yu'sa' aja'ty atsa'. ⁴⁷I'cue'sh yacjtjẽ'jwe'shrrãaty wechate', ¿quij ew yũuni yaasena? Tyã'wẽ yũuwa'j yu'sa' Dyusna jiimeesava cyteytyi yũ'. ⁴⁸I'cue'sh Tata cielute ùssa' maa yacjva jyuca ewsa' naa pa'ga i'cue'shva tyã'wẽy mfi'nzewe.

Jypa'yacy ew yũuwa'ja'

6 ¹I'cue'sh ew yũuni's nasa uyrra ew we'we jytjãasrra mjĩini's wala mpa'yajcywe. Tyã'wẽ ew we'we jytjãasrrarrãa ew yũuna fi'nzete', iindy Tata cielute ùssa' quij yujva dewemeena. ²Tyãa pa'ga peejysaty quijrrãava peesu'tsrra', nasa uycajn sũjrra nasa cshavyte tyã'wẽ yũunu. Áaterrãa ew we'wesawe'shrrãaty tyã'wẽ yũ' judiuwe'sh pcjaacjeni yat-su vite' clliicjunsu, nasa' uyrra' ew yuj yũ'c jina tuutje'j jytjãasrraty tyãawe'sha' tyã'wẽ yũ'. Nava andya' isatj we'we': Tyã'wẽ yũurra', nasaa pwe'sh tuutje'jnirráaty fi'nze'.

³Nava peejsaty quĩjrráava peesu'tsrra!, quim yujva jiyunimeete paatste tyã'wẽ myũu. ⁴Atsa! paatste tyã'wẽ yũutste iindy Tata uyrra!, indya's deweena.

Dyus yacj na'wẽ puuty we'wewa'ja'

(Lc. 11.2-4)

⁵I'cue'sha! Dyus yacj puuty we'wetsrra!, áaterráa ew we'wesawe'sh na'wẽ yũunuwe. Tyãawe'sha! judiwe'sh pejaacjeni yat-su vite! clliecjunsu yujurraty Dyus yacj puuty we'wena pecũju! nasa uycajn sũjrra. Isatj we'we!, tyã'wẽ yũurra! nasaa tuutje'jnirráaty fi'nze!. ⁶Nava indya! Dyus yacj puuty we'wetsrra!, yat dyiite u'carra vitya's apjrra quim yujva unymeete mpuutywe'we. Atsa! tyã'wẽ paatste puuty we'wete!, iindy Tata cielute ũssa! deweena.

⁷Dyus yacj puuty we'wetsrra!, llisasáa na'wẽ tyã'snaífirráa cuj us peenana ũswa'jme!. Dyusa's jiimeesarráaty tyã'wẽ yũ!, wala we'wete!, Dyusa! wẽse'jena sũjrra. ⁸Tyãawe'sh na'wẽy yũunuwe. Tyã'wẽ yũumeeteva, i'cue'sh Tata! jiiyã'ja! i'cue'sh peejini's pẽjyumeyna. ⁹Tyãa pa'ga i'cue'sha! na'wẽrráa Dyus yacj puuty we'wena na'jine'cue:

Cue'sh Tata cielute ũssa

Indya! bagachteva jytujtje nes yuune'nga.

¹⁰Iindy jycaajwa'j ena'srráatja'w ũytjasu!,

Naa quiwete indy ma'wẽne'nga jytjáasu! tyã'snarráa cytey tee yuu cielute na'wẽy.

¹¹Cue'sh ũ'wa'j een isa peejini's meen pees.

¹²Cue'sh ewmée yũuni's meen peltunaĩ, cue'shva ma'wẽtca'w peltunãy cue'shtyi ewmée yũusaty tyã'wẽy.

¹³Ewmeete wetecajmén, meen nwe'we.

Tyãa pa'gatey indy yuurráa quĩjteva jyuca ájawa'jsang, sa! bagachteva indy yuurráa jycaajna nes yuuwa'jsang.

¹⁴Tyã'wẽ i'cue'shva ewmée yũusaty peltunãyte!, i'cue'sh Tata cielute ũssava peltunaĩna i'cue'shtyi. ¹⁵Nava ewmée yũusaty peltunaĩmeete!, i'cue'sh Tatava peltunaĩmeena i'cue'shtyi.

Dyus yacj puuty we'weya' yũunani's caapiya'jni

¹⁶I'cue'sha! yũunatsrra!, maa nasava uycajn sũjrra áate caavya'jal'jwa'jme!. Áaterráa ewtja'w jĩsarráaty tyã'wẽ yũ! nasa jiyucajn. Isatj we'we!: Tyã'wẽ yũurra! nasaa tuutje'jnirráaty fi'nze!. ¹⁷Nava indy tyã'wẽ yũunatsrra!, dyl'pna pchjĩ'chrra dycjasnava ew mquind, ¹⁸cyaj indy yũunani's áate caavya'jal'jmeete!, nasa jiyumeetya, naasáa iindy Tata yuurráa jiyurra indya's deweena.

Cielute ji'pjuwa'jrrá's mpa'pchuwe

(Lc. 12.33-34)

¹⁹Naa quiwete quĩjquĩjwa ji'pjuwa'ja's pa'pchunuwe. Tyã'wẽme!, wes ũ'we'ty, atsa! inzva suwu'ty. Naapcachja! peswé! pa'jrra ji'pjuni's cutyi'ji'ty.

²⁰Wejyva cielute ji'pjuwa'jrrá's wala mpa'pchuwe. Cyteea' wesva ù'meena, atsa' inzva suwmeena, pesweeva cutyi'ljmeena. ²¹Tyāa pa'gatey mtee jyaawni ji'pjrra', cyte yuurráac wejy jytjaacue yajcyna ya'fi'nze'.

Yafya' cacue's ewte caafi'nze'jsata'

(Lc. 11.34-36)

²²Yafya' cacue's ewte caafi'nze'jsata'. Tyā'wē iindy yafya' ewsarrá's tjengsate', iindy cacue' ewte shiingmée fi'nzena. ²³Nava iindy yafya' ewmeesarrá's tjengsate', iindy cacue' jyuca ewmeete chji'ndyterrāa fi'nzena. Tyā'wē eena'te ew caafi'nze'jwa'jsa yuu ewmeete chji'ndytewe'sha'srrāa tjengsate', bagachte yujva eena'te fi'nzewa'ja's ya'ji'pjumeena.

Dyusna yajcyna vite' naa quiwete ji'pjuni'sva yajcyna fi'nzeni

(Lc. 16.13)

²⁴Quim yujva e'nz patrontyi selpiiya' ājameena. Tyā'wē viterrá's wendyna fi'nzerra', vite patron yu'sa' atsena. Sa' teeche jycaajnráa' cytey yuurra', vite patron jycaajni yu'sa' cytey yuuya' ājameena. Tyā'wēy naa quiwete ji'pjuni's pa'pchuna Dyusnava selpiina yuuya' ya'āja'tsme'.

Cue'sh peejini's Dyusa' jyuca pu'chjina

(Lc. 12.22-31)

²⁵Na'wētj yu'cypeje': I'cue'sha' quīj yujva cuj yajcymée mfi'nzewe, ¿quīj ù'wecytja'w? sa' ¿quīj atjecytja'w? sūjna. Tyāa pa'gatey ù'nisate jytjaacue peejysa ityi fi'nzeni's ji'pjyā'ji'cue, sa' atjnisate jytjaacue peejysa cacue'sva ji'pjyā'ji'cue naa pa'ga. ²⁶Mtjengwe ēesu fyuusa vichacuety. Tyāawe'sha' uja'tsmeeta', sa' ù' pcjacje'tsvameeta', sa' tee jwendte jyaawu'tsvameeta'. Tyā'wēteva i'cue'sh Tata cielute ūssa' tyāa vichacuetyi' peejymeec sāl'jī'. I'cue'sha' tyāa vichacuate jytjaacue pa'gasa i'cue, atsa' wejy tyā'wē sāl'jīna. ²⁷Tyā'wē wala pa'pchurra' ¿i'cue'sh maarrá' peena medio metro tjaacue walaaya' āja'cue'?

²⁸¿Quījya'rráacue tyacue pa'pchu' i'cue'sh atjwal'j roparrá's? Mtjengwe quite tashtyi. Tyāawe'sha' mjī'tsmeeta', sa' cjasva pundu'tsmeeta', nava ma'wēta zhichcue walá'. ²⁹Na'l'jī'tj na': Jycaajsa Salomon yujva tyāa quite tash na'wē yu' zhichcue iijyūme' macue wala ji'pjsarrava. ³⁰Tyā'wē quite tasha' āchjī yu' zhichcue ūsrrava, cuscusa' ipyte cambwal'jrráac yu', nava tyā'wēsa'sva Dyusa' wala zhichcue pjeul'ju'c na' i'cue'shtyi' wejy tjaacue ew pjeul'juna. Tyāa sūjya' āja'tsmeene'cue. ³¹Tyāa pa'ga i'cue'sha' quīj yujva cuj yajcymée mfi'nzewe, ¿quīj ù'wecytja'w? sa' ¿quīj atjecytja'w? sūjna. ³²Dyusna jiimeesarráaty tyā'wē cuj yajcyna fi'nze'. Nava i'cue'sha' cielute Tata ji'pji'cue tyā' jyuca jiia' i'cue'sh peejini's. ³³Tyāa pa'ga i'cue'sha' Dyus yacj fi'nzewa'ja's cjuē'y wejy tjaacue mpa'pchuwe, tyajūyā'ja' quījva tjēymée vyaana. ³⁴Āchja' jiyui'cue na' cuscuscjēwe'sha's ūytjasna pa'pchunuwe. Tyā'wēme', cuscuscjē' pa'pchuwal'j tjaacue tjēysa paljana een isa fiyfiysa.

Jiimeerra' nuywe'wewa'jme'*(Lc. 6.37-38, 41-42)*

7 ¹Ma'wēsateva jiimeerra', ewmeesata' jīna nuywe'wewa'jme', Dyus dyl'pte i'cue'shva ewmeesa yuuya'mée. ²Tyā'wēme', vitesaty nuywe'wete', Dyusa' i'cue'shtyiva ewmeesata' jīra castigaīna nuywe'wepa'ga. I'cue'sh ma'wē juuna' yūute', Dyusva tyā'wēyrrāa juuna' castigaīna. ³Lindy yacjtjē'j yafyte cytā' le'chcuēesa cjeerra ūste ꝓma'wē uyuqui'ng iindy yafyte yu' fytū pe'la yuu walasa cjeerra ūste tyā's cjuē'y cutyi'jmeerra'? ⁴Sa' ꝓma'wē iindy yacjtjē'ja's cytā' le'chcuēesa iindy yafyte ji'pjngu tyā'sa' cutyi'jitj jīna we'wequi'ng, tyā'wē iindy yafyte yu' fytū pe'la walasa's ji'pjrra'? ⁵Āacjerrāa ew we'wena u'jusa, iindy yafyte fytū pe'la walasa's cjuē'y mcutyij'. Tyā'wē yūurra iindy yacjtjē'j yafyte cytā' le'chcuēsa's ew uyrra cutyi'jya' ājane'nga.

⁶Dyus yuwe's alcuty ūswa'jme', sa' cuchityva ūswa'jme'. Tyā'wēme', jyuca wa'cji'cji'jrra ūsachayā'jrra', ūssa i'cue'shtyī fīrrāa wa'cyya' cūjutyna.

Dyusa's pēnyi vityte tu'cacana*(Lc. 11.9-13; 6.31)*

⁷Dyusa's mpējywe, atsa' ūsuna, sa' pacuerra', uyuune'cue. Vityte mtu'cacawe, atsa' pjaandena. ⁸Tyā'wē maava pēysa' jypa'gana, atsa' pacuesá' uyuuna. Vityte tu'cacate', pjaandeni yuuna.

⁹I'cue'sh pwe'sh maarra' i'cue'sh luuch pan tjāaste', ꝓcueta's ūsma'cue? ¹⁰Meerra' wendy tjāaste', ꝓula's ūsma'cue? ¹¹I'cue'sha' Dyus dyl'pte ewmeesarrava, i'cue'sh luuchtyi' ewsarrāa i'cue peesu', atsa' i'cue'sh Tata cielute ūssa' wejy tjaacue ewsa's peesuna tjāassatyi'.

¹²Bagachteva i'cue'shtyī maa nasava ewrrāa yūuna fi'nze jytjāasrra', i'cue'shva tyā'wēy maa nasatyva ewrrāa yūuna mfi'nzewe. Tyāa pa'gatey Moises ley vite' Dyus yuwe pta'shsawe'sh fi'jniva tyā'wērrarrāaty jycaaja'.

Vity pteenza*(Lc. 13.24)*

¹³Vity pteenzte me'cawe. Tyā'wēme', vituwa'tje u'cawa'j vitya' wala tape', atsa' dyl'jva tyā'wēy tape'. Cyteea' wala cujsa u'cana ūsta'.

¹⁴Naapcachja' vitumée Dyus tashte pa'jwa'j vitya' pteenza', atsa' dyl'jva tyā'wēy pteenza'. Cytee yu' cujmeerrāa u'cana ūsta'.

Nasa ma'wē yuutsteva mpa'yajcywe jiyuya'*(Lc. 6.43-44)*

¹⁵Dyus jycaajnisatja'w jīna īshiisatyī' mpa'yajcywe. Tyāawe'sha' i'cue'sh tashte yu' piishāa cacue yacjtyi vya', nava ūuste yu' yu'cj ech weeswée na'wēsata'.

¹⁶I'cue'sha' tyāawe'sh fi'nzeni's jiyune'cue. Miiyajcywe: Uva's tsjütsj tashte ya'unde'tsme', sa' breva's cjas tashte ya'unde'tsme'. ¹⁷Tyā'wē fytūu tash ewsa'

ewsarráac yĩnu!, atsa! fytũu tash ewmeesa' ewmeesaíírráac yĩnu!. ¹⁸Fytũu tash ewsa' ù' ewmeesa's yũnya' ãjameena. Tyã'wëy fytũu tash ewmeesa' ù' ewsa's yũnya' ãjameena. ¹⁹Maa fytũu tashva ewmée yũnsa's sp'etjrra ipyte ya'cambu'c. ²⁰Tyãa pa'ga tyãawe'sh fi'nzeni's uyrra jiyune'cue ma'wësatava.

Jyucaysa yu' cielute u'cameetyna
(Lc. 13.25-27)

²¹Yuwejurráa andya's ew we'wesa jyuca yu' cielute Dyus jycaajna ùsnite u'cawa'jsameeta', naasáa andy Tata jytjãasni's cytey yuusarráa cielute u'cawa'jsata'. ²²Tyãasa cielute u'cawa'j en äjte', wala yuj maava andya's na'jityna: Cue'shtyi jype'jsa mwëese'j: Cue'sha' iindy yuwe's pta'shtja'w, sa' iindy yase's cysusrra echtjê'jtyva cutyi'tja'w, sa' quim yujva äjanimeesa'sva caavya'ja'tja'w manz usva jityna. ²³Nava andya' na'jina pasu'nja: Bagachte yujva andy jype'jnisa yu'tsmeei'cue, naa pa'ga i'cue'shtyi' jimeetj. Ewmée yũuna fi'nzesa' andy tashtewe'sh mee'cue.

Dyusa's nwëese'jsa vite' Dyusa's nwëese'jsamée
(Lc. 6.47-49; Mr. 1.22)

²⁴Maava andy jycaajni's wëse'jrra cytey yuusa', yat tyajya' jiisa na'wësa yuuna: Tyãa yata's cuette caachinda'jrra tyajte', ²⁵nus pa'jna, wejya wala quiitena, yu' walaana yuurrava, yata's suwme', cuette caachinda'jrra tyajnipa'ga. ²⁶Nava maava andy jycaajni's wëse'jrrava cytey yuusame', yat tyajya' jimeesa na'wësa yuuna: Tyãa yata's cuetmuseterráa tyajte', ²⁷nus pa'jna, wejya wala quiitena, yu' walaana yuute', tyãa yata' weterra jyuca suweec jic.

²⁸Tyajü' Jesus we'wena jyã'tje', nasa' wala kuj yajcyna neeyüuty tyajy caapiya'jni's wëse'jrra, ²⁹tyã'wë leya's caapiya'jsawe'sh na'wëmée, nwëese'jwa'ja's üucjnus we'wena caapiya'pja'ga.

Teech pitstjê'j wã'jy weete ätsa'sa's Jesus nuycatyjini
(Mr. 1.40-45; Lc. 5.12-16)

8 ¹Jesusa' tjã'j vitsu quijte', nasa iiméj wala kuj pcjaacjety. ²Atsa' teech pitstjê'j wã'jy wee seena' canzhsate ätsa'sa Jesus tashte utyaarra peejuücüerra na'jĩnac pytjaa we'we:

—Andya's peeygãjrra' nuycatyjine'nga naa weeju jite', ³Jesusa' na'jĩnac cuseju jya'ndy:

—Ajtsemée peeygãanisang, naa pa'ga catyjirra mneeyüu jitspcachja', tyãa wã'jy weeju catyjirrac neeyüu. ⁴Atsa' Jesusa' na'wëc jycaaj:

—Maa yujtyva pta'shmeene'nga, naasáa sacerdoté yuurráana iindy cacue's tywesya' me'j. Sa' Moises ma'wëga jycaaja' tyã'srráa cytey yuune'nga, cyaj nasa jyucaysa jiyutyna indy ew catyjirra neeyüuteva jic.

Soldau cpiitan jype'jnisa's Jesus nuycatyjini
(Lc. 7.1-10)

5 Tyajū' Jesusa' Capernaum chjambte pa'tje', soldau cpiitan romanowe'sh utyaarra' pytjaa we'wec na'jīna:

6—Andy yatte jype'jnisa uuya' yā'j ūsa' ēseya' ājameerra jīte', Jesus pasrra':

7—Andya' u'jrra nuycatyji'nja jīc. 8 Atsa' cpiitana' na'wēc pas:

—Andya' iindy dyi'pte quījte yujva seelpimeesatj. Tyāasatj andy yatte iindy pa'jni's tjaame', naasáa chjāchjana jīna mwe'we atsrráa andy jype'jnisa' catyjina. 9 Andyva ma'wētca walasa jycaajnytyi' nwēese'je', sa' andyna nwēese'jsa soldauwe'sh iijype'tj tyāawe'shtyi teecha's me'j jīte', andy jycaajni's cytey yu'c. Sa' vite's pa'yate', tyāava cytey nwēese'je'c. Sa' andyna selpisa's quīj jycaatjeva cytey yu'c jīc.

10 Tyā'wē we'weni's Jesusa' wēse'jrra', wala kuj yajcycu, sa' na'jīnac we'we tyāa yacj yuusatyi':

—Isatj we'we', Israelwe'sh jyucaysa mteewe'sh yujva tyā'wē andy we'weterráa catyjina sújsa yu' iuymeetj naa pitstjē'j na'wēsa yu'. 11 Na'jī'tj na', judiu jī'jmeerrava wala yuj pa'jatyna sec cāanijūwe'sh vite' sec cjeenijuwe'sh majūwe'shva jyuca, sa' Abrahan, Isaac, Jacob tyāawe'sh yacj ū'ya' cachjiityna cielute Dyus jycaajna ūsnite. 12 Naapcachja' cytee ūswa'jsata' jīnisa yu', cutyi'jrra chji'ndy walate acjni yuutyna. Cyteea' seena' yuj pembeena qui'tjtyi csusu'jutyna ūucjna jīc. 13 Sa' Jesusa' qui' we'wec cpiitana's:

—Yatna me'j, atsa' indy ma'wēne'nga jytjāasu' tyā' cytey yuuna jītspcachja', tyāa cpiitan jype'jnisa' catyjinic yuu.

Pedro nyu njī'ja's Jesus nuycatyjini
(Mr. 1.29-31; Lc. 4.38-39)

14 Tyajū' Jesusa' Pedro yatnac u'j, sa' cyteea' Pedro nyu njī'ja' cacuesecte uuya' ūstec uy. 15 Atsa' cusete jya'ndycu, naapcachja' cacueseca' ūchjac. Tyajū' tyāa u'ya' quiiterra selpiiya' casejc. 16 Sa' tyāa en jyuca chji'ndyitste', Jesus tashte wala jyūna pa'jty ech iiyamunisaty. Atsa' tee dyi'j we'weni yacjrráa tyāa echtyi' ūusuj cutyi'c, sa' ātsa'sa jyucaysaty nuycatyjic. 17 Nyafii Dyus yuwe pta'shsa Isaiasa' na'jīnac we'we:

Tyāa'ic cue'sh chjāchjamée fi'nzeni vite' cue'sh ātsa'na fi'nzeni's jyuca tyujnde jī'c tyā'jīni cytey yuucajnrráac tyā'wē yūu.

Jesus yacj fi'nze wēesa
(Lc. 9.57-62)

18 Tyā'wē nasa wala pejaacjete', Jesusa' icj cuten u'jue'nja'w jīnac we'we. 19 Tyā'jīte', ley caapiya'jsa teecha Jesus tashte utyaarra', na'jīc:

—Indy yacj yuu wēetj indy mtee u'juetsteva jīte', 20 Jesus pasrra':

—Yu'cj niimal yujva deewa'j cafy ji'pjta, tyā'wēy vichacueva yat ji'pjta! Nava Dyus Nchi'c Nasa Yuusa' mtee yujva tyajy dyictjerráa yuja'sva cjcjwa'j ji'pjme!.

²¹Naapcachja' Jesusna nwēese'jsa teehsa' na'ljīnac we'we:

—Andya's mcaaj andy tata cjuē'yina pendaawa'j ji'pjtya jīte!, ²²Jesus pasrra':

—Uusaawe'sha' peecy uusáa pwe'sh ya'pendaatyna. Atsa' indya' andy yacj tyutemée myuj jīc.

Marte wejya wala's Jesus cyuuju'jni

(Mr. 4.35-41; Lc. 8.22-25)

²³Tyajū! Jesusa' barcote cjēec atsa' tyāa yacj u'jusawe'sha' pi'cyna u'jty.

²⁴Tyā'wē icjite u'juetspachja', wejyaa wala sējc, atsa' yu'tūchjasa' barco's apjya'vac yu!. Nava Jesusa' deenic yu!. ²⁵Atsa' tyāa yacj u'jusawe'sha' fitytyi na'ljīna:

—Cue'shtyi jype'jsa, meen nwe'we. Tyā'wēme!, icj dyyicjē cjējetstja'w jīte!, ²⁶na'wēc pas:

—¿Quijya'cue tyacue wala ūucju'? ¿I'cue'sha' Dyusna yajcyya' yu' ew jiimeevá'cue? jirra', quiiterra wejya vite' icj tyāaty we'wec, atsa' jyuca yujuc.

²⁷Tyā'wē yūute!, barcote u'jsawe'sha' wala cuj yajcyrra na'ljīnaty we'we:

—Naa pitstjē'ja' ¿quimna atsqui'ty wejya icj tyā'wēsa yujva nwēese'je'? jī'ty.

Gadara quiwetewe'sh ech iiyamunisa

(Mr. 5.1-20; Lc. 8.26-39)

²⁸Tyajū! Jesusa' icj cuteju Gadara quiwete pesatje!, e'nz pitstjē'j uusáa pendani cafyju casejrra Jesus tashte utyaaty. Tyāa e'nzsa' ech iiyamunisaty yu!, tyāasaty iiméj seena' weeswée yu!, tyāa pa'ga tyāa dyl'jsu quim yujva scjēwya' aja'tsmeeta!. ²⁹Tyāa ech iiyamunisa' na'ljīnaty sus we'we:

—Dyus Nchi'c Jesus, cue'sh űuste űswa'j en ajmeyna, ¿ñuste acjya' yuwe'vá'nga? jī'ty.

³⁰Cysū tjā'jsu cuchi wala űsu'ty apjna. ³¹Atsa' tyāa echa' Jesusa's pytjaa we'wety:

—Cue'shtyi neeutsrra!, tyāa cuchi űussu cjēeya' u'cjan mcaaj.

³²Tyā'jīte!, Jesusa' cytey yuucacj. Atsa' tyāa echa' nasa űusuj casejrra tyāa cuchi űustety cjēe. Tyā'wē yūute!, tyāa cuchi' peñacjē pelurra icjcjē cjēerra jyuca uuty. ³³Atsa' cysū cuchi tjengsa' űucjrra wuwuurráa chjambna u'jrra pta'shtyi quīj yūuni'sva jyuca. Sa' tyāa e'nz pitstjē'j ech iiyamunisawe'shtyi quīj yūuteva jyucaty pta'sh. ³⁴Tyajū! chjambte nasa jyuca tjengya' u'jty Jesus űsnite. Sa' uyrra' Jesusa's tyāawe'sh quiweju casejna u'cjaajty.

Ēseya' ājasame's Jesus nuycatyjini

(Mr. 2.1-12; Lc. 5.17-26)

9 ¹Tyajū! Jesusa' barcote cjēerra shawendrra tyajy chjambtey qui' pa'cj.

²Atsa' cyteea' teeh pitstjē'j ēseya' ājasame'styi yacjna pa'j. Tyā'wē yacjna pa'jsawe'sha' Jesusa' nuycatyjyujuna sūjni's jiyurra, ātsa'sa's na'wēc we'we Jesusa':

—Chjächja myajcy. Iindy pcala' peltunāyni yā'jty neeyū jīte!, ³ley caapiya'jsawe'sh maafi yu' na'wēty yajcy: Naa pitstjē'ja' Dyusa's iiweech we'wena ājawa'jmee'a'scu we'we' sūju'ty. ⁴Nava tyāawe'sh yaacyni's Jesus jiyurra', na'jīnac we'we:

—¿Quīj yuutecue tyā'wē ewmēe yaaqui'? ⁵¿Maa tjēymesacy? Iindy pcala' peltunāyni yā'jty neeyū ¿jīniá'? Meerra': Quiiterra me'j ¿jīniá'? ⁶Macue tjēysateva Dyus Nchi'c Nasa Yuusa' naa quiwete pcaltiyi peltunāyya' ājawa'jsa' naa pa'ga caajiyu'j ya'vatj āchja'.

Tyajū' ēseyā' ājasame's na'wēc we'we:

—Quiiterra, iindy deeni's tu'srra yatna me'j jīte!, ⁷tyā ēseyā' ājasamee'a' quiitena'va u'cj tyajy yatna. ⁸Tyā'wē yūuni's nasa uyrra', ūucjtyi. Sa' Dyusna wechana tuutje'jty tyā'wē chjächjawa'ja's Dyusa' peesne' sūjrra.

Mateo's Jesus pa'yani
(Mr. 2.13-17; Lc. 5.27-32)

⁹Jesusa' tyajū u'jrra', teeche pitstjē'j Mateo yaasesa tyā'wē gobierno jīi vyu pcjacjna u'pte uyrra', na'wēc we'we:

—Andy yacj myuj jīna.

Atsa' Mateo' quiiterra Jesus yacj u'cj.

¹⁰Tyajū' Jesusa' ū'ya' yatte u'cac, atsa' gobierno jīi vyu pcjacjsawe'sh vite' pcalsawe'shva wala cuj u'caty vite' Jesus yacj u'jusawe'sh yā'jrra. ¹¹Atsa' tyā'wē yūuni's fariseowe'sh uyrra' pējytyi Jesus yacj u'jusawe'shtyī na'jīna:

—¿Ma'wērraga i'cue'shtyī caapiya'jsa' gobierno jīi vyu pcjacjsawe'sh vite' pcalsawe'sh yacj ū'wé'? ¹²jīni's Jesus wēse'jrra', na'wēc we'we:

—Yu'tse'jsa's jypeejymeeta' aca ji'pjmēe wēt ūssa', naasāa ātsa'sa yuurraa' yu'tse'jsa's jypeejyta'. ¹³Mpiyawe Dyus libroute na'wē fi'jni ūsa' tyā'sna: Tajcy icjrra Dyusa's wechana cambni yu'sa' jypeejymeetj. Andya' vitety peeygāanirrá'stju jytjāasu' jī'c. Andya' nasa ewsaty pacueya' quījmeetj, naasāa pcalsaty pacueya'rráatj quīj, cyaj ewmēe yūuna fi'nzeni's nvijtrra Dyus tashte shawenduutyna.

Yūunani's Jesusa's pēyni
(Mr. 2.18-22; Lc. 5.33-39)

¹⁴Tyajū' Juan Bautista yacj u'jusawe'sha' Jesus tashte utyaarra na'wēty pējy: —¿Quīj yuupa'gatca'w cue'sh vite' fariseowe'sh tyacue wala yūuna',

naapcachja' indy yacj u'jusawe'sh yu' yūuna'tsmeeta'? jīte!, ¹⁵Jesusa' na'wēc pas: —Miiyajcywe: ¿bodate pi'cynisa' ū'mēe nūsna ūswa'jsatymañ novio' tyāawe'sh yacj nee ūsiite'? Naasāa novio's tyāawe'sh tashuj tyujndete yuurraa' yūunaatyna.

¹⁶Ropa iīshsate tela u'sesa yacj ya'pā'cje'tsme!. Tyā'wēme!, tela u'sesa' jwee'írraac sunde' iīshsa's, atsa' sutenisa' jwee'írraa' wala suteena. ¹⁷Tyā'wēy beca u'se aajnisa's slun iīshsate ya'awu'tsme!. Tyā'wēme!, beca u'sesa slun



(San Mateo 9.9)

iïhsa's sunde'c, atsa' beca yacj slun yacj e'nzîi vitu'ty. Tyāa pa'ga beca u'sesa's slun u'sesate awwa'ja'. Tyā'wē yu', maa yujva vitumeetyna.

Jairo niisa vite' Jesus atyjte jya'ndysa
(Mr. 5.21-43; Lc. 8.40-56)

¹⁸ Jesus tyā'wē we'wena üspcachja', judiu pcjaacjenite npiitstjē'jsa' Jesus tashte peejuücüerra na'wēc we'we:

—Andy niisa' uuyā'cj. Nava indy yujrra cuseju jya'ndyvatsa', ityi yuuna jite',
¹⁹ Jesusa' quiitena'va tyāa yacj u'cj, tyāa yacj u'jusawe'sh yā'jrra. ²⁰ Tyā'wē u'juetspachja', teech u'y doce añu cacue yu'te ätsa'na u'jusa Jesus e'ste paatste cūjrra, atyj vitste cpaajya'ndycu. ²¹ Atyj vitsterráava jya'ndyvatsa', catyji'nja sūjrrac tyā'wē yūu. ²² Nava Jesusa' jiyurra tyāa u'ya's tjengrra na'wēc we'we:

—Ūucjnuwe, wejyva catyjini i'cue neeyũu, tyã'wẽ catyji'nja sũjrrane'cue tyã'wẽ yũu naa pa'ga jĩte', tyãa dundtey catyjirrac neeyũu.

²³Tyajũ' Jesusa' tyãa npiitstjê'jsa yatte pa'jrra uycu pendaatste ñusna tucawa'jsa músicu jyuca pjeu'jrra ũste. Atsa' nasa' ñusna wala ũ'nena ũste', ²⁴na'wẽc jycaaj:

—Ayjyu mcaasejwe. Luucha' uunime', deenirráa ũsa' jĩte', nasa' npeevyshijcaty. ²⁵Nava Jesusa' nasaty casejcaajrra dyyiite u'cana'va, tyãa luucha's pu'quisutspcachja', quiitec. ²⁶Atsa' tyã'wẽ yũuni's tyãa quiwesu jyuca tuutje'jnic yuu.

E'nz pitstjê'j uyya' ājasameety Jesus nuycatyjini

²⁷Tyajũ' Jesus casejna u'juetste', uyya' ājasamée e'nztyi sus we'wena yuwẽ':

—David Nchi'c, cue'shtyi mpeeygāj jīna.

²⁸Tyajũ' Jesusa' yatte u'cate', tyãa uyya' ājasameewe'sha' utyaana cūjty. Atsa' Jesusa' na'wẽc pējy:

—¿Uywa'ja's ũsuna sũju'cue' i'cue'sha'? jĩte', tyãawe'sh pasrra':

—Tyãa sũju'fitja'w jĩty. ²⁹Atsa' Jesusa' tyãawe'sh yafyite jya'ndycu na'jīna:

—I'cue'sh jytjāasni' cytey yuuna jĩtspcachja', ³⁰tyãawe'sh yafya' ewuuty. Atsa' Jesusa' wala neewe'wec na'jīna:

—Quim yujtyva pta'shmeene'cue jĩteva, ³¹tyajũ casejna' tyãa quiwesu jyuca pta'shtyi Jesus tyã'wẽ yũuni's.

We'weya' ājasame's Jesus nuycatyjini

³²Tyãawe'sh casejna u'juetspcachja', Jesus tashte vite pitstjê'j nuypa'jty, we'weya' ājasamée ech iiyamunisa's. ³³Atsa' Jesusa' tyãa echa's ũusuj cutyi'tje', tyãa pitstjê'ja' we'weya' ājac. Tyã'wẽ yũute', nasa' wala kuj yajcytyi na'jīna:

—Israel quiwete bagachte yujva na'wēsa yu' iuymeetja'w jĩ'ty. ³⁴Nava fariseowe'sh yu' na'wēty we'we:

—Naa pitstjê'ja' echttyi nasa ũusuj cutyi'ji'c, nava echtjê'j pu'chterraac tyã'wẽ yũ' jĩ'ty.

Mjīisa yu' kujmeeta'

³⁵Jesusa' chjamb wasu chjamb le'chcuesu judiuwe'sh pcjaacjeni yat iisa caapiya'jnac pecũju'. Sa' Dyus jycaajwa'ja'sva pta'shna vite' wee ma'wēsate nasa ātsa'satyva nuycatyjina quīj acatyva jyuca caycase'je'c.

³⁶Sa' Jesusa' tyãa nasaty tjengrra', tyãawe'shtyi peeygāj tyã'wẽ ñusna chjāchjameecuē piishāa namu ji'pjmeesa na'wẽ ũspa'ga. ³⁷Sa' tyãa yacj u'ljusawe'shtyi na'wẽc we'we:

—Isatj we'we', mjīia' seena' wala', nava mjīisa yu' kuj meeta'. ³⁸Tyãa pa'ga mjīi namu's mpējywe mjīiwa'jsa caacjan jīc.

Doce nasa Jesus tyjityjni*(Mr. 3.13-19; Lc. 6.12-16)*

10 ¹Tyajũ' Jesusa' tyāa yacj u'jusa docesaty pa'yarra na'wē yūuya' ājawa'ja'scu ūs: echtyi nasa ūsuj cutyil'jna quīj weete ātsa'satyva nuycatyjina, quīj aca ji'pjteva jyuca yu'tse'jya' ājawa'ja'scu ūs.

²Tyāa docesawe'sha' na'wēty yaase yu': Nyafytewe'sha' Simoncu yu', tyā'sa' Pedro jĩ'ty. Vite' tyajj nyacj Andres. Vite' Zebedeo nchi'ctyi yu', Jacobo Juan pyacjsa. ³Vite' Felipe, Bartolomé, Tomás, vite' Mateo gobierno jii vvy pcjacjsa. Vite' Alfeo nchi'c Jacobo, vite' Lebeo tyā'snaírráa Tadeo jĩ'ty. ⁴Vite' Simoncu yu', cananista nasa. Vite' Judas Iscariote, Jesusa's atsesawe'sh cusetē ducjwa'jsa.

Docesaty Dyus yuwe's pta'shya' caajni*(Mr. 6.7-13; Lc. 9.1-6)*

⁵Tyāa yacj u'jusa docesaty Jesusa' na'wēc neewe'werra caaj:

—Judiu jil'mée vite nasa quiwesu' u'jnuwe, sa' Samaria quiwesu' chjamb ūstyna cysūva u'jnuwe, ⁶wejyva Israel jil' piishacuē na'wē jypumbana ūsta' cysūrráa mel'jwe. ⁷Sa' pta'shine'cue Dyus jycaajwa'l' ena' ājyā'c jīna. ⁸Ātsa'satyva nuycatyjine'cue, uusaatyva qui' ĩtyi vitune'cue, wā'jy wee canzh jil'pjsatyva nuycatyjine'cue. Echtyiva nasaa ūsuj cutyil'jine'cue. I'cue'sh tyā'wē ājawa'ja's vyupa'gamée i'cue jypa'ga na', nuycatyjipa'ga vvy pējymeene'cue.

⁹Quīj vvy yujva jyūmée mel'jwe. ¹⁰Ya'ja, spaatu, cjāambu tyāarráa yujtyva jyūmée mel'jwe, naasáa teeche cmiisarráa jyūrra mel'jwe, tyāa pa'gatey mjīisa' puutsni fi'nzewa'jsa'.

¹¹I'cue'sha' chjamb wala meerra' chjamb le'chcuesu mtee pa'jrrava, cytee paandejene'cue nasa ewsa tashsu, vite ajte u'jwa'l' en ājpcach. ¹²Yatte pa'jrra, ewrráa we'wena wechana pa'jane'cue. ¹³Tyāa yatte nasa ew jypa'gate', Dyus yacj wechana fi'nzewa'ja's pta'shine'cue. Nava tyā'wē yūumeete', pta'shmeene'cue. ¹⁴Sa' i'cue'shtyi jypa'gamée, pta'shni'sva wēse'jya' wa'lte', yatte ma'c yuu meerra' chjambte ma'c yuu nava tyajũ casejetsrra', i'cue'sh chindate quiwe tujnda's sacueecuerra casejene'cue cyaj yuuwesa yuutyna. ¹⁵Isatj we'we', Dyus castigāywa'l' en ājte', tyā'wē yūusa nasa' seena' yuj ya'castigaĩtyna, Sodoma Gomorra chjambsu nasate jytjaacue.

I'cue'shtyi atsewa'j en pa'jana

¹⁶Mwēese'jwē, andya' i'cue'shtyi piishacuē na'wē cajatstju yu'cj ech cshavysu. Atsa' i'cue'sha' icjwe'shte ul na'wē jypa'yacy mfi'nzewe, nava iindeewewa'l' yu'sa' jil'pmée tumb chijme na'wē myuuwe. ¹⁷Mpa'yajcywe, tyā'wēme' nasa' i'cue'shtyi uwerra cjuēswe'sh tashte ducjetyna, sa' judiuwe'sh pcjaacjeni yat-suva pāpatyna. ¹⁸Cysūrráa cuutya'jmée nel'jue'sh tashsu vite' jycaajsa tashte yujva pe'jna ul'jni yuune'cue, andy yuwe's pta'shpa'ga. Tyā'wē yūuteva, cysūva tyāawe'sh dyil'pte

tuutje'jeírráa ne'cue andya's vite! judiu jil'jmeesa dyi'pteve. ¹⁹Tyã'wẽ cjuẽswe'sh tashsu cuutya'tje!, cuj yaacynuwe, ãchja' ¿ma'wẽ pasucytja'w? sũjna. Tyãa pa'gatey tyã'wẽ yũutspcachja!, Dyusa' i'cue'shtyi caaũusutje'jena ma'wẽ paswa'ja'sva. ²⁰I'cue'sh ũus yaacyniju we'wemeene'cue; Dyus Espiritu i'cue'shtyi cwe'we'jena.

²¹Peecy nwe'shírráa tyãawe'sh nyacjtyi ajtserra quicje'jetyna. Atsa' neywe'sha' peecy nchi'ctyi ajtserra quicje'jetyna, naapcachja' nchi'cwe'sha' neywe'shtyi ajtserra quicje'jetyna. ²²Andyna nwẽese'pja'ga naa quiwete nasa jyuca y i'cue'shtyi atsetyna. Tyã'wẽteva, ũucjmée chjãchja uu entepcach fi'nzesa' tyãawe'sh ũusa' Dyus nwe'weni yuutyna. ²³Tyã'wẽ ajtserra icjya' pacueetspcachja!, tyãa chjambuj casejra vite ajte me'jwe. Isatj we'we!, i'cue'sh tyã'wẽ Israelwe'sh chjambu jyuca pecũjmeyna, Dyus Nchi'c Nasa Yuusa' quíijana.

²⁴Piyasa' maa yujva caapiya'jsate jytjaacuemeeta!. Tyã'wẽ selpisa' patronte jytjaacuesame!. ²⁵Caapiya'jsa ma'wẽ pcyuuni yuute!, piyasaava tyã'wẽy ñuswa'ja's jypa'gawa'jsata!. Atsa' selpisaava patron ma'wẽ pcyuuni yuute!, tyãava tyã'wẽy ñuswa'ja's jypa'gawa'jsa!. Yat namu's Echtjẽ'j jina cysusrra!, tyajy jype'jnisa yuutyi! wejy tyã'jina we'wetyna.

Quimna wejy ũucjwa'jcy

(Lc. 12.2-9)

²⁶Tyã'wẽ yũuteva, nasatyi! ũucjnuwe. Andy we'weni! quíj yujva tyã'wẽ paatste yu' neeyũuwa'jsame!, sa' quíj yujva tyã'wẽ sũtjrra jiyunimée yu' neeyũumeena.

²⁷Andya' i'cue'shrráatytyu we'we!, nava tyãa we'weni's nasa ma'wẽsatyva jyuca ãate mwe'wewe. Sa' naa ja'ndate ayterrãa we'weni's msuuva jyuca mwe'wewe.

²⁸Cacuerrá's icjsa's ũucjwa'jme!. Tyãawe'sha' ũus yu'sa' icjya' ãjameetyna.

Wejyva cacue pety ũus yã'jrra infiernote caajya' ãjawa'jsa's wejy ũucjwa'ja!.

²⁹E'nz vichacuety teech centavote ¿tyweyu'tsyujmeetyna' vacy? Tyã'wẽ pa'gameecuesarrava, maa yujva quiwecjẽ wete'tsmeeta!, i'cue'sh Tata' tyã'wẽ jytjãasmeete yu!. ³⁰I'cue'sh dyictjete dycjas yujva jyuca isani ũsta!.

³¹Ūucjnuwe, i'cue'sha' tyãa vichacuate jytjaacue pa'gasai'cue.

³²Maava ũucjmée andy ju'ngu we'wesatyi!, andyva andy Tata cielute ũsa' tyajy tashte tyãawe'sh ju'ngu we'we'nja. ³³Nava maava nasaty ũucjrra andya's jiimeetj jina íshijana tyã'sa' andyva tyã'wẽyrrãa jiimeetj jina we'we'nja andy Tata cielute ũsa' tyajy tashte.

Jesusa' nasaty caapi'jsa na'wẽ yuuni

(Lc. 12.51-53; 14.26-27)

³⁴Naa quiwete yajtsemée fi'nzewa'ja's nvijt-ya' quíjmeetj, ñuste yajtsena fi'nzewa'ja's nvijt-ya'tj quíj. ³⁵Andyna nwẽese'pja'garrãa neya' nchi'ca's atsena, naapcachja' njĩ'ja' niisa's atsena, atsa' suegra' ncuẽmyu's atsena.

³⁶Tyã'wẽ andyna nwẽese'pja'ga peecy yattewe'shírrãa yaatseni fi'nzetyna.

³⁷Maava andy yu's yajcymée naasãa ney vite! njĩ'j tyãawe'shrráaty jytjaacue yaacysa!, andya's selpiia' ãjameetyna. Tyã'wẽy maava andy yu's yajcymée naasãa

nchi'c vite' niisa tyāawe'shrráaty jytjaacue yaacysa' andya's selpiiya' ajameetyna. ³⁸Macue tjēysa uuwa'jma'c pal'j nava tyāaty' yajcymée fi'nzesame' andy tashte selpiiya' ajameena. ³⁹Naa quiwete peecy ityi fi'nzewa'jrrá's ya'nwe'wesa', cielute fi'nzewa'j tjaacue ewsa yu'sa' iviituna. Naapcachja' andyna nwēese'pja'ga naa quiwete ityi fi'nzeni's yajcymée iviitusa' cielute ityi fi'nzewa'j yu'sa' iviitumeena.

Dyus peesni's jypa'gawa'jsa

(Mr. 9.41)

⁴⁰Maava i'cue'shtyi wa'lmée jypa'gasa', andynava jypa'gasarra tyā'wē yuuna. Sa' andyna jypa'garra', andyna jycaajsanava jypa'gasa yuuna. ⁴¹Dyus yuwe pta'shsa tyāawe'sha' Dyus jycaajnisata', atsa' maava tyāawe'shtyi wa'lmée ew jypa'gasa', Dyus peesni's jypa'gawa'jsata', Dyus yuwe pta'shsaty peesni's írráa. Sa' nasa ewsaty jypa'gasa' ewsarra tyā'wē yuuna, sa' nasa ewsaty dewenisa's írráa jypa'gana. ⁴²Isatj we'we': Andyna nwēese'jsa macue wala ajmeecuesateva tyā'sna yu'finzerráava yussa' dewenisa yuuna.

Juan Bautista yuwee caajnis

(Lc. 7.18-35)

11 ¹Jesusa' ma'wē yūuwa'ja'sva tyāa yacj u'jusa docesaty pta'shna jyā'jrra', tyajū casejna u'cj tyāa quiwesu chjamb le'chcuesu caapiya'jya'. ²Atsa' Jesus tyā'wē yūuni's Juan Bautista cyuupjni úsrra jiyurra', tyajy jype'jnisaty Jesus tashna caacj ³na'jīna pējyja':

—Cristo naa quiwete quiwa'jsa úsu'c indya' ¿tyāa dyijngá', meerra' vite úytjasuvá'nja'w? jīte', ⁴Jesusa' na'wēc pas:

—U'jrra Juana's pta'shine'cue andy na'wē yūuna fi'nze'tj tyā'sa' yafyju uyi'cue sa' caapiya'jni'sva wēse'ji'cue tyā'sna: ⁵uyya' ajasameeva uyu'ty, lengsava catyjirra lengmeety neeyū', wā'jy wee canzh ji'pjsava catyjinity neeyū', wēse'jya' ajasameeva wēse'jya' aja'ty, uuniisava qui' ityi yu'ty, sa' naa quiwete pytjaacuēesa yuutyi' Dyus tashte pa'jwa'ja's pta'shnic yuu jīne'cue. ⁶Atsa' andya's cuj yajcyna jypumbasamée yacj yu' wala yuj wecha yuja'.

⁷Tyajū' tyāa pēysa Jesus tashu u'tje', Jesusa' Juan ma'wēsateva pta'shcu cytee wēse'jsa nasaty' na'jīna:

—Nasa u'pnimée quiwete', i'cue'sha' ¿quíjnacue tjengya' u'j? ¿Cjīj tash wejyate ēse'sesa's vá'cue tjengya' u'j? ⁸Cyte' ¿quīj úsqui sūjrracue tjengya' u'j? Meerra' ¿teech pitstjē'j ropa zhichcuesa atjrra u'pna sūjrra vá'cue tjengya' u'j? I'cue'sha' peecy jii i'cue tyā'wē ropa zhichcuesa atjsa' jycaajsawe'sh yat-surráaty u'pu'. ⁹Cyte' ¿quimnacue uy? Dyus yuwe pta'shsa's vá'cue uy. Isa tyā'sna yuj uyne'cue, nava Dyus yuwe pta'shsa maateva jytjaacuesas i'cue uy. ¹⁰Tyā'sna we'werrac Dyus libroute na'jī':

Andya' yuwee pta'shsa cajasttju iindy yatste,
iindy pa'jwa'ja's pjeu'cjan jīna fi'jni'.

¹¹ Isatj we'we', naa quiwete maa nasa yujva Juan Bautistate jytjaacue walasa yu' casejnimeeta' ächpcach. Macue tyä'wēteva, ächj naa ensuwe'sh maateva jytjaacue le'chcuēesarrava Dyus jycaajnite u'casa' Juan Bautistate jytjaacue walasata'.

¹² Juan Bautista pa'ljnījūy Dyus jycaajni ena' atseni ūsa' ächpcach, tyāa pa'gaty caacnayujya'mée chjächja puina fi'nze'. ¹³ Nava Dyus jycaajwa'j ena's Moises ley vite' Dyus yuwe pta'shsa tyāawe'sha' tyagachjūity pta'sh Juan Bautista pa'pjcach. ¹⁴ I'cue'sha' jiyu wēerra', jypa'yacy mwēese'jwe: na'wē Dyus yuwe pta'shsawe'sh we'werra', Dyus jycaajwa'j en äjatspcachja', Elias pa'jana jī'ty tyāac yu' Juan Bautista'.

¹⁵ Na'wē pta'shya'vatj tyā'sna wēse'jwa'jsa ūsra', mwēese'jwe. ¹⁶ Naa ensu nasaty! ğma'wē caaja'nda'tje wejy ewqui? Nava tyāawe'sha' luuch le'chcuē na'wēsata': luuchrrāaty plaasasu pweesa'jya' cachrra', tyāawe'sh namicuty na'jina sus we'we': ¹⁷ Zhichcuetja'w cuví', nava cu'ju'tsmeei'cue. Sa' ñus ñustja'w memu', nava ū'ne'tsmeei'cue jīnaty we'we'. ¹⁸ Tyā'wēsarra i'cue Juan Bautista's na'wē we'we': Ech jī'pjrrac tyā'wē ū'we'tsmée, sa' vinova tundi'tsme' jina i'cue atsewe'we'. ¹⁹ Tyāa e'su Dyus Nchi'c Nasa Yuusáa pa'jrra tyā'wē ū'na tundyna yuute', na'wēi'cue atsewe'we': Wala pū'we', sa' tyā'wēycu wala tundi'. Pcalsawe'sh vite' gobierno jīi vyu pcjacjsawe'sh yacj namicu' jina i'cue atsewe'we'. I'cue'sha' jiimeerrai'cue tyā'jī'. Nava maava jiyuwa'jsa yuutyi' Dyusa' caajiyu'juna andy ma'wēsateva jīc.

Chjamb nwēese'jsamée yacj ūcjuūcjsa

(Lc. 10.13-15)

²⁰ Tyajū' Jesusa' juuna'c we'we' maa chjambsurrajne' wejy wala tyā'wē quim yujva äjanimeesa's caavya'ja'jna ūsu' cysūuwe'sh nasaty. Tyāa nasa' pcaltyi nvijtrra Dyus tashte shawendmeene'ta naa pa'ga na'jīc:

²¹—Corazín chjambte nasa vite' Betsaida chjambte nasa tyāawe'sh yacja' wala yuj seena' ūcjuūcja'. Tyā'wē Tiro chjambte nasa vite' Sidon chjambte nasa tyāawe'sh cshavysu tyā'wē quim yujva äjanimeesa's caavya'ja'jvatsa', tyāawe'sha' pcaltyi nvijtrra Dyus tashte shawendni yā'j yuutyna. ²² Nava na'jī'tj na': Dyus castigāywalj en äjte', Tiro chjambte nasa vite' Sidon chjambtewe'shte jytjaacue tyāawe'sha' ya'castigaītyna. ²³ Atsa' Capernaum chjambte nasa i'cue'sh yu' cielute u'cawa'jsa yujne'tca'w ğsūju'cue'? Tyā'wēmée wejy infiernoterráa ul'jwa'jsa i'cue. Tyā'wē Sodoma chjambte quim yujva äjanimeesa's caavya'ja'jvatsa', tyāa chjamba' ächpcach ūs yuuna. ²⁴ Tyāa pa'ga na'jī'tj na': Dyus castigāywalj en äjte', Sodoma quiwesu nasate jytjaacue i'cue'sha' ya'castigaïne'cue jīc.

Jesus tashte jycaaseya' pa'yani

(Lc. 10.21-22)

²⁵ Tyāa ensu' Jesusa' na'jīnac Dyus yacj puuty we'we':

—Tata, cielute vite' naa quiwete jycaajsa indya' tyacue wala quījteva jyuca jiisawe'sh yuutyi' caajiyu'jmeerrava, pytjaa äjmeecuesa yuutyi'

caajiyu'jng, tyāa pa'gatj tyacue wala wechá' indya's. ²⁶Indya' tyā'wēng yūu, iindy jytjāasni' tyā'wēne' yu' naa pa'ga.

²⁷Andy Tata' quijnava jyuca andyrrarráanac ducj. Nava Dyus Nchi'c ma'wēsateva quim yujva ew yu' jiimeeta', naasáa andy Tata yuurráa jiia'. Tyā'wēy quim yujva ew yu' jiimeeta' andy Tata's, naasáa Nchi'c yuurráa ew jiia' Ney'a's. Tyāasac maava jiyu wēesa yuutyi' Nchi'ca' caajiyu'ju' Ney quimteva. ²⁸Maava ūuste wētmeé wajtyna fi'nzesa' andy tashte myujwe jyucaysa, atsa' andya' wechana tjēymée fi'nzewa'ja's ūsu'nja. ²⁹Andy jycaajni's wal'mée jypa'garra, andy na'wēy fi'nzeya' mpiyawe, tyāa pa'gatey andya' juuna'meecue ūusuj jyuca peeygājnati' jycaaja'. Tyāa pa'ga wechana tjēymée fi'nzewa'ja's ji'pjune'cue. ³⁰Andy jycaajni' walame', sa' nwēese'jwa'jva tjēymeasata' jic.

Jycaase enteva scuutyjtyi chuctenderra ū'ni

(Mr. 2.23-28; Lc. 6.1-5)

12 ¹Tyāa ensu' Jesusa' scuutyj ejsuc scjēuuts yu' sapatu jycaase ente. Atsa' tyāa yacj u'jusawe'sha' wēerra scuutyjtyi chuctenderra ū'ty. ²Tyā'wē yūute', fariseowe'sh uyrra' na'wēty we'we Jesusa's:

—¿Uyu'ngá' indy yacj u'jusawe'sha' na'wē yuutsta' mjii enmée jycaase enteva? jite', ³Jesusa' na'wēc pta'sh:

—I'cue'sha' jilēeymeevá'cue? Teech ente' Davida' tyāa yacj u'jusawe'sh yacj wēerra' na'wēc yūu. ⁴Dyuus yatte u'carra', cytee pantyi ū'c tyāatyi' quim yujva ū'wal' ji'pjmeeta' naasáa sacerdote yuurráaty ū'wal'jsa yu'. ⁵I'cue'sha' Moises leyteva jilēeymeevá'cue? Cyte pta'shrra', dyuus yatte sacerdotewe'sha' jycaase'tsmeeta' macue jycaase enteva jī'c. Tyā'wē jycaase ente jycaasemeete', pcalna ¿sūju'tsmeecue'? ⁶I'cue'sha' mjiyuwe: Ayte' dyuus yatte jytjaacue jytujtjesa ūsa'. ⁷I'cue'sha' jiyu'tsmeevá'cue Dyus librute na'jī'c. Vitety peeygāanirrá'stju andya' jytjāasu', tajcy icjrra altalte cambni's peejymeetj jī'c. Tyā'jini's jiyuvatsa', cue'shtyi' ūusachana atsewe'wemeene'cue, tyā'wērráa yūunisa' pcalme' naa pa'ga. ⁸Tyāa pa'gatey sapatu jycaase enteva Dyus Nchi'c Nasa Yuusáa jycaajwa'j ji'pja' jic.

Teech pitstjē'j tyajy cuse undynisa

(Mr. 3.1-6; Lc. 6.6-11)

⁹Jesusa' tyajū u'jrra', judiuwe'sh pcjaacjeni yattec u'ca. ¹⁰Cyteea' teech pitstjē'j teech cuse undynisa quēese'jya' ājasameec u'p yu'. Atsa' Jesusa's ewmée vit wēerra na'wēty pējy:

—Jycaase enteva nuycatyjite ¿ewmañ? jite', ¹¹Jesusa' na'wēc pas:

—I'cue'sh teech piisháa ji'pjte' tyāa piishá' jycaase ente ewmeecjē cjēete', ¿u'jrra cutyi'jmeema'cue jycaase enteva? ¹²Nasa' piishaate jytjaacue pa'gasa', atsa' wejy tyā'wē ew yūuwa'ja' macue jycaase enteva.

¹³Tyā'wē pasrra tyāa pitstjē'ja's na'wēc we'we:

—Cuse's mcu'le'j jite', tyā'wēy yuuc, naapcchja' tyajy cuse' ewuuc ca'tuwe'sh na'wēy. ¹⁴Atsa' fariseowe'sha' casejrra Jesusa's icjya' puuty we'wety.

Jesus ma'wēsateva nyafiitey pta'shni

15 Tyā'wē yūutste Jesus jiyurra', tyājū casejna u'cj, atsa' nasa wala u'jty tyāa yacj. Jesusa' ātsa'sa ma'wēsatyva jyucac nuycatyji, 16 nava quim ujtyva pta'shcaajme' nuycatyjisa quimteva. 17 Dyus yuwe pta'shsa Isaias we'weni cytey yuucajnrrāac tyā'wē neewe'we. Isaiasa' na'ljic:

18 Andyna selpiwa'jsa naa pitstjē'ja'stju tyjityj.

Tyāasa peeygājna wechana ūstju,

Sa' andy Espiritu's ūsu'nja,

Atsa' andy ew yūuwa'ja's pta'shina maa nasatyva jyuca.

19 Tyā' puiivameena, sa' āate susnava fi'nzemeena.

Tyāa pa'ga tyajy we'weni' quīj yujva ptjūusemeena cliicjunsu.

20 Macue pytjaa ājmeecuesateva tyā' ajtsemeena,

Sa' chjāchja fi'nzewa'ja's ji'pjmeeyā'tjeva, tyā' iviitumeena,

Naa quiwete zhichcue tyajy jycaajwa'j en ājpcach.

21 Atsa' nasa' ma'wēsava jyuca tyā'srrāana ūytjasutyna jī'c.

Dyus Espiritu's atsewe'weni

(Mr. 3.19-30; Lc. 11.14-23; 12.10)

22 Tyājū' Jesus tashte jyūna pa'jty uyya' ājasamée we'weya'va ājasamée ech iiyamunisa's. Atsa' Jesusa' nuycatyjite', tyāa pitstjē'ja' uyya' ājac, sa' we'weya'va ājac. 23 Tyā'wē yūute', nasa jyucaysa ūucj yajcyna na'wēty cuj jwend we'we':

—Naa pitstjē'ja' David Nchi'c ína jī'ty. 24 Tyā'jīni's fariseowesh wēse'jrra', na'ljity:

—Naa pitstjē'ja' echtysi nasaa ūusuj cutyi'ji'c nava echtjē'j pu'chterraac tyā'wē āja' jī'ty.

25 Tyā'wē yajcyna ūste Jesus jiyurra', na'wēc we'we:

—Maa quiweteva gobierno' peecy nasatyírráa ajtserra puiirra', chjāchjameena. Tyā'wēy chjamb ma'c yuu meerra' teech yattewe'sh ma'ty yuu nava puuty yajtsena puiirra', puuty ptsuutyna. 26 Tyā'wēy echtjē'jva tyajy jycaajnisna ech yacjírráa puiirra', chjāchjamée puuty ptsuutyna. 27 I'cue'sh andyna we'werra', echtjē'j pu'chterraac echtysi cutyi'ji' jīna i'cue we'we'. Atsa' tyā'wē dyijte', tyā'wē i'cue'sh yacj u'jusawe'shva echtysi cutyi'jya' āja'ty jī'i'cue atsa' tyā'wē ājawal'ja's ¿quimqui'c ūs? Tyā'wē i'cue'sh yacj fi'nzesaíiva āate caajiyu'ju'ty i'cue'sh jypumbani's. 28 Andya' echtysi cutyi'ji'tj Dyus Espiritu pu'chte'. Nava i'cue'shtyi Dyusrrarráa jycaajwa'j en ājne' tyāa pa'ga ne'tca tyā'wē yūl.

29 Maava pitstjē'j chjāchjasa iiyamuni's cusa'jya' u'jrra', tyāa pitstjē'j chjāchjasa cjuē'yna tundmeerra yu', cusa'jya' ājameena. Tyā's cjuē'yna tundrra yuurráa cusa'jya' ājana.

30 Andy ju'ngu yuusame' atsesarra tyā'wē yuutyna. Sa' andya's pu'chsame', yupsaarra tyā'wē yuutyna. 31 Na'ljī'tj na', nasa quījva

ewmée yūuni quǐjva Dyusna ewmée nuywe'weteva tyāatyí' jyuca ya'peltunaína. Nava Dyus Espiritu's atsewe'wete', bagachte yujva peltunāywa'jmée yuuna. ³²Sa' maava Dyus Nchi'c Nasa Yuusa's ewmée nuywe'wesa's peltunāywa'j yuuna. Nava Dyus Espiritu's ewmée nuywe'wesa yuurrána peltunāywa'jmée yuuna naa quiwete cieluteva.

Ma'wē fi'nzeni'sva uyrrac ya'jiyu'

(Lc. 6.43-45)

³³Fytūu tash ewsa' ewcu yūnu!. Nava fytūu tash ewmeesa' ewmeec yūnu!. Fytūu tash ma'wēsateva yūnte yuurrác ya'jiyu!. ³⁴Ewmeesa luuch i'cue'sha' ġma'wē ew we'weya' ājaqui'cue, ūuste yuu ewmeesa ji'pjrra'? Tyāa pa'gatey ūuste yaacyni'scu ya'we'we!. ³⁵Nasa ewsa' ewsarrá'scu we'we', tyajy ūuste' ewsarrá's ji'pjna naa pa'ga. Naapcachja' nasa ewmeesa' ewmeesarrá'scu we'we', tyajy ūuste' ewmeesarrá's ji'pjna naa pa'ga. ³⁶Andyá' na'jī'tj na': Dyus castigāywa'j ente' jyuca pta'shi ji'pjutyna quǐjva jyuca ewmée we'weni's. ³⁷Indy ma'wē we'weni'sva jyuca paapēyni yuuna, tyajū yuuwema'ng yuu meerra' yuuwemeema'ng yuu nava ya'jiyuuna.

Nasa ewmeesa' cieluju quǐjrráava caavya'ja'cjaajni

(Mr. 8.12; Lc. 11.29-32)

³⁸Tyajū' fariseowe'sh vite' ley caapiya'jsawe'sh Jesusa's na'jīnaty pējy: —Tyā'wē quim yujva ājanimeesa's cue'shtyi mcaavya'ja' jīte', ³⁹Jesus pasrra! —Nasa ewmeesa ishiisawe'sha' quim yujva ājanimeesa'styi caavya'ja'cjaajni. Nava tyā'wē yūumée Dyus yuwe pta'shsa Jonas fi'nzenirráana ya'pta'shina. ⁴⁰Jonasva ma'wēga wendy tutyjte tecj en tecj cus u'pu', tyā'wēy Dyus Nchi'c Nasa Yuusaava tecj en tecj cus quiwe dyiiga ūsuna. ⁴¹Dyus castigāywa'j en ājte!, Ninive chjambtewe'sha' naa ensuwe'shtyi' ewmeete nviitutyna, tyāa pa'gatey Jonas Dyus yuwe's pta'shishpcachja', Ninivetewe'sha' pcaltyi nvijtrra wa'lmée Dyus tashte utyaaty. Atsa' ayte' Jonas na'wēsarrámée jytjaacuesa ūsa!, nava tyāa yu'sa' wa'lu'ty. ⁴²Tyā'wēy Dyus castigāywa'j en ājte!, jyul'j quiwete jycaajsa u'ya' naa ensuwe'shtyi' ewmeete nviituna, tyāa pa'gatey tyā'wē jyul'j quiwejuva tyāa u'ya' yuwe'c Salomon pta'shnhirrá'sva wa'lmée wēse'jya!. Atsa' ayte' Salomonte jytjaacuesa ūsa!, nava tyāa yu'sa' wa'lu'ty.

Echa' nasa ūuste qui' shawendni

(Lc. 11.24-26)

⁴³Echa' nasa ūusuj casejrra quiwe ujdysu pecūjna ul'jurrava u'pwal'j uymeerra: ⁴⁴Shawendu'nja casejtj tyāa yatnay sūju'c. Tyajū' shawendna pa'jrra!, tyāa pitstjē'ja's uyuuna yata's ma'wē ew pjeul'jrra pandrra tyaaajni ūs yuucy tyā'wē. ⁴⁵Tyajū' ul'jrra vite siete ech tyāate jytjaacue ewmeesaty jyūna pa'jrra tyāa pitstjē'j ūuste jyuca cējetyna, atsa' tyāa pitstjē'ja' iiméj jytjaacue ewmeesa yuuna. Tyā'wē yuual'j en paljana naa nasa ewmeesaty' jīc.

Jesus nji'j vite' tyajy nyacjwe'sh

(Mr. 3.31-35; Lc. 8.19-21)

⁴⁶Jesus tyã'wě nasaty we'wena ūsiyna, nji'j vite' nyacjwe'sh tyāa yacj we'weya' pa'jrra ecate ūsu'ty. ⁴⁷Atsa' cyte ūssa teechs! Jesusa's pta'shcu:

—Iindy mama iindy nyacjwe'sh indy yacj puuty we'weya' pa'jrra ay ecate ūsta' jīte!, ⁴⁸Jesusa' na'wēc we'we pta'shsa's:

—Andy mama andy nyacjwe'sha' quimteva jiimeevá'cue jīrra!, ⁴⁹tyāa yacj u'jusawe'shtyi cuseju vijyarra:

—Naawe'shrrāa andy mama, andy nyacjwe'shta!. ⁵⁰Tyāa pa'gateway maava andy Tata cielute ūsa' tyajy jytjāasni's cytey yuusaarrāa tyã'wě andy nyacj, andy npe'sh, andy mama na'wēsata' jic.

Scuutyj uujsa's caaja'nda'jni

(Mr. 4.1-9; Lc. 8.4-8)

13 ¹Tyāa enteyírrāa Jesusa' yatuj casejrra icjwala pucate ūsya'c u'j. ²Atsa' tyajy ūsnite wala nasa pcjaacjete!, Jesusa' barcotec cjēe. Atsa' nasa yu' icj pucatee neeyūuty. ³Tyajūc wala caapiya'j ejemplo caaja'nda'jrra na'jīna:

—Scuutyj uujsa' u'jya' casejc. ⁴Atsa' ujna u'juetste!, msuufi yu' dyi'jsuty ūshi scuutyj fiwa!. Atsa' vichacue pa'jrra scuutyj fiwtyi ū'ty. ⁵Vite ajsu' cuet cajcuesuty ūshi, quiwe wejcuērrāa ji'pjsu. Atsa' cysū ūshisa' wala dund buchaty quiwe walameene'ta ya'fijmb tyāa pa'ga. ⁶Nava sec achaate' jyuca u'jndytyi, iiwejtseya' ājameene'ta naa pa'ga. ⁷Vite scuutyj fiwa' tsjūtsj cshavysuty ūshi, atsa' tsjūtsj cjuē'y walaarra!, scuutyja's apjrra iviituty. ⁸Nava vite ajsu' quiwe wala ewsu ūshity, sa' wala yūnty. Maa tashii yu' cien, vite' sesenta, vite' treinta ñiñ tyã'wēty tsut. ⁹Na'wě pta'shni's jiyuwa'jsa ūsrra!, jiyune'cue jic.

Quij yūupa'ga ejemplo yacjrrāa caaja'nda'jrra pta'shni

(Mr. 4.10-12; Lc. 8.9-10)

¹⁰Tyajū' tyāa yacj u'jusawe'sha' Jesus tashte utyaarra na'wēty pējy:

—¿Quijya'nga ejemplo caaja'nda'jrrarrāa nasaty pta'shi'? jīte!, ¹¹na'wēc pas Jesusa'!

—Dyus jycaajni ensu ma'wě yūuwa'ja'sva quim yujva jiyunimeesa's i'cue'sh yuutyi's caajiyu'jwa'ja!. Nava vite yuutyi's caajiyu'jwa'jme!. ¹²Tyāa pa'gateway jiyuwa'jsa's jweeiírrāa āate ya'caajiyu'juna, wala jiyucajn. Nava jiyuwa'jmeesa's ya'caajiyu'jmeena, wejyva le'chcuerrāava jivvāa yuuna tyā's yujnava cusa'jni yuuna. ¹³Tyāa pa'gatj ejemplo caaja'nda'jrrarrāa we'we!. Tyã'wě yuucajni tyāawe'sha' uyrrava, uysamée na'wě jiyu'tsmeeta!, sa' wēse'jrrava wēse'jsamée na'wě nwēese'je'tsmeeta!. ¹⁴Tyāawe'sh fi'nzewa'ja's Dyus yuwe pta'shsa Isaias we'weni' cytey yuuc. Tyā' na'wēc we'we:

I'cue'sha' wēse'jevá'cue, nava jiyumeene'cue.

Uyuvá'cue, nava tyāana sūjmeene'cue.

15 Tyāa pa'gatey tyāa nasa ūusa' jyuca ewmeesarrāa yuuna pa'jni'.

Tyāa pa'gaty wēse'jya' wa'lu',

Sa' tyāawe'sh yafyju uycajmén,

Tyāawe'sh tjū'wējuva wēse'cjamen,

Yafya' jyuca apjanita' tyāawe'sh ūuste ew jiyuycajmén.

Tyāa pa'gaty andy tashte pa'ja'tsmée andy nuycatyjicajn jī'c.

16 Nava i'cue'sh yacja' wala yuj wecha yuja' i'cue'sh yafyju yuu uyi'cue, sa' i'cue'sh tjū'wēju yuu wēse'ji'cue naa pa'ga. 17 Isatj we'we', maanzcuēesava Dyus yuwe pta'shsa vite' nasa ewsa nyafiwe'shva uy wēety i'cue'sh uyna ūsi'cue tyā'sna, nava uymeeta'. Wēse'j wēety i'cue'sh wēse'jna ūsi'cue tyā'sna, nava wēse'jmeeta'.

Ejemplo yacj caapiya'jni's āate pta'shni

(Mr. 4.13-20; Lc. 8.11-15)

18 Āchja' mjiyuwe scuutyj uujsa's caaja'nda'jrra pta'shni's. 19 Naa quiwete Dyus jycaajwa'ja's pta'shni's wēse'jrrava jiyusame', scuutyj fiw dyi'jsu ūshisāa na'wēsata': Nasa' Dyus yuwe's wēse'tjeva, echtjē'ja' pa'jrra ūusuj cutyil'jina. 20 Scuutyj fiw cuet cajcuesu ūshisa' Dyus yuwe's wala wechana jypa'gasa na'wēsata'. 21 Nava Dyus yuwe's achamée chjāchja yaacysa' chjāchja'tsmeeta'. Tyā'wē Dyus yuwe's jypa'gapa'ga, pcyuwa'j en pa'tjerrāa jyuca fiycaja'ty. 22 Scuutyj fiw tsjütsj cshavysu ūshisa' Dyus yuwe's wēse'jrrava naa quiwetewe'shrrā's wejy wala yajcyna jipjunisarrā's pa'pchusa na'wēsata'. Atsa' tyā'wēsarrā's wejy wala yajcyte', tyāarrāa jyuca cnayu'c Dyus yuwe yu'sa' caapechcana'jna. 23 Nava scuutyj fiw quiwe ewte ūshisa' Dyus yuwe's wēse'jrra cytey yuusāa na'wēsata': Scuutyj spiigava ma'wēga cien vite' sesenta vite' treinta ñiñ jipju', tyā'wēycu tyāawe'sh ūuste Dyus yuwe' wala pena' jīc.

Jyütj ewmeesa scuutyj cshavyte buchasa

24 Jesusa' vite ejemplo na'wēc caaja'nda'jrra pta'sh:

—Naa quiwete Dyus jycaajni ente Dyus yuwe ewsarrā's pta'shteve, na'wē yuuna: Teech mjīisa' tyajy quiwete fiw ewsa'scu uj. 25 Nava jycaaysa dejetspcachja', uutjash namu's atsesa pa'jrra ū'nimeesa'scu scuutyj cshavyte ujrra ulj. 26 Atsa' scuutyj buchatspcachja', tyāa cshavyte jyütj tash ū'nimeesava vyaac. 27 Tyā'wē yūute', selpisaawe'sha' na'jīnaty namu's pta'shya' ulj: Indya' fiw ewsarrā'sngu uj, atsa' naa jyütj tash ewmeesa' ¿ma'wē yūurraga bucha? jīte', 28 namu' na'wēc pas: Maa atsesa ujne'ta jīc. Tyajū' selpisaawe'sha' pējytyi: ¿Tyāa jyütj tash ewmeesa's cjumbeya' uljmtja'w? jīte', 29 namu' na'wēc we'we: Cuch yuunuwe. Tyā'wēme', pety scuutyj tash yā'jrra ya'cjumbeetya. 30 Manvijtwe, peecy walaatyna, scuutyj wacawa'j en ājpcach. Tyāa ente andya' jycaaja'nja mjīisatyi', atsa' jyütj tash ewmeesa cjuē'yna jyuca cjumberra tundutyyna cambwa'j. Tyā'wē yūurra scuutyja's andy yatte ज्याawuutyyna jīc.

Mostasa fiwa's caaja'nda'jnisa

(Mr. 4.30-32; Lc. 13.18-19)

³¹Jesusa' na'wēc pta'sh vite ejemplo caaja'nda'jrra:

—Naa quiwete Dyus jycaajya' tacjni ena' na'wēsa': Teech mjīisa' mostasa fiwa's quiwete ujc. ³²Tyāa fiwa' maa maa fiwteva tjaacue le'chcuēesa'. Nava buchayā'jrra', maa ū'tashteva jytjaacuec walá'. Atsa' tyā'wē seena' walaate', vichacue yujva pa'jrra cul'tasu yaatu'ty jīc.

Levadura's caaja'nda'jnisa

(Lc. 13.20-21)

³³Vite ejemplo caaja'nda'jrra na'wēc pta'sh:

—Naa quiwete Dyus jycaajni ena' na'wē yūuwa'jsa': Teech u'y panu'jutsrra', tecj libra scuutyj ū'wete levadura's ca'ndte ma'wē jyuca pēetjhecy tyā'wē yūuwa'jsa' jīc.

Ejemplo yacj caapiya'jwa'ja's pta'shni

(Mr. 4.33-34)

³⁴Jesusa' ejemplo caaja'nda'jrra yuurráac pta'shi' nasa jyucaysaty. Ejemplo caaja'nda'jmée yu', pta'shi'tsme'. ³⁵Tyā'wē yūuwa'ja's Dyus yuwe pta'shsa na'jīna fi'cj tyāac cytey yuu. Na'wēc fi'j:

Quim yujtyva caajiyu'jnimeesa ūsyā'lty yu' naa quiwe's vitiyna tyā'sna pta'shi'nja ejemplo caaja'nda'jrra yuurráa jīnac fi'j.

Jyūtj tash ewmeesa's āate caajiyu'jnisa

³⁶Tyajū' Jesusa' nasa tashuj tyuteerra yattec u'ca, atsa' tyāa yacj u'jusawe'sha' utyaarra na'wēty pējy:

—Jyūtj tash ewmeesa's caaja'nda'jna we'weni's āate mcaajiyu'j jīte', ³⁷Jesusa' pta'shcu:

—Fiw ewsana uujsa' Dyus Nchi'c Nasa Yuusá'. ³⁸Atsa' uutjash jīnisa' naa quiwe'. Fiw ewsa jīna we'we'tj tyāa yu' nasa Dyus jycaajnite ūswa'lsatytyj tyā'jī'. Sa' echtjē'j nasa yuutyi' jyūtj tash ewmeesa jī'tj.

³⁹Atsa' jyūtj tash ewmeesa's uujsa yu', echtjē'jīrrá'. Scuutyj wacawa'lj en jī'tj tyāa yu' naa quiwe ptsuwa'ja'stju tyā'jī'. Atsa' ū'a's pcjacjsa', Dyus angeleswe'shta'. ⁴⁰Jyūtj tash ewmeesa's ma'wēta pcjacjrra ipyte ambu' chjavycajn, tyā'wēy yūuni yuuna naa quiwe ptsuute'.

⁴¹Dyus Nchi'c Nasa Yuusá' angeleswe'shtyi cajana tyā'wē ewmée yūuna vitety pcalte cweete'ljna ūssawe'shtyi tyajy jycaajna ūsnijū cutyi'jrra ⁴²ipy walate acjacjn. Cyteea' seena' yuj pembeetyna qui'tjtyi csuusujna. ⁴³Naapcachja' Dyus jytjāasni's cytey yuusa' sec na'wē eena' cweetjetyna Tata cielute jycaajna ūsnite. I'cue'sha' jiyuwa'jsa ūsrra', jiyune'cue.

Iiméj pa'gasa's sùtjrra tyaaajnis

⁴⁴Naa quiwete Dyus jycaajna ùsni ena' iiméj seena' pa'gasa's quiwe dyyite sùtjrra tyaaajni na'wësa': Teech pitstjè'jva ma'wë tyā'wë pa'gasa's uyrra', āchjii yu' jyūna u'jya' ājameerra cyteyrrāa wejy ew sùtjrra tyajacy, sa' wala wechana u'jrra tyajy ji'pjuni's jyuca tyweyrra tyāa vyuju quiwe's weyuucy mteene' ewsa's sùtjrra tyaj tyāa quiwe's tyā'wëysa'.

Perla iiméj pa'gasa's uyni

⁴⁵Naa quiwete Dyus jycaajna ùsni ena' na'wësa': Perla zhichcuesa's weysaava ma'wë pacuerra ⁴⁶teech perla iiméj pa'gasa's uyrra', tyajy ji'pjuni's jyuca tyweyrra tyāa vyuju perla's weyuucy tyā'wëysa'.

Wendy ucje yacj caaja'nda'jrra caapiya'jni

⁴⁷Naa quiwete Dyus jycaajna ùsni ente' na'wë yūuwa'ja': Wendy ucje'sva ma'wë icjwalacjè acjte', wendy ma'wësatyva jyuca pcjacjey. ⁴⁸Atsa' wendy uwesá' ucje's tujmete cuty'jrra wendytyi tyjityjya' cachrra ewsa's canastate āshrra', ewmeesaty' icjwalacjè āshityqui ⁴⁹tyā'wëy yuutyna Dyus angeleswe'sha' naa quiwe ptsuwa'j en ājte'. Sa' tyāawe'sha' ewmeesaty' ewsa cshavyuj tyjityjrra ipy walate acjetyna. ⁵⁰Cyteea' seena' yuj pembeetyna qui'tjtyi csuusujna.

Nyaffi caapiya'jni'sva jiisa u'sesa'sva jiisawe'sh

⁵¹Tyā'wë caapiya'jni's Jesusa' na'jīnac pējy:

—¿I'cue'sha' jyuca jiyucue' na'wë pta'shni's? jīte', tyāawe'sha':

—Jiyuūtja'w jīnaty pas.

⁵²Atsa' Jesusa' na'wëc we'we:

—Dyus jycaajwa'j ena's jiyusa' ley caapiya'jsava ma'wë nyaffi caapiya'jni's piyarra caapiya'jni u'sesa'sva jypa'garra wala jiisa yuucy tyā'wëy e'nz jwend jiisa yuutyna jīc.

Jesusa' Nasaretna u'jni

(Mr. 6.1-6; Lc. 4.16-30)

⁵³Naa ejemploty Jesusa' pta'shna jyā'jrra', tyajū u'cj tyajy quiwen.

⁵⁴Cyteea' judiuwe'sh pcjaacjenitec caapiya'jna ūsu'. Atsa' nasa' cuj yajcyna na'jī'ty:

—Naa pitstjè'ja' ¿mteequi'c tyacue wala piya tyā'wë ājaya'? ¿Ma'wë yūurraga tyā'wë quim yujva ājanimeesa's caavya'jal'ja'? ⁵⁵Naafi ¿carpintero nchi'c meená', atsa' njī'ja' Maria meená'? Atsa' tyajy nyacjwe'sha' Jacobo, Jose, Simon, vite' Judas tyāawe'shta', ⁵⁶atsa' tyajy npe'shwe'shva ayte cue'sh yacj ūsta'. ¿Majūqui'c piya na'wë quijnava jyuca ājawa'ja's? ⁵⁷Tyā'wë jiiity yu', tyāa pa'gaty Jesus we'weni's cytey yuumée. Nava Jesusa' na'wëc we'we:

—Dyus yuwe pta'shsa' peecy quiwesu vite' peecy yattewe'sh weechni yuurraa fi'nzetyna maava jirra', ⁵⁸ quim yujva ajanimeesa's jwee yu' caavya'ja'jme!, tyāawe'sha' tyajy we'weni's cytey nwēese'jmeeta' naa pa'ga.

Juan Bautista uuní

(Mr. 6.14-29; Lc. 9.7-9)

14 ¹Tyāa ensu' Herodesa' Galilea quiwetec ne'jue'sh yu', sa' Jesus quijquijva ew yūuni's jiyurra', ² tyāa yacj ūssawe'shtyi na'wēc we'we: —Tyāa pitstjē'ja' Juan Bautistane' qui' ityi yuu. Tyāasane' tyā'wē quim yujva ajanimeesa'sva caavya'ja'jya' āja' jīc.

³Herodesa' Juan Bautista's na'wē yūurraga icj: Juana's tundrra carcelte ctyaaja'cja, nava Herodes nyacj Felipe nyu Herodias pa'garrāane' tyā'wē carcelte ctyaaja'j. ⁴Tyāa ensu' Juan Bautista' Herodesa's we'werra':

—İindy yacjtjē'j nyua's cusa'jrra iindy nyu na'wē jype'jwa'j ji'pjmeeng jīte!, ⁵Herodesa' Juana's icje'nja sūjne!. Nava nasa jyucaysa Juan ju'ngurrarrāane'ta ūsu!, Juana' Dyus yuwe pta'shsapa'ga. Tyāa pa'gane' ūucjrra icjmēe carcelterraa tyaj. ⁶Nava teech ente' Herodesa' tyajy upyni en añu ājte fiesta vitte!, Herodias niisa' nasa pi'cynisa dyi'pte wala zhichcue cu'jya' casejne!. Tyāa pa'ga Herodesa' iimēj wala wecharra, ⁷quij pējyteva jyuca ūsu'nja jīnane' puuty we'we tyāa cna'sa's. ⁸Tyājū' nji'j yu'cypejte!, tyāa cna'sa' na'wēga pējy Herodesa's:

—Juan Bautista dyictjea's plaatute acjrra ūsune'nga jīte!, ⁹ne'jue'sh Herodesa' wala nūsrrava, tyā'wē yā'jne' quij pējyteva ūsya' puuty we'we nasa pi'cynisa dyi'pte, tyāa pa'ga cytey yūuya' neeyūuyā'jrra!, ¹⁰Juan dyictjea's spē'tjcaajne' carcelte. ¹¹Atsa' dyictjea's plaatute acjrra ūste!, tyāa cna'sa yu' nji'ja'sne' ducj.

¹²Tyā'wē yūute!, Juan Bautista yacj pi'cyna u'jusawe'sha' pa'jrra uuní cacue's jyūna u'jrra pendaane'ta. Sa' u'jrra Jesusa's pta'shne'ta.

Cinco mil nasaty Jesus sājīni

(Mr. 6.30-44; Lc. 9.10-17; Jn. 6.1-14)

¹³Tyā'wē Herodesa' Juan Bautista's icjcu jīni's Jesusa' jiyurra', barcote cjēerra u'cj teech ajte quim yujva u'pnimeesate pa'jya!. Nava Jesus mtee pa'jya' u'tjeva jiyurra nasa' chjambu casejrra Jesus pa'jwa'tje pacuena u'ljty chindarrāa. ¹⁴Atsa' Jesusa' barcoju casejetsrra' uycu nasa wala cuj ūste, sa' tyāawe'shtyi peeygājrra nuycatyjic ātsa'saty pe'jrra nuypa'jnisatyi!. ¹⁵Tyājū' cusna quījatste!, tyāa yacj u'jusawe'sha' Jesus tashte utyaarra na'wēty we'we:

—Cusutsyā'ja!, naapcachja' aysu' quim yujva u'pnimeesa!. Atsa' nasaty! mcaaj chjambu pa'jrra quijrrāava weyrra ū'cajn jīte!, ¹⁶Jesusa' na'wēc pas:

—Tyāawe'sha' ū' weyya' u'jwa'j peejymeena. I'cue'sh mpuutswe jīte!, ¹⁷na'wēty pas:

—Cue'sha' quijva wala yu' ji'pjmeetja'w. Tajts pan e'nz wendyrrāa ji'pjta'w jīte!, ¹⁸Jesusa'!

—Tyāaty! mneejyūjwe jīnac jycaaj.

¹⁹Tyajū' nasaty cachcaacj tyacsū. Sa' tajts pan e'nz wendytyi jypa'garra, cielute pagayrra Dyusa's wecharra pantyi pe'ltendec. Tyā'wě yūurrac tyāa yacj u'jusawe'shtyi ūs, atsa' tyāawe'sha' ūsu'styi nasaty. ²⁰Atsa' jyucaysa ū'rra tyictē', doce canastate utaty quijyasaaty pejacj. ²¹Ū'sawe'sha' cinco mil pitstjē'jty yu', u'ywe'sh vite' luuchwe'shtyi yu'

Īcj cajcuega Jesus u'juni
(Mr. 6.45-52; Jn. 6.16-21)

²²Tyajū' Jesusa' tyāa yacj u'jusawe'shtyi barcote yatste caacj, sa' tyāa yu' cytee neeyūuc nasa tyuteena u'jsaty wechana. ²³Tyajū' nasa jyuca tyuteena u'tje', tjā'j vitsna u'cj tyāarrāa Dyus yacj puuty we'weya'. Jyuca chji'ndyni yā'tjeva, Jesusa' cytee nee ūs'frrāac yu'. ²⁴Naapcachja' barco' ĩcj pyājūy u'juetscu yu'. Atsa' wejyaa wala quitterra, dyi'puj sējrra barco's yupcu. ²⁵Atsa' cjicjyna sējya'vate', Jesusa' utyaana cūjc ĩcj cajcuega chindarrāa. ²⁶Atsa' ĩcj cajcuega tyā'wě yujte uyrra', barcote u'jsawe'sha' ūucjna na'jīnaty sus we'we:

—Echa'stja'w uy jīte', ²⁷Jesusa' na'wēc we'we:

—Ūucjnuwe, andytju jīte', ²⁸Pedro we'werra' na'jīc:

—Andytju jī'ng na' tyāa dyijrra', andyva tyā'wēy ĩcj cajcuesu chindarrāa yujya' ājacajn mcaaj jīte', ²⁹Jesusa':

—Tyā'wērra' myuj jīnac we'we.

Atsa' Pedro' barcojū sa'jrra, Jesus tashte pa'j u'jya' u'juetscu yu' ĩcj cajcuesu. ³⁰Nava wejya seena' chjāchja ūste', ūucjcu. Sa' tyā'wě ūucjpa'garrāa ĩcj dyiicjē cjejetsrra', suscu we'we:

—Meen nwe'we jītspcachja', ³¹Jesusa' pu'quisrra na'jīc:

—¿Quijya'nga Dyusa's yu' yajcymée, ūucjwa'jrrā's yajcy? jīrra',

³²Jesusa' barcote Pedro yacj cjejetspcachja', wejyaa wala' jyuca yujuc.

³³Atsa' barcote ūssa' Jesus tashte peejyūcuerra na'wēty we'we:

—Isa, indya' Dyus Nchi'c yuj yu'nga jīty.

Genesarettewe'shtyi Jesus nuycatyjini
(Mr. 6.53-56)

³⁴Īcjuy ctejcarra', Genesaret quiwete pa'jty. ³⁵Atsa' cysū nasa' Jesus pa'jni's jiyurra tyāa quiwesu nasaty jyuca pta'shte', nasa' ātsa'saty jyuca Jesus tashte nuypa'jty, ³⁶na'jīna pytjaa we'wena:

—Iindy atyj vitsterrāava macjya'ndyil'j jīrra, tyā'wě jya'ndysa' jyuca catyjirraty neeyū'.

Nasa's ewmée vit-sa
(Mr. 7.1-23)

15 ¹Fariseowe'sh vite' ley caapiya'jsa tyāawe'sha' Jerusalen chjambu pa'jrra', maafi yu' na'jīnaty Jesus tashte utyāa:



(San Mateo 14.30)

2—Indy yacj u'ljusawe'sha' ¿quij yūrrata yatsgawe'sh caapiya'jnityi' cytey yu'tsmée, tyā'wē cusecjē yu' caajmée ū'wé'?

³Tyā'jīte!, Jesusva pējycu na'jīna:

—I'cue'shva ¿quij yūrracue i'cue'sh yatsgawe'sh caapiya'jnirrá's nwēese'jrra! Dyus jycaajni yu'sa' cytey yu'tsmée? ⁴Dyusa' na'wēc jycaaja!: Iindy tata iindy mama tyāawe'shtyi' peeygājna pu'chwa'ja'. Atsa' tyā'wē yūumée neywe'shtyi' atsewe'wesa' uu ena's ji'pjuna jī'c. ⁵Nava i'cue'sha' yatsga caapiya'jnirrá's nwēese'jrra Dyus jycaajni yu'sa' cytey yuumée ūsi'cue. ⁶I'cue'sh yatsgawe'sha' na'wēty caapiya'ja': Maa nasava neywe'shtyi' peeygājna pu'chmée, andy ji'pjuni i'cue'shtyi' pu'chwa'ja's Dyusna ducje'nja jīna we'werrarráa, neywe'shtyi' pu'chmeeteva ewa' jī'ty.

7 Yuwejurráa ew we'werra', ūuste yu' ewmeerráa yaacysai'cue, atsa' Dyus yuwe pta'shsa Isaiasa' isa yuj Dyus we'weni's na'ljina fi'jne':

8 Naa nasa' yuweju yu' andya's yaaqui'tja'w jírrava, ūusuj yu' andya's yaaqui'tsmeeta'.

9 Naa quiwete nasaa caapiya'jnirrá's cytey yuuna ūsrra, tyā'wē Dyus jyaajni'stja'w cytey yu' jīte', cyul yujna jī'c.

10 Tyajū' nasaty pa'yarra na'wēc we'we Jesusa':

—Jiyuya' mwēese'jwe. 11 Quīj ū'va tutyjterrāa cjēesa yu', nasaty ewmeesa vitu'tsme', naasáa ūusuj ewmēe yaacynisa yuurráac nasaty ewmeesa vitu'.

12 Tyajū' Jesus yacj u'jusawe'sha' utyaarra na'wēty we'we:

—Indy tyā'wē we'wete', fariseowe'sha' ūusachanaty neeyūu jīte',

13 Jesus pasrra':

—Quīj tashva andy Tata cielute ūssa uujnisamēe yu'sa' cjumbeni yuua'ja'. 14 Atsa' ūucjnuwe. Tyāawe'sha' yafy ji'pjmeesa, yafy ji'pjmeesa nwe'shtyi pe'jna u'jusarráata'. Tyā'wē yafy ji'pjmeesa yafy ji'pjmeesa nwe'shtyi pe'jna u'jurra', e'nzfi cafycjē cjējetyna.

15 Tyā'jīte', Pedro' Jesusa's na'ljinac pējy:

—Ejemplo caaja'nda'jrra we'weni's āate mpeeta'sh jīte', 16 Jesusa' na'ljinac we'we:

—¿I'cue'shva jiyu'tsmeevá'cue? 17 Quīj ū'va tutyjcerrāac u'jue', sa' tyajū qui' caseje'c. 18 Nava ūusuj yaacynisa yuurráac nasa's ewmeesa vitu'. 19 Tyāa pa'gatey ūusujc caseje'c ewmēe yaacynisa, nasaty icj wēenisa, ptamrrava vitesa yacj fi'nzeni, ma'wēsa yacjva pcal yuuna fi'nzeni, pesweeni, išhiina ewmēe nuywe'weni, Dyusna atsewe'weni. 20 Tyā'wē yaacynisaty nasa's ewmeesa vitu'. Nava cusecjē yu' caajmēe ū'nisarrāa yu', nasaty ewmēe vitu'tsme'.

Teech u'y judiu ji'jmeesa Jesusa's jypa'gasa

(Mr. 7.24-30)

21 Jesusa' tyajū casejrra u'cj Tiro vite' Sidon quiwen. 22 Atsa' teech u'y Canaanuwe'sh tyāa quiwete pa'jrra u'psa' Jesus tashte pa'cj pytjaa we'wena:

—David ji'j, ū'cue's meen peeygāj. Ū'cue niisa's ech iiyamute', iiméj wala pytjaa yuuna ūsa' jīteva, 23 Jesusa' ma'wērrāa yujva pasme'. Atsa' Jesus yacj u'jusawe'sha' Jesusa's we'wety na'ljina:

—Cue'sh e'ste cuch susna yuucajmen yatna mcaaj jīte', 24 Jesusa' na'ljinac pas:

—Piishacuē na'wē vituna ūssa Israelwe'shrráatycu pacueya' caaj Dyusa' jīteva, 25 tyāa u'ya' shuuna' yuumēe utyaana cūjrra tyajy tashte peejyūcuc:

—Ū'cue's meen pu'ch jīna. 26 Atsa' Jesusa' na'ljinac we'we:

—Luuch ū'wa'ja's cusa'jrra alcuty ūswa'jme' 27 jīteva, tyāa u'y pasrra':

—Isa yuj we'we'ng. Nava alcu' pejca ū'we'ty mesa tashsu pan pe'la ūshisarráatyva jīte', 28 Jesus we'werra':

—Dyusa' pu'chuyjuna sūjwa'j yuurrá's i'cue yaaqui', tyāa pa'ga i'cue pēyni' cytey yuuna jītspcachja', tyāa dundtey tyāa u'y niisa' catyjinic neeyūu.

Maanzcuēe ātsa'satyva Jesus nuycatyjini

²⁹Jesusa' tyajū casejrra Galilea ĩcj pucasuc u'j. Sa' tjā'j vitstec tejca. ³⁰Atsa' nasa wala pa'jty tyajy tashte ātsa'saty pe'jrra, lengsa, uyya' ājasamée, we'weya' ājasamée, ēseyā' ājasameety. Atsa' tyā'wē wala cuj ātsa'saty Jesus tashte nuypa'tje', tyā' nuycatyjic. ³¹Tyā'wē we'weya' ājasameeva we'weya' ājaty, atsa' ēseyā' ājasameeva catyjity, atsa' lengsava ew u'jya' ājaty, naapcachja' uyya' ājasameeva uyya' ājaty. Atsa' nasa' wala cuj yajcyna Israelwe'sh Dyusa's wala wechaty.

Cuatro mil nasaty Jesus sāl'jini

(Mr. 8.1-10)

³²Tyajū' Jesusa' tyāa yacj u'jusawe'shtyi pa'yarra na'wēc we'we:
—Naa nasa' ayte andy yacj tecj en yā'j ūsta', sa' quīj yujva ū'wa'j ji'pjmeeta', tyāa pa'gatj peeygāja', sa' puutsmée yu' caajme'nja. Tyā'wēme' dyi'tje u'jya' chjāchjameetya jīte', ³³na'wēty pas:
—Nava ¿quījite tyacue wala ū' uyuucytja'w nasa tyāanzcuēesa ū'wa'j? Ayte' quim yujva u'p quiweme' atsa' jīte', ³⁴Jesusa' pējycu:
—I'cue'sha' ¿manz pan ji'pjcue? jīte', tyāawe'sh pasrra:
—Siete pan, wendy cujmeecuērrāa ji'ptja'w jīnaty pas.
³⁵Atsa' nasaty' quiwesu cachcaajrra', ³⁶siete pan vite' wendytyi jypa'gana'va Dyusa's wechac. Tyā'wē yūurrac pe'ltenderra tyāa yacj u'jusawe'shtyi ūs, atsa' tyāawe'sha' nasaty ūsu'styi. ³⁷Jyucaysa ū'rra tyicte', quiyaasa's pcjactyi, atsa' siete canastate utac neeyūu. ³⁸Ū'sawe'sha' cuatro mil ājty yu', nava u'y vite' luuch tyāawe'sh yuutyi' isaniméc cyanz yu'. ³⁹Tyā'wē yūurra Jesusa' nasaty caajrra', tyāa yu' barcote cjēerra Magdala quiwencu u'j.

Fariseo vite' saduceowe'sh cieluju quījrrāava caavya'ja'cjaajni

(Mr. 8.11-13; Lc. 12.54-56)

16 ¹Fariseowe'sh vite' saduceowe'shva pa'jrra', Jesus ewmée yūuteva cpajcyya' sūjrra pējtyti:

—Cieluju quījrrāava mcaavya'ja'j jīna.

²Nava Jesus pasrra' na'jic:

—Cusna sec cjējetste', cuscusa' secuuna, ew cusutsa' jī'i'cue. ³Sa' cusfi we'werra', āchja' en ewmée yuuna, tāapjrrāa ūsa' jī'i'cue. Yuwejurrāa ew we'werra', ūuste yu' ewmeerrāa yaacysa, en ma'wē yūuwa'ja'sva jiyu'i'cue i'cue'sha'. Nava naa ensu na'wē seena'sa vyaatsa' tyāa yu'sa' jiyuya' āja'tsmeei'cue quīj yūuya' tyā'wē yūutsteva. ⁴Naa nasa ewmeesa' cieluju seena'sa's caavya'ja'j jytjāasu'ty. Nava peena yu' caavya'ja'jmeete ewna, naasāa Jonasa' ma'wēga yuu tyā'srrāana ya'pta'shina jīna we'werrarrāa nvijtrra u'cj.

Fariseowe'sh caapiya'jni's levadura yacj caaja'nda'jni
(Mr. 8.14-21)

⁵Jesus yacj u'jusawe'sha' ícjwala cuten u'juetsrrava, pechcanarra pan yu' jyūmeeta ulj. ⁶Cytee pa'jrra', Jesusa' na'wēc we'we:

—Mpa'yajcywe, fariseo vite' saduceowe'sh levadura ewmeesa's jíte', ⁷tyāawe'sha' na'wēty puuty paapēyi':

—Pan jyūmeetja'w atsa' cyajne' tyā'wē we'we' jī'ty.

⁸Tyā'wē we'weni's Jesus jiyurra' na'jīc:

—¿Maa sūjrracue pan ji'pjmeetja'w jīna we'wé'? Pan ji'pjmeeteva, Dyusa' tjēymée sã'jīna sūjwa'lj yu'sa' ji'pjmeevá'cue. ⁹Andya' na'wē tajts pan yacjrráa cinco mil nasaty tjēyméetj sã'jī atsa' quijyaasa's manz canasta pcjacjrrava tyā'sa' yaaquitsmeevá'cue. ¹⁰Vite ente' tyā'wēy siete pan yacjrráa cuatro mil nasaty tjēyméetj sã'jī atsa' quijyaasa's manz canasta pcjacjrrava yaaquitsmeevá'cue. ¹¹I'cue'sha' jiyumeevá'cue andya' pana's we'werra tyā'wē mpa'yajcywe fariseo vite' saduceowe'sh levadura ewmeesa's jī'tsmeetj.

¹²Tyājū' jiyuty Jesusa' tyā'wē pante ca'ndnisa levadura's we'wemée, fariseo vite' saduceowe'sh caapiya'jni's we'werra tyā'jīni's.

Pedro' jiyuc Jesusa' Dyus tashu yuusaateva
(Mr. 8.27-30; Lc. 9.18-21)

¹³Jycaajsa Filipo vitni chjamb Cesarea ja'ndasu pa'jrra', Jesusa' na'jīnac pējy tyāa yacj u'jusawe'shtyi:

—Dyus Nchi'c Nasa Yuusa's ¿quimna jīnata we'we' nasa'? jíte', ¹⁴na'wēty pta'sh:

—Maaí yu' Juan Bautistana jī'ty. Vite we'wesa' Eliasna jī'ty. Atsa' vite we'wesa' Jeremiasna meerra' vite casejne' Dyus yuwe pta'shsa jī'ty jīna pta'shte', ¹⁵Jesus pējyrra':

—I'cue'sha' ¿quimna jī'cue? jíte', ¹⁶Simon Pedro' na'wēc pas:

—Indya' Dyus ítyisa Nchi'cngu, tyajy tashu yuusa jíte', ¹⁷Jesusa' pascu na'jīna:

—Jonas nchi'c Simon, indy yacja' wala wecha yuja'. Indya's naa quiwete pitstjē'lj caajiyu'jmeeta'. Andy Tata cielute ūssa yuuc caajiyul'j andya' Dyus ítyisa Nchi'cteva. ¹⁸Indya' Pedro yaaseng atsa' indyva ma'wēnga andya's ew jiyu tyā'wēy maava ew jiyuwa'ja's indy yacj nviitu'nja. Atsa' tyā'wē ew jiyunijū' echtjē'lj yujva cnaymeena Dyus luuchtyi'. ¹⁹Dyus jycaajna ūsnite pa'jwa'lj dyl'ja's pjandewa'ja's indya's ūsu'nja, atsa' indya' maatyva we'werra': Pcaltyi' Dyusa' peltunaína jíte', peltunāyni yūutyna. Nava peltunaímeena jíte', peltunāynimée neeyūutyna jīc.

²⁰Tyājū' Pedrowe'shtyi neewe'wec, Jesusa' Dyus tashu yuusa yuj yu'ga jīna maa yujtyva pta'shcajmén.

Jesusa' tyajy uuwa'ja's pta'shni

(Mr. 8.31-9.1; Lc. 9.22-27)

²¹ Tyāa entec Jesusa' nyafyrraj pta'sh tyāa yacj u'ljusawe'shtyi na'jīna:
—Jerusalenna u'ljwa'j ji'ptju. Cyteea' wala pcyuuni yu'nja judiu ntjē'jsawe'sh vite' sacerdote npiistjē'jwe'sh vite' Dyus leya's caapiya'jsa tyāawe'sh cusete. Tyāawe'sha' icjetyna, nava tecj ente' qui' ityi yu'nja jīna pta'shte', ²² Pedro' Jesusa's fiite pe'jna u'jrra na'wēc yu'cypej:

—Indya's tyā'wē yūuwa'j yu'sa' Dyusa' jytjāasmeevatsa', ewna jīte',
²³ Jesusa' yu'tjengrra na'wēc we'we Pedro's:

—Echtjē'j, andy tashuj mtyuté. Indya' suw wēenarrāa ūsngu. Dyus jytjāasni yu'sa' cytey yuumée, naa quiwega nasaa yaacynirrá'sngu cytey yuu wēje'.

²⁴ Tyajū' Jesusa' tyāa yacj u'ljusawe'shtyi qui' we'wec:

—Maava andy yacj yuu wēerra', peecy cacue jytjāasni's quījnavā jyuca nvijtrra yuurráa andy yacj yujya' ājanecue, macue pytjaa yu'wa'j seena'sa ma'c yuu nava tyā'sa' ūucjmée. ²⁵ Tyā'wēme', naa quiwete peecy ityi fi'nzewa'jrrá's ya'nwe'wesa', Dyus yacj fi'nzewa'j yu'sa' iviituna. Nava andy yacj fi'nzepa'garrāa naa quiwete ityi fi'nzeni's yajcymée iviitusa', Dyus yacj fi'nzewa'j yu'sa' iviitumeena.

²⁶ Macue naa quiwetewe'sh yu'sa' jyuca cnayrrava peecy ūus yu's iviitute', ¿quījterrá' selpiima'c? Peecy ūusa's iviituyā'tje', ¿quimrra' nwe'wema'c?
²⁷ Jypa'yacymeete', Dyus Nchi'c Nasa Yuusa' qui' quījjana Ney eena' cweetjni pyājte tyajy angeleswe'sh yacj, atsa' ma'wērraj yūusaarrava teechna na'wērraj jypa'gatyna. ²⁸ Isatj we'we', ayte ūssa maafí yu' nee uumey yuune'cue tyā'wē Dyus Nchi'c Nasa Yuusa' jycaajya' pa'jni's jīnac pta'sh.

Jesusa' zhichcue yu'ptjejrā vyaani

(Mr. 9.2-13; Lc. 9.28-36)

17 ¹ Seis en scjēwniite', Jesusa' pe'jna u'cj Pedro vite' pyacjsa Jacobo Juan tyāawe'shtyi teech vits walate. ² Sa' cytee pa'jrra', tyāawe'sh dyi'pte Jesusa' wala zhichcue yu'ptjejrāc vyaā. Tyajy dyi'pa' sec na'wēc eena' cji'cji', atsa' tyajy atjni ropa' seena' zhichcue chijme yuuc. ³ Naapcachja' Moises vite' Elias tyāawe'sha' Jesus yacj puuty we'wenaty vyāa. ⁴ Tyā'wē uyrra', Jesusna na'wēc we'we Pedro':

—Ayte' cue'sh ūswa'j wala ewa'. Atsa' indy ewna jīte', tecj wa'cuē tyaja'nja'w, vite' iindy jīi vite' Moises jīi vite' Elias jīi.

⁵ Tyā'jīna Pedro' we'wena ūsiyna, tāapj seena' zhichcue chijmesa cūjrra apjcu. Atsa' tyāa tāapjte na'jīnac we'weni ptjūuse:

—Na' andy Nchi'c wala wendynisa', tyāa pa'ga wala wechana ūstju. Tyā'sa' nwēese'jna cytey myuuwe jīni's ⁶ Pedrowe'sha' wēse'jrra', wala ūcjrāa quiwega pquipja wetety. ⁷ Atsa' Jesusa' tyāawe'shtyi jya'ndyrra na'wēc we'we:

—Ūucjmée mquittewe jīte', ⁸ quiiterra' Moiseswe'shtyi' uymeeyā'tja', naasāa Jesusrrāa yā'cj ūs yu'.

⁹Tyajū' tjà'ju sa'jna u'juetsrra', Jesusa' na'ljinac jycaaj:

—Quim uyjtyva pta'shmeene'cue tyā'wē uyni's, Dyus Nchi'c Nasa Yuusáa uurrava qui' ityi yuupcach jíte', ¹⁰Pedrowe'sha' Jesusna na'wēty pējy:

—Dyus leya's caapiya'jsawe'sh pta'shrra', Elias cjuē'y yatste pa'jana jī'ty, sa' ¿ma'wē yuua'lsacy atsqui'ty tyā'jī'? jíte', ¹¹Jesusa' na'wēc pta'sh:

—Isa, Elias cjuē'y yuj yatste pa'jwa'jsa yu'c, atsa' isa yuj pta'shi'ne'ta. ¹²Andya' na'jī'tj na', Eliasa' yatste pa'jyujc. Tyā'wēteva nasa' jiyumeerra, tyā'sa' quijqujva yūuty. Atsa' Dyus Nchi'c Nasa Yuusáava wala pcyuuni yuuna tyāawe'sh cusetey jic. ¹³Atsa' Pedrowe'sha' jiyuty Jesusa' Juan Bautistana yajcyrra we'wetsteva.

Teech luuch wēechpa'jsa's Jesus nuycatyjini

(Mr. 9.14-29; Lc. 9.37-43)

¹⁴Tyajū' tyāawe'sha' shawendna quijatste', nasa wala pcjaacjena ūsu'ty. Atsa' teech pitstjē'j Jesus tashte peejyūcuena cūjrra', na'wēc pytjaa we'we:

¹⁵—Andy nchi'ca's meen peeygāj, wēechpa'jrra iiméj seena' pytjaa yuuna ūsa'. Maa enteya' ipycjēva cjēj'e'c, sa' yu'cjēva cjēj'e'c. ¹⁶Atsa' indy yacj u'jusawe'sh tashte jyūna cūjteva, nuycatyjia' ājameeta' jíte', ¹⁷Jesusa' na'ljinac pas:

—Dyusa' pu'chjina sūjwa'j yu'sa' jī'pjmeesata' naa nasa'. ¿Bagachpcach i'cue'sh yacj pu'chna ūs ya'vatca? ¿Bagachpcach ājamée fi'nze ya'vacue? Luucha's ayte mneejyūjwe jíte', ¹⁸jyūna cūjutspcachja', Jesusa' echa's juuna' we'werra cutyi'cj luuch ūusu, atsa' tyāa dundtey catyjinic neeyūu.

¹⁹Jesus yacj u'jusawe'sha' Jesusa'srráa fii pa'yarra, na'ljinaty pējy:

—Cue'sha' ¿quij yūurracytja'w echa's cutyi'jya' ājamée? jíte', ²⁰Jesusa' pta'shcu:

—Dyusa' pu'chjina sūjwa'j yuurrá's yaacya'gamée i'cue ājamée. Isatj we'we', Dyusa' pu'chjina sūjwa'ja's mostasa fiw na'wē le'chcuēsarráava jī'pjvatsa', naa vits wala's we'weni yacjrráa fiite qui'pya' ājane'cue. Dyusa' pu'chjina sūjwa'j yuurrá's yajcyvatsa', i'cue'sh yacja' quij yujva tjēysameena. ²¹Na'wēsa echa' tjēymée yu' casejmeena, wala yūunaana Dyus yacj puuty we'wete yuurráa casejena jic.

Jesusa' tyajy uuwa'ja's qui' pta'shni

(Mr. 9.30-32; Lc. 9.43-45)

²²Tyajū' Galilea quiwete ūsrra', Jesusa' tyāa yacj u'jusawe'shtyi' pta'shcu:

—Dyus Nchi'c Nasa Yuusa's nasa ewmeesa cusetey ducjni yuua'wa'ja'. ²³Atsa' icjetyna, nava tecj ente' qui' ityi yuuna jina pta'shte', tyāawe'sha' wala ñustyi.

Dyuus yatpa'ga vuy ducjni

²⁴Jesusa' tyāa yacj u'jusawe'sh yacj Capernaum chjambte pa'tje', dyuus yattewe'sh vuyu pcjacjawsa' Pedro's tjengya' u'jrra na'wēty pējy:

—I'cue'shtyi caapiya'jsa' ¿ducjetsmeevá' dyuus yattewe'sh vuyu's? jíte', ²⁵Pedro we'werra':

—Ducje'íic jīnac pas. Sa' Pedro' Jesus ūsni yatte cūjutspcachja', Jesusa' na'ljinac we'we:

—Simon, indya' ¿maa sūju'nga? Naa quiwete jycaajsawe'sha' vyu caapcjacie'jrra', ¿quimtyi pēywa'ja' jī'ta? ¿Jycaajsa ji'l'we'shva ducje'ta', meerra' tyāa ji'jmée ecajuwe'shrráa vá'nta ducje'? jīte!, ²⁶Pedro' na'wēc pas:

—Ecajuwe'shrráaty ducje' jīc. Atsa' Jesusa' na'wēc we'we:

—Tyā'wēyā'tje', jycaajsa ji'l'we'sha' ducjwa'jsameeta'. ²⁷Nava quim yujtyva caaūscha'jya'mée indya' u'jrra ícjwalate wendy yūjnza's acjene'nga, sa' nyafyte wendy cāasa's caawayl'jrra uyuune'nga teeche vyu ji'pjna. Tyāa yacj ducjene'nga andy pa'gate vite' iindy pa'gate yā'jrra jīc.

Quim wejy jytjaacue jytujtjesacy

(Mr. 9.33-37; Lc. 9.46-48)

18 ¹Tyāa ensu' Jesus yacj u'jusa docesawe'sha' tyajy tashte utyaarra na'wēty pējy:

—Naa quiwete Dyus jycaajya' quīi ente' ¿maa wejy jytjaacue walasacytja'w? jīte!, ²Jesusa' teeche luuchcuē's pa'yarra tyāawe'sh cshavyte tyajrra ³na'wēc we'we:

—Isatj we'we', i'cue'sha' iwejch yaacyni's nvijtrra naa luuch na'wē yuumeerra yu', Dyus jycaajna ūsnite u'caya' ājameene'cue. ⁴Tyā'wē quījteva ājmeecuesa naa luuch na'wē yuusa yuurráa, Dyus jycaajna ūsnite' maateva jytjaacue walasa yuuna. ⁵Maa nasava andyna jypa'gatsrra ma'wē wechana jypa'gaty tyā'wēy wechana naa luuchcuē na'wēsaty jypa'gana tyā' andyna jypa'gasa yuuna.

Pcalte cweete'jya'mée jypa'yacywa'ja'

(Mr. 9.42-48; Lc. 17.1-2)

⁶Andyna jypa'gasa ājmeecuesaty maava pcalte cweete'jsa's tyijcjtē scuutyj ū'cjni cueta's tundrra ícj wala dyiicjē acjvatsrráa, wejy ewna. ⁷Naa quiwete ewmeesa' bagachteva nes yuutyna. Nava naa quiwete ewmeesa yacja' seena' yuj ūucjūucja'. Sa' maava tyā'wē pcalte cweete'jena tyāa yu' wej yujva iyumeena.

⁸Tyāa pa'ga iindy cuse ma'c yuu meerra' iindy chinda ma'c yuu nava tyā'wē pcalte cweete'jpchāj yuutste', tyā'sa' spē'tjrra mwāataj. Tyā'wē ptsuwa'jmée ipy walate e'nz cuse e'nz chinda ji'pj acjni yuu na'wē', wejyva psumée ūtyi fi'nzewa'tje chinda ji'pjmée lengcuerráava cytee u'cani wejy ewa'. ⁹Iindy yafy tyā'wē pcalte cweete'jpchāj yuutste', cutyl'jrra mwāataj. Infierno ipyte e'nz yafy ji'pj ūs na'wē', wejyva psumée ūtyi fi'nzewa'tje teeche yafy yacjrráava u'cani wejy ewa'.

Piisháa vitusa yacj caaja'nda'jni

(Lc. 15.3-7)

¹⁰Naawe'sh ājmeecuesa maa yujtyva atsenuwe. Na'jī'tj na': naawe'shtyi pi'cyna u'jusa angeleswe'sha' cielute andy Tata tashte nes yuusaata'.

¹¹Tyā'wēme', Dyus Nchi'c Nasa Yuusa' vitusaty nwe'weya'c quīj.

¹²I'cue'shvatsrráava ¿na'wē yūumeema'cue? Cien piisháa ji'pjrra', teeche'sa' vitute', noventa y nuevesaty vitssū nvijtrra piisháa vitusa's

pacueya' ¿u'jmeema'cue? ¹³Sa' uyrra', vite vitusamée noventa y nuevesate jytjaacue peeygājna wechaane'cue. ¹⁴Tyā'wēy i'cue'sh Tata cielute ūssava teechrráa yujva vitu jytjāasu'tsme' naawe'sh ājmeecuesateva.

Peecy yacjtjē'ja's manz us peltunāywa'j yuucy
(Lc. 17.3)

¹⁵Lindy yacjtjē'j indya's ewmée yūute', tyā'srráan pa'yarra mcaajiyu'j ewmée yūuni's. Lindy we'weni's nwēese'jeváana atsa' iindy yacjtjē'j yacj cytee yuwe ewuune'nga. ¹⁶Nava nwēese'jmeeváana atsa' testigo teech meerra' e'nz tyajrra tyāawe'sh dyi'pte we'wene'nga, cyaj tyāa e'nz testigosa' jiyutyna iindy yuwe ewuuya' pa'pchuni's. ¹⁷Tyāa e'nz testigo dyi'pte nwēese'jmeete', dyuus yatte jycaajsawe'shtyi mpeeta'sh. Atsa' tyāawe'shtyiva nwēese'jmeerra', yacjtjē'j na'wémée Dyusna jiimeesa na'wērráa nviitni yuuna.

¹⁸Isatj we'we': I'cue'sha' yuwetyi's naa quiwete pjeu'tje', cieluteva Dyus dyi'pte pjeu'jni yuutyna. Nava i'cue'sha' yuwetyi's pjeu'jmeete', cieluteva Dyus dyi'pte pjeu'jnimée yuutyna.

¹⁹Na'j'itj na': I'cue'sh qui'j yūune'jrrava e'nzsarráava tyā'wē yuute ewna jīna puuty we'werra, Dyusa's pi'quine'cue ma'wē yuuwa'ja'sva atsa' andy Tata cielute ūssa' cytey yuuna. ²⁰Tyāa pa'gatey e'nz ma'ty yuu meerra' tecj ma'ty yuu nava andya's yajcyna pcjaacjerra ūste', andya' tyāawe'sh cshavyte ūswa'jsatj jīc.

²¹Tyajū' Pedro' Jesus tashte utyaarra', na'jīnac pējy:

—Yacjtjē'j andya's ewmée yūusa's ¿manz us peltunāywa'j yuucy, meerra' sietepcachrráa ewmañ? jīte', ²²Jesusa' na'wēc pta'sh:

—Sietepcachrráa ewna jīya'vameetj. Sietesarrarráa setenta ājpcach peltunāywa'ja' jīc.

Selpisáa peltunāyya' wa'lsa yacj caaja'nda'jni

²³Tyāa pa'gatey Dyus jycaajwa'j en ājte', na'wē yuuna: Teech jycaajsa' tyā'sna selpisaawe'sh yuultyi pēyitscu yu'. ²⁴Yuulsaty teehsa na'wērraj pējyna u'juetspcachja', teech jyūna cūjty iiméj seena' wala yuulsana. ²⁵Tyāa selpisa' qui'j yacj yujva dewewa'j jī'pjmeec yu'. Atsa' patrona' tyāa yuulsa's tyweycaacj tyajy nyu, tyajy luuch, tyajy jī'pjuni yā'jrra jyuca tyāa yuula's dewewa'j. ²⁶Tyajū' selpisa' patron tashte peejyūcuerra pytjaa we'wec: Andya's meen peeygāj. Tyāa yuula's jyuca ducje'nja jīte', ²⁷patrona' peeygājna yuula's peltunāyrra ewte nvijtcu. ²⁸Nava tyāa peltunāynisa' casejna u'jrra', vite selpisáa tyā'sna walameecuē yuulsa'scu uy, sa' tyijicjte uwerra icjetscu yu': Andyna yuulngu tyā'sna mducj jīna. ²⁹Tyajū' tyāa yuulusa' peejyūcuerra na'jīnac pytjaa we'we: Andya's meen peeygāj, jyuca ducje'nja jīteva, ³⁰cytey yuumée wejyva carcelna jyūna u'jrra cytee tyajc tyāa yuula's ducjpcach. ³¹Tyā'wē yuutste vite selpisaawe'sh uyrra', wala ñustyi. Sa' u'jrra pta'shtyi tyā'wē ewmée yūusáa patrona's. ³²Atsa' patrona' ewmée yūusa's pa'yarra na'wēc we'we:

Selpisáa peetjājwe, andya' iindy yuula's jyuca peltunāytju, pytjaang we'we tyāa pa'ga. ³³Atsa' indyva tyā'wēy indyna yuulusa's peeygājna peltunāywa'j jī'pjngu, andyva ma'wētca peeygāj indya's tyā'wēy jīrra', ³⁴tyāa patrona' wala ūsacharra, castigāycaacj yuula's jyuca ducjpcach.

³⁵Tyā'jīrra', Jesusa' na'wēc pta'sh:

—Teechsa na'wērraj ūsuj jyuca peltunāimeevá'cue i'cue'sh yacjtjē'jwe'shtyi, atsa' andy Tata cielute ūssava tyā'wēy castigaīna i'cue'shtyi' jīc.

Ptamsa tyuteewa'jme's Jesus caapiya'jni

(Mr. 10.1-12; Lc. 16.18)

19 ¹Tyā'wē we'wena jyā'jīrra', Jesusa' Galileaju casejna u'jīrra Judea quiwesu Jordan yu'cutetec pa'j. ²Cyte ūste', nasa wala pa'jty, atsa' nuycatyjic ātsa'saty.

³Naapcachja' fariseowe'sh maafī yu' Jesus tashte utyaana cūjīrra na'wēty pējy, pasya' shiingte' ewmēe vit-ya' sūjīrra:

—Ptamsarrava, nyu quījcuērrāa ājmēe yūuterrāa tyāapa'ga wāatajte ¿ewmañ? jīte', ⁴Jesusa' na'wēc pas:

—I'cue'sha' ¿Dyus librate iilēymeevā'cue? Cytee we'werra': Dyusa' nyafiitey e'nzīity ja'ndarrajc vit pitstjē'j pety u'y yā'jīrra. ⁵Tyāa pa'ga pitstjē'ja' peecy neywe'sh tashu tyuteerra peecy nyu yuua'wā'jsa yacj utyaawa'jsa', tyā'wē e'nzrrava teechsarrāa na'wē yuuna pa'jya' jī'c Dyus librate'. ⁶Tyā'wē yūunijū', e'nzmēe teechrāac yuuna pa'ja'. Tyāa pa'ga Dyus pūpyrra nviitniiū' ptamsayā'ja' tyuteewa'jsameeta'.

⁷Tyā'jīte', na'wēty pējy:

—Tyā'wēte', Moisesa' ¿quījya'ga peecy nyu yacj tyuteerra ets vitrra nyu's ūsrra tyuteewa'ja' jīna jycaaja'? jīte', ⁸Jesusa' na'wēc pas:

—I'cue'sh tyā'wē Dyus jycaajni's nwēese'jmeerra nyu yacj tyuteena fi'nzepa'ga írrāac Moisesa' tyā'wē yūuwa'ja's nviit. Nava tyā'wē yūuwa'ja's nyafiitey Dyus nviitnisa yu'tsme'. ⁹Andya' na'jī'tj na': Nyu tyā'wē vite pitstjē'j yacj pcal yuuna fi'nzesameete vāa nyu's wāatajīrra vite u'y yacj ptamuuna na' tyā'wē vite yacj ptamuupa'ga pcal canzh yuusāa yuuna. Meerrava nmi' wāataanisa u'y yacj maava ptamuuna na' tyā'wē u'y wāataanisa yacj ptamuupa'ga pcal canzh yuusaaírrāa yuuna jīte', ¹⁰Jesus yacj u'jusawe'sha' na'wēty we'we:

—Tyā'wēte', ptamumēe fi'nzeni wejy ewna jīty. ¹¹Atsa' Jesusa' na'wēc pas:

—Tyā'wē yuja', nava jyucay yu' ptamumēe fi'nzeya' āja'tsmeeta', naasāa quimnane' Dyusa' ptamumēe fi'nzewa'ja's nviit tyāarrāa ptamumēe fi'nzeya' ājana, vite' ptamumēe Dyusrrāana selpiina fi'nzewa'jsata'.

¹²Na'wēsa yu' ptamumēe fi'nzeya' āja'ty: Maafī yu' ptamumēe fi'nzeya' upysatyna, atsa' vitetyi's naa quiwete pitstjē'jwe'sh írrāaty ptamumēe fi'nzewa'ja's vitu', atsa' vite' ptam yuumēe Dyusrrāana selpiina fi'nzewa'jsata'. Ptamumēe fi'nzeya' ājasa', ptamumēe fi'nzetyina jīc.

Luuchcuēty Jesus bendeciyni

(Mr. 10.13-16; Lc. 18.15-17)

¹³Tyājū' Jesus tashte luuchcuē nuypa'jty, luuch dyictjesu peequinzerra Dyus cusete neewe'wecajn. Nava Jesus yacj u'jusawe'sha' ūscha we'wety nuypa'jsaty. ¹⁴Atsa' Jesusa' na'wēc we'we:

—Luuchcuē andy tashte yuusaaty!' cuch yupnuwe, tyāa pa'gatey cielute Dyus jycaajna ūsnisa' naa luuchcuēwe'sh na'wēsa jii írrá'.

¹⁵Tyā'jírra', luuchcuēwe'sh dyictjesu peequinzerra Dyus cusete neewe'werra', tyājū u'cj.

Pitstacy wala ji'pjsa Jesus yacj puuty we'weni

(Mr. 10.17-31; Lc. 18.18-30)

¹⁶Tyāa e'su' teech pitstacy Jesus tashte pa'jrra na'wēc pējy:

—Caapiya'jsa wala ewsa, mpeeta'sh. ¿Quīj ew yūurra ptsumée ĩtyi fi'nzewa'ja's ji'pjuqui'tj? jīte', ¹⁷Jesus pasrra':

—¿Quīj yuupa'ganga andya's ewsa jī'? Ew yūusa' teech yuurraa ūsa' tyā' Dyusa'. Atsa' ptsumée ĩtyi fi'nzewa'ja's ji'pju wēerra', Dyus jycaajnityi' cytey myuu jīte', ¹⁸pitstacya':

—¿Maatyna? jīna pējyte', Jesusa' pta'shcu:

—Dyusa' na'wēc jycaaja': Nasa icjwa'jme', ptamsayā'ja' vite yacj pcal yuuwa'jme'. Pesweewa'jme'. Vitety ishiina nuywe'wewa'jme'.

¹⁹Neywe'shtyi peeygājna ewrráa yūuna fi'nzewa'ja'. Peequí ma'wēnga ya'peeygāja' tyā'wēy mpeeygāj vite nasatyva jīte', ²⁰pitstacy pasrra':

—Tyāatyi' le'chcuējūy cytey yuunatj waláa, atsa' ¿quīj wejy peejyna? jīte', ²¹Jesus pasrra':

—Dyus jycaajnityi' jyuca cytey nwēese'jsa yuu wēerra', u'jrra iindy ji'pjunityi' jyuca tyweyrra ji'pjmeecuésaty mes. Sa' tyā'wē yūurra' cielute ji'pjsa yuune'nga. Tyā'wē yūurra andy yacj myuj jīte', ²²tyāa pitstacya' tyā'wē wēse'jrra' űusnac u'j, wala ji'pjsa yu'c tyāa pa'ga.

²³Tyājū' Jesusa' na'wēc we'we tyāa yacj u'jusawe'shtyi:

—Isatj we'we', ji'pjsa yacja' wala yuj tjēya' Dyus jycaajna ūsnite u'cawalj. ²⁴Na'jī'tj na': camello tyacuesa' ¿ma'wē yūnz cafyga cjēwya' ājacy? Atsa' ji'pjsa yacja' tyāate jytjaacue tjēya' Dyus jycaajna ūsnite u'cawalj.

²⁵Tyā'jīni's wēse'jrra', Jesus yacj u'jusawe'sha' wala kuj yajcytyi, sa' tyāawe'sh pwe'sh na'wēty puuty ya'paapēyi':

—Tyā'wēte', ¿quimrrá' ewte neeyūuya' ājama'c? jīte', ²⁶Jesus tjengrra' na'wēc we'we:

—Nasa' Dyus yacjmée yu', ewte neeyūuya' ājameeyujtyna. Nava Dyus yacj yu', quīj yujva tjēysa meea'.

²⁷Tyā'jīte', Pedro' na'wēc pējy:

—Cue'sha' indy yacj yujya' cue'sh ji'pjuni's jyuca nvijttja'w, sa' ¿quij jypa'gacytja'w? jite', ²⁸Jesusa' na'ljinac pta'sh:

—Isatj we'we', naa quiwete pcalsa's jyuca yu'ptjejrta ewsarrarráa yuuwa'j en ájte', Dyus Nchi'c Nasa Yuusá' pa'jrta jycaajya' tacjetspcachja', andy yacj yuusáa i'cue'sh docesava andy yacj jycaajsa yuune'cue Israel ji'j docesaty. ²⁹Maava jyucaysa tyá'wē andy yacj yujya'rráa tyáawe'sh yat, quiwe, nyacjwe'sh, npe'shwe'sh, neywe'sh, nyu, nchi'cwe'sh, niisawe'sh tyáaty jyuca nviit-sa' tyáa nviitnisate jytjaacue wala jypa'gatyna, sa' ptsumée ityi fi'nzewa'ja'sva jypa'gatyna. ³⁰Nava jypa'yacymeete', macue yatstewe'shrrava, nmejtewe'sh yuutyna; naapcachja' nmejtewe'sh yu', yatstewe'sh yuutyna jic.

Mjiisa yacj caaja'nda'jrta Jesus caapiya'jni

20 ¹Dyus jycaajni ente mjiisa' na'wē yūuni yuutyna: Teech mjii namu' cusí casejrta mjiisa pacueya' u'cj, uutjashte uva undewa'jsa. ²Sa' mjiiwa'jsa yacj puuty we'wec teen mjiini's áj ducjya'. Tyá'wē yūurra mjii ejn caacj. ³Sa' cusí las nueve yuutspcachja', qui' casejc, sa' vite quij mjiiva ji'pjmée plaasasu u'ljusaty uyrra', ⁴tyáaty' na'wēc we'we: Me'jwe mjiiya' andy mjii ejte, teen uta mjiinite áj ducje'nja jite', tyáawe'sha' u'ljty mjiiya'. ⁵Tyajū' mjii namu' ēepyáj wala qui' casejc, sa' cusutste las tresteva qui' casejc, tyáatyva tyá'wēy mjiiya' caacj. ⁶Tyajū' cusutste las cincote plaasasu qui' casejrta', vite uycu quij mjiiva ji'pjmée u'ljusaty. Tyáawe'shtyiva na'wēc we'we: I'cue'sha' ¿quij yūurra mjii ji'pjmée u'ljucue teen uta? jite', ⁷tyáawe'sha' na'wēty pas: Quimva mjiiya' pa'yameeta' jite', mjii namu' caacj tyajy mjii ejte: U'jrta andy mjii ejte mjiine'cue atsa' andya' wala ew ducje'nja jic. ⁸Tyajū' jyuca custe', mjii namu' pa'yac cytee cmáaji'jsa's na'ljina: Mjiisaty' pa'yarra mducj, nava nmej mjiiya' pa'jsaty cjuē'y nyafyte ducjrta teen uta mjiisaty' nmejte ducjna jyá'jane'nga jite', ⁹cytey yuuc. Atsa' cusutste las cincote mjiiya' pa'jsa cjuē'y utyaarra teehsa na'wērraj jypa'gaty teen uta mjiinite ájrrarráa. ¹⁰Tyajū' cusí mjiiya' pa'jsa': Cue'sha' jytjaacue jypa'ga'nja'w sújna úsrrava, tyacueírráa jypa'garra' ¹¹úuscha we'wety mjii namu's na'ljina: ¹²Naawe'sha' nmej pa'jrta naasáa teech ora yuurráaty mjii. Nava ducjni yu'sa' cue'sh nacueírráaty jypa'ga. Naapcachja' cue'sh yu' teen utatja'w mjii, secte yaachana wantáyna jite', ¹³mjii namu' na'ljinac pas: Namicu, indy yacj ewmée yūutsmeetj. Andya' teen uta mjiini's áj ducje'nja jina indy yacj puuty we'wete', ewna ¿jimeengá'? ¹⁴Tyáasa iindy mjiini's áj ducjni's jypa'garra me'j. Indyna nacuetj ducj tyacuerrarráa ducjetstju nmej mjiiya' pa'jsatyva. ¹⁵Nava andy ji'sa' ma'wē yūuwechteva cytey yu'nja. Meerra' andy ew yūuni's indya' ¿atse'vá'nga? jic mjii namu'. ¹⁶Tyá'wē yūuwa'jsata' nmejtewe'sha' yatstewe'sh yuutyna, naapcachja' yatstewe'sha' nmejtewe'sh yuutyna. Tyáa pa'gatey pa'yanisa yu' wala cujta', nava tyjityjnisa yu' cujmeeta' jic.

Jesusa' tyajy uuwa'ja's qui' pta'shni

(Mr. 10.32-34; Lc. 18.31-34)

¹⁷Jesusa' Jerusalen dyi'tje u'juetsrra', tyāa yacj u'jusawe'sh docesaty fiite pe'ljna u'jrna na'ljinac pta'sh:

¹⁸—I'cue'sha' jii i'cue Jerusalenna u'juetstja'w. Cyteea' Dyus Nchi'c Nasa Yuusa's uwerra ducjni yuuna sacerdote npiitstjē'j vite' ley caapiya'jsawe'sh cusete. Atsa' tyāawe'sha' icjwa'lj vitrra ¹⁹judiu ji'jmée vite nasaty ducjetyna, tyāawe'sha' weechna pāpana cluuscjē qui'prra icjajcn. Nava tecj ente' qui' ityi yuuna jīc.

Jacobowe'sh nji'j Jesusa's pēyni

(Mr. 10.35-45)

²⁰Tyajū' Jacobo Juan nji'j Zebedeo nyua' tyāa e'nz nchi'csa yacj Jesus tashte peeyjūcuenta utyaaty, tyāawe'sh pēyni's Jesusa' cytey yuucajcn. ²¹Atsa' Jesusa':

—¿Quijcue yūu jytjāasu'? jīte', Jacobowe'sh nji'ja' na'wēc we'we:

—Indya' naa quiwete jycaajya' quijrra', ū'cue luuch naa e'nzsaty iindy pucacjē pdyi'p cachwa'ja's ūsune'nga jīte', Jesus we'werra':

²²—I'cue'sha' jiimeerrai'cue tyā'wē pēyi'. Andy na'wēy pytjaa yuurra uuwa'ja's ūucjmée jypa'gaya' ¿ājama'cue i'cue'sha'? jīte':

—Āja'nja'w jīnaty pas.

²³Atsa' Jesusa' pta'shcu:

—Isa, i'cue'sha' andy na'wēy pytjaa yuurra uuwa'ja's ji'pjuyujune'cue. Nava tyā'wē andy pucacjē pdyi'p cachwa'lj yu'sa' andy ūsu'tsmeetj. Tyā'sa' naasāa andy Tata yuurraā ūsuna quiim jīi pjeu'jrna ji'pjna tyā'sna jīc.

²⁴Atsa' diezawe'sha' ūusachaty Jacobowe'sh tyā'wē pēyni's wēse'jrna. ²⁵Nava Jesusa' pa'yarra na'wēc we'we:

—I'cue'sha' peecy jii i'cue, naa quiwete jycaajsa' tyāawe'sh nasaty juuna'ty jycaaja', atsa' tyā'wēy npiitstjē'jsava tyāawe'sh jype'jniasaty juuna'ty jycaaja'.

²⁶Nava i'cue'sh yu' tyā'wē juuna' jycaajwa'jsamée i'cue, wejy yuuva i'cue'sha' walasa yuu wēerra', vitesa cusete selpisāa yuuwa'lj ji'pji'cue. ²⁷Atsa' i'cue'sh maava tyā'wē vitesaty jycaajsa yuu wēerra', vīte jycaajni fi'nzewa'ja'. ²⁸Tyāa pa'gatey Dyus Nchi'c Nasa Yuusāa yujva tyā'sna selpii jytjāasya' quijme', wejyva nasaty nwe'wena selpiiya' quijrrac ya'ducj nūste uuya' jīc.

E'nz pitstjē'j uyya' ājasameety Jesus nuycatyjini

(Mr. 10.46-52; Lc. 18.35-43)

²⁹Tyajū' Jerico chjambuj casejna u'juetste', nasa' iimej wala yuwe'ty Jesus e'ste. ³⁰Tyāa dyi'tje e'nztyi cachrra u'p yu' uyya' ājasamée. Sa' Jesus scjēwni's wēse'jrna' sustyi we'we:

—David ji'lj, cue'shtyi meen peeygāj jīte', ³¹nasa' ūuscha we'wety shuuna' yuucajcn. Nava tyāawe'sha' jwee'irráaty sus we'we:

—David ji'j, cue'shtyi meen peeygāj jīna.
³²Atsa' Jesusa' yujurra tyāa uyya' ājasameetyi' pa'yarra na'wēc pējy:
 —¿Quījcue yūu jytjāasu'? jīte', ³³tyāawe'sh pasrra':
 —Cue'sh yafytyitja'w pjaande jytjāasu' jīte', ³⁴Jesusa' peeygājrra
 tyāawe'sh yafysu jya'ndyitpcachja', tyāa dundtey uyya' ājarra Jesus yacj
 u'jty.

Jesus Jerusalente u'cani

(Mr. 11.1-11; Lc. 19.28-40; Jn. 12.12-19)

21 ¹Jerusalente utyaana pa'jatsrra', Betfagé chjambcuēte cjuē'y
 pa'jty. Tyāa chjambcuē' Olivos vits utyagac ūsu'. Tyajū' Jesusa'
 tyāa yacj u'jusawe'sh e'nzsaty na'jīnac caaj:

²—Ay dyi'pga chjambcuē ūsa' cytee me'jwe, sa' cyteea' uyuune'cue
 burru luuch nji'jsa tundni ūsna tyā'sa' jyūcjwenderra jyūne'cue.

³Jyūna yujte uyrra' pēyivāatyna atsa' cue'shtyi jype'jsa' peejya', nava
 tyachmeyna caashwendu'juna jīne'cue.

⁴Dyus yuwe pta'shsa we'weni' cytey yuuc. Tyā' na'jīnac fi'j:

⁵Sion chjambte nasaty na'jīna pta'shine'cue:

Mtjengwe, i'cue'shtyi jycaajsa yuja',

Pytjaacuesa na'wē tjengna, burru luuchte a'jrra,

Atsa' tyāa burru nji'ja' ctū'se'jnisa' jīna fi'jni'.

⁶Tyajū' tyāawe'sha' u'jrra Jesus ma'wē jycaatje', cytey yuuty. ⁷Sa' burru
 nji'ja's jyūna pa'jty luuch yā'jrra. Tyajū' burru luuch castyaja'jnimeesa's
 tyāawe'sh atyjtyi pustyi, atsa' Jesusa' tyāate a'cj. ⁸Nasa wala cuj pi'cyna
 u'jsawe'sh yu', tyāawe'sh atyjtyi dyi'jsuty pusna u'jue' Jesus scjēwwa'jsu.
 Maaí yu' ējya spē'tjrra tyā'wētyi dyi'jsu pusna u'jue'. ⁹Atsa' nasa' yatse
 u'jsa vite' e'ste yuusa tyāawe'sh jyucaysa na'jīnaty sus we'wena u'jue':

—Dyus caajnisala wala yuj jytujtjesa yuja' jycaajsa David ji'j. Dyusa's
 wechaaga wala ew yūupa'ga jī'ty.

¹⁰Tyajū' Jesusa' Jerusalente u'cate', cytee nasa jyucaysa seena' wala
 sustyi na'jīna paapējyna:

—Na' ¿quimna? jīte', ¹¹pta'shtyi na'jīna:

—Naaí Dyus yuwe pta'shsa Jesusa', Galilea quiwesu Nasaret
 chjambtewe'sh jī'ty.

Dyuus yatte tyweysaaty Jesus cashishni

(Mr. 11.15-19; Lc. 19.45-48; Jn. 2.13-22)

¹²Tyā'wē yūuni e'su' Jesusa' dyuus yatte u'carra jyuca eca cashishcu
 cytee tyweyna qui' weyna ūssaty. Sa' vyu yu'ptjejna ūsni mesa vite' tumb
 hijme tyweyna u'pnityva jyuca pūshcu. ¹³Sa' na'wēc we'we:

—Dyus libroute' na'wēc we'we: Andy yata' Dyus yacj puuty we'wena ūswa'jrrá'
 jī'c. Nava i'cue'sha' peswée pcjaacjena ūsni cafy na'wērráa vitrra jī'pji'cue jīc.



(San Mateo 21.9)

¹⁴Cytee dyuus yatte maafí yu' Jesus tashte utyaaty, uyya' ájasamée, chinda lengsa, atsa' tyāawe'shtyi' nuycatyjic. ¹⁵Nava sacerdote npiitstjē'jwe'sh vite' ley caapiya'jsawe'sh tyāawe'sha' ūsachaty, tyā'wē quim yujva ājanimeesa's caavya'ja'tje' cytee dyuus yatte ūssa luucha' sus we'werra' jycaajsa David ji'ja's wala wecha'tja'w jīna susni's wēse'jrra.

¹⁶Sa' Jesusa's pējytyi:

—Na'wē we'wena ūsta' tyā'sa' ¿wēse'je'nga'? jīte', Jesusa' pascu:

—Wēse'je'fítj. Nava i'cue'sha' ¿iilēeymeecue'? tyā'wē yūuwa'ja's Dyus librute na'jīnac we'we':

Luuch le'chcuē vite' chu'chsava tyā'wē zhichcue tuutje'jwa'ja'sngu vit jī'c.

¹⁷Tyajū' Jesusa' cytee nvijtrra u'cj chjambu casejna sa' Betania chjambtec pe'te.

Higuera fytū tash yūnsame's Jesus atsewe'weni

(Mr. 11.12-14; 20-26)

¹⁸Cuscuscjē' Jesusa' chjambna qui' shawendna u'juetsrra', wēc. ¹⁹Sa' dyi'j pucate higuera fytū tash ūste uyrra', tjengya' utyaac. Nava quij yūn yujva uyme', etsrrác ji'pj yu'. Atsa' tyāa fytū tasha's na'wēc we'we:

—Āchja' peena yu' yūnmeene'nga jītspcachja', naa dundtey fytū tasha' ujnodyu. ²⁰Tyāa yacj u'jusawe'sha' tyā'wē uyrra', wala cuj yajcyna na'wēty pējy Jesusa's:

—Fytū tasha' ¿quij yūurraga tyacue wala dund ujnody? jīte', ²¹Jesusa' na'wēc pas:

—Isatj we'we': Cuj jwend yajcymée Dyusa' pasyujuna sūjwa'jrrá's yajcyrra', andy vittju tyā'wērráamée, na'wē yūuya'va ājane'cue: Naa vits wala ayjyu u'jrra ícj walate tee cjēe jīne'cue, atsa' cytey yuuna.

²²I'cue'sha' quij pējyrrava Dyus yacj puuty we'wene'cue Dyusa' pasuna sūjna, sa' tyā'wē yūurra' jypa'gane'cue jīc.

Dyuus yatte Jesus juuna' yūuni's pēyni

(Mr. 11.27-33; Lc. 20.1-8)

²³Tyajū' Jesusa' dyuus yatte u'carra caapiya'jatspcachja', sacerdote npiitstjē'jwe'sh vite' judiu ntjē'jsawe'sh cūjrra' na'wēty pējy:

—¿Quij yūupa'ganga tyā'wē dyuus yatte jyuca suw? ¿Quimga jycaaj tyā'wē yūuwa'ja's? jīte', ²⁴na'wēc pas:

—Andyva i'cue'shtyi' pējy ya'vatj, atsa' andy pēyni's pasya' ājate', andyva pta'shi'nja quim jycaatje tyā'wē yūurrava. ²⁵Juana's ¿quimga jycaaj yu'te bautisāycajn? ¿Dyus vá' jycaaj, meerra' naa quiwete pitstjē'jwe'sh váa ne'ta jycaaj? jīte', tyāawe'sh pwe'sh puuty ya'paapēyi'ty:

—Dyusne' jycaaj jīna paste', tyā'wēte' ¿mjīitecue nwēese'jmée? jīna.

²⁶Atsa' naa quiwega nasa jycaajnine' yu' jīya'va ājame'nja'w. Tyā'wēme',

nasa jyucaysa Juan ju'ngurraráaty we'we', Dyus jycaajnine' yu' jina tyáaty'tja'w ũcju' jĩnaty puuty we'we. ²⁷Sa' ajameerra', Jesusa's na'wěrráaty pas:

—Jiimeetja'w jina. Atsa' Jesusva tyā'wěyrráac pas:

—Andyva pta'shme'nja quim jycaatje tyā'wě yúurrava jic.

E'nz nchi'csaty caaja'nda'jrra caapiya'jni

²⁸Tyajü' Jesusa' na'wěc we'we:

—I'cue'sha' ũus miijajcywe, na'wě caaja'nda'jrra pějyya'vatj: Teech pitstjē'ja' e'nz nchi'ccu jipju', sa' teechna's na'wěc jycaaj: Āchja' andy mjii ejte uva ujnđeya' me'j jite', ²⁹nchi'c pasrra': U'j wēemeetj jirrava, ũus yajcyna u'prra', mjiiya' u'cj. ³⁰Tyajü' neya' vite nchi'ca'sva tyā'wěy jycaaj. Atsa' tyā' na'wěc pas: Ewna, u'jue'nja jirrava u'jme'. ³¹Āchja' i'cue'shtyi ¿ma'wēga tjengu'? ¿Maasaga ney jytjāasni's cytey yuu? jite', tyāawe'sh pasrra': Nyafyte jycaajnis nchi'c jity. Atsa' Jesusa' na'wěc we'we:

—Isatj we'we', gobierno jii vvyu pcjacjsawe'sh vite' u'ywe'sh pcal yuuna fi'nzesa tyāawe'sh cjuē'y Dyus jycaajnite u'catyna, naapcachja' i'cue'sha' u'caya' ajamée ũsi'cue. ³²Tyāa pa'gatey Juan Bautista' caapiya'jna pa'cj ptsumée ityi fi'nzewa'ja's. Tyā'wēteva, i'cue'sha' jypa'gamee'cue. Naapcachja' gobierno jii vvyu pcjacjsawe'sh vite' u'ywe'sh pcal yuuna fi'nzesa tyā'wēsa yu' jypa'gaty. Nava i'cue'sha' yafyju uyrrava pcaltyi nvijtrra Dyus tashte shawendmee'cue.

Mjiisawe'sh patron nchi'ca's icjni yacj caaja'nda'jni

(Mr. 12.1-12; Lc. 20.9-19)

³³Vite ejemplo na'sna mwēese'jwe: Teech quiwe namu' uutjash vitcu, sa' peecu'lj upjrra teech ajte uva's cu'swalj tyajc, sa' ēete tejcarra jyuca tjengwalj yatva tyajc. Tyā'wě yúurra tyāa quiwe's mjiisaty pqui'jrra jyu'lj dyi'cj ulj. ³⁴Uva tjē'lwalj en ajte', tyā'sna selpisaaty caajc quiwee pqui'jnipa'ga pějyya'. ³⁵Nava quiwee pqui'jsawe'sha' tyāa selpisaaty uwerra maai' yuutyi' pāpana vitety icjna vitetyi' cuet wāatatajnaty yūu. ³⁶Tyā'wě yūute!, quiwe namu' jwee'irráac cuj caajna ũsu' selpisaaty. Nava quiwee pqui'jsawe'sha' jyucaytyi tyā'wěrraráaty yūu.

³⁷Tyajü' nmejte' tyajy nchi'c yuunac caaj: Andy nchi'ca's cuch tyā'wě yūumeeváatyna sūjrra. ³⁸Nava quiwee pqui'jsawe'sha' nchi'ca's uyrra', tyāawe'sh pwe'sh na'wēty puuty we'we': Ney uute' naa tyā'wě quiwe's iiyamuwal'ja', atsa' tyā'sa' icjega quiwe' cue'sh jii yuucajn jĩ'ty.

³⁹Tyā'jijā'jrra', uwerra tyāa quiwe'jū cutyi'jrra icjtyi.

⁴⁰Tyā'wě pta'shrra', Jesusa' na'jīnac pējy:

—Tyā'wě yūute!, quiwe namu' pa'jrra', ¿quij yūucy quiwee pqui'jsawe'shtyi'? jite!, ⁴¹na'wēty pas:

—Tyāa ewmeesatyi' peeygājmée icjrra tyāa quiwe's vitety pqui'jina quiwee pa'ga namu's wa'lmée ducjwa'jsaty jity.

⁴²Atsa' Jesusa' na'wēc we'we:

—I'cue'sha' ¿bagachte yujva iilēymeevá'cue Dyus librute na'jina fi'jni's?

Yat tyaajsawe'sha': Naa cueta's selpime' jirra wāatajty.

Nava tyāa íc yat macuesanava chjächja neewewa'jsa yuuna pa'j.

Tyā'wē neewewa'jsa yuuna pa'jwa'ja's Dyuscu vitrra nvijt.

Tyāa pa'ga cue'sh yacja' wala wecha yuja' ¿ji'tsmeena'?

⁴³Tyā'wē atsepa'ga írráatj na'jī': Dyus jycaajni's i'cue'shtyi cusa'jrra vite nasaty ūsni yuuna, quiwe namu's pqui'pja'ga wa'lmée ducjaj. ⁴⁴Sa' maava tyāa cuet cajcuega wetesa' jyuca chcateteena, meerrava tyāa cuet nasa cajcucjē weterra' jyuca cu'china jic.

⁴⁵Atsa' sacerdote npiitstjē'jwe'sh vite' fariseowe'sha' jiyuty tyāawe'shtyi írráa we'werra tyā'jīni's. ⁴⁶Sa' tund wēerrava ūucjtyi, tyā'wē nasa' Jesus ju'ngurrarráaty ūs yu', Dyus yuwe pta'shsa' jina tyāa pa'ga.

Boda fiesta yacj caaja'nda'jrra caapiya'jni

22 ¹Jesusa' vite ejemplo caaja'nda'jrrac pta'sh na'jina:

²—Dyus jycaajni ente' na'wē yūuna: Teech jycaajsa' tyajy nchi'ca's caamba'jrra fiesta vitcu. ³Sa' tyāa jycaajsa' selpisaaty jycaacj pi'cynisaty pa'yacaj. Nava tyāawe'sha' wa'lrta yuwe'tsmeeta'. ⁴Tyā'wēteva, qui' jycaacj vite selpisaaty na'jina: Pi'cynisaty' yuucajane'cue. Ū'wa'ja's jyuca pjeu'jniyā'j ji'ptju, tajcy caaniishi'jnisaty quiicje'tj, atsa' myujwe boda fiestate jī'c jīne'cue. ⁵Tyā'wē cytey yuuteva, pi'cynisawe'sha' nwēese'jmée wejyva tyāawe'sh uutjashsu vite' tyāawe'sh vyu cnaynisurráaty u'j. ⁶Atsa' vite yu' selpisaaty uwerra wala pāpaty icjpcach. ⁷Tyā'wē yūute', jycaajsa' seena' wala ūusachac, sa' tyajy soldauwe'shtyi caacj tyāa nasa icjsaty ca'tuva icjrra tyāawe'sh chjamba's jyuca cambcajn. ⁸Tyajū' jycaajsa' na'wēc we'we tyā'sna selpisaaty: Boda fiestate ū'wa'j jyuca pjeu'jniyā'j ūsa', nava pi'cynisawe'sha' wa'lrta pa'jmeeta'. ⁹Atsa' áchja' me'jwe clliicjunsuwe'shtyi pi'cyya' maatyva jyuca boda fiestate yuucajn. ¹⁰Tyā'jīte', selpisaawe'sha' clliicjunsu u'jrra maatyva jyuca pcjacjtyi ewsa ma'c yuu meerra' ewmeesa ma'c yuu nava jyuca. Atsa' fiesta yatte jyuca nasa utaty.

¹¹Tyajū' jycaajsa' pi'cynisaty tjengya' u'carra', uycu teech pitstjē'j tyā'wē boda fiestate atjni ropa yacjmée u'pte. ¹²Sa' na'wēc we'we: Namicu, indya' ¿qui'jya'nga ayte u'ca', boda fiestate atjni ropa ji'pjmeerra'? Tyā'jīte', tyāa pitstjē'ja' pasmée shuuna'c neeyū. ¹³Atsa' jycaajsa' mesate puutsutssaty na'jīnac jycaaj: Naa pitstjē'ja's uwerra mtundwe chinda pety cuse yā'jrra, sa' ecaju cutyi'jrra chji'ndy walate macjwe, cyte' qui'tjtyi csuusul'jna ū'nena ūucjaj. ¹⁴Tyāa pa'gatey wala yuj pa'yateva, jyucay yu' utyaawa'jsameeta' jic.

Gobierno's ducjwa'ja'sva pëyni*(Mr. 12.13-17; Lc. 20.20-26)*

¹⁵Tyajú' fariseowe'sha' u'lrra tyāawe'sh pwe'sh puuty we'wety Jesusa's ewmeete nviit wëerra. ¹⁶Tyā'wë yūurra' tyāawe'sh ju'ngu ūssa vite' Herodes nasa tyāawe'shtyi' caajty Jesusa's na'ljina pëycajn:

—Caapiya'jsa, indya's jii'tja'w, quijteva isasarráanang we'we'. Sa' Dyus tashte pa'jwa'lj dyi'ja'sva ew yuurráang caapiya'ja'. Nasaa jycaajna yu'cypejnity nwëese'je'tsmeeng, tyāa pa'gatey indya' nasa ewsa na'wë tjengsaty jiyumey ju'ngu yu'tsmeeng. ¹⁷Indya' ¿ma'ljiqui'ng? Jycaajsa Cesara's vyu ducjte ¿ewmañ? Meerra' ¿ducjmeete váa ewna? jite', ¹⁸Jesusa' na'wëc pas tyāawe'sh ewmëe yaacyni's jiyurra':

—Andy dyi'pterráa ew we'werra', ūuste yu' ewmëe yaacysawe'sh, ¿quijya'cue andya's ewmeete nviit wëerra tyā'wë pëyí'? ¹⁹Ducjwa'lj vyu's mneejyūjwe jite', teech vyu's jyūna cūjty. ²⁰Atsa' Jesusa' tjengrra' na'wëc pëjy:

—¿Quiim dyi'pa's qui'pnina, sa' quiim yase's fi'jnina naa vyute'? jite':

²¹—Cesar dyi'pa's ji'pja', sa' tyajy yase's fi'jni' jīnaty pas. Tyajú' Jesusa' na'wëc jycaaj:

—Cesar jī's Cesara's ducjwa'ja', sa' Dyus jī's Dyusna ducjwa'ja' jite', ²²paapëysawe'sha' wala kuj yajcyna neeyūuty, sa' tyajú u'ljty.

Uusaawe'sh qui' ityi yuuwa'ja'sva pëyni*(Mr. 12.18-27; Lc. 20.27-40)*

²³Tyāa entey saduceowe'sh maái yu' Jesusa's tjengya' paljty. Nasa' uuyā'lrra' peena yu' ityi yuuwa'jsameeta' jīna we'wesaty yu' tyāa saduceowe'sha'. Tyāasa na'wëty paapëjy:

²⁴—Caapiya'jsa, meen peeta'sh. Moises we'werra': Maa pitstjē'ljva luuch ji'pjumey nyu's nvijtrra aute', uusáa nyacja' tyāa u'y neeyūsáa yacj cambawa'jsa', atsa' tyāate luucha' uusáa nchi'c na'wë neeyūuna jī'c. ²⁵Atsa' cue'sha' jii'tja'w siete pitstjē'lj pyacjtyi u'pu'. Atsa' nyafytewe'sha' cambarrava luuch ji'pjumey uuc, tyajy nyua's nyacj e'stewe'sh jīi nvijtrra. ²⁶Atsa' nyacj e'stewe'shva tyā'wëyrráa nyacj tecjtewe'sh jīi nvijtrrac uu, sa' tyā'wërrarráaty yūu siete pyacjsay. ²⁷Atsa' nmejte' tyāa u'yva uuc. ²⁸Tyā'wë uurrava qui' ityi yuu ente', ¿maa yacj isa nyu yuuwa'jsacy? tyā'wë cyanz pyacjsatyí tyāa u'yrrarráa iimi'sa' na' jite', ²⁹Jesusa' na'wëc pta'sh:

—I'cue'sha' Dyus libroute fi'jni ūsa' tyā' isa yujna sūju'tsmeei'cue, sa' Dyusa' quijya'va jyuca ājana sūju'tsvameei'cue. Tyāasa jypumbana ūsi'cue. ³⁰Uusaawe'sha' qui' ityi yuurra' peena yu' cambana fi'nzewa'jsameeta'. Tyāawe'sha' cielute ūssa Dyus angeleswe'sh na'wësarráa yā'tja'. ³¹Nava uurra qui' ityi yuuwa'ja's i'cue'sha'

iiłeeymeevá'cue Dyusíiva na'wēc we'we: ³²Abrahan, Isaac, Jacob tyāawe'sh Dyustju andya' jī'c. Uurrava qui' ityi yuusaawe'sh Dyustju jírrac tyā'jī'.

³³Tyā'wē wēse'jrra', wala kuj yajcyna neeyūuty tyā'wē zhichcue Jesus caapiya'pja'ga.

Dyus ley maateva jytjaacuesa

(Mr. 12.28-34)

³⁴Jesus tyā'wē saduceowe'shtyi shuuna' vitni's fariseowe'sh jiyurra', pcjaacjety. ³⁵Sa' Dyus ley caapiya'jsa teeche'sa' Jesus tashte utyaac pējyya' ewmēe pasteva jiyu wēerra. Sa' na'wēc pējy:

³⁶—Dyus leya' maateva jytjaacuesa' ¿maana? jite', ³⁷Jesus pasrra': —Dyusa's ūsuj jyuca yajcyrra tyāa yuurrána selpiina fi'nzewa'ja' bagachte yujva tyutemēe uu entepcach. ³⁸Naa tyā'wē jytjaacuesa'.

³⁹E'stewe'sha' tyā'wēydyi'a': Peequí ma'wēnga ya'peeygāja', tyā'wēy mpeeygāj vite nasatyva. ⁴⁰Dyus jycaajni naa e'nzsarráa Moises leytyi jyuca ājsata', tyā'wēy Dyus yuwe pta'shsawe'sh caapiya'jnityva jyuca jīc.

Dyus tashu yuusa' ¿quiim nchi'cqui? jīna Jesus pēyni

(Mr. 12.35-37; Lc. 20.41-44)

⁴¹Fariseowe'sh pcjaacjerra cytee nee ūsiyna, ⁴²Jesusa' na'wēc pējy: —Cristo' ¿quimna sūju'cue i'cue'sha'? ¿Quiim nchi'cna sūju'cue? jite', tyāawe'sh pasrra':

—David nchi'cna sūju'tja'w jite', ⁴³Jesusa' na'wēc we'we:

—Tyā'wēte', ¿ma'wērraga Davida's Dyus Espiritu caayaqui'tje' Cristo's we'werra' na'jī:

⁴⁴Andyna jype'jsa Cristo's Dyusa' na'jīc:

Andy pucate patsu ju'ngte mcaach,

Indyna atsesaty indyrrarrána nwēese'jwa'ja's vitna jyā'pjcach jīc.

⁴⁵Tyā'wē Davidíiva Cristo's we'werra': Andyna jype'jsa jīnac cysusu' atsa' Cristo' ¿ma'wērra David nchi'c yuucy? jite', ⁴⁶quim yujva teech yuwerráava pasya' ājameeta', sa' tyajūyā'ja' peena yu' pējymeeta' quim yujva.

Fariseo vite' ley caapiya'jsawe'shtyi yuuwesa Jesus nviitni

(Mr. 12.38-40; Lc. 11.37-54; 20.45-47)

23 ¹Tyajū' Jesusa' na'jīnac we'we tyāa yacj u'jusawe'sh pety vite nasa yā'jrra:

²—Ley caapiya'jsa vite' fariseowe'sh tyāawe'sha' Moises leya's wala ew jiisa tyāa leya's nwēese'jwa'ja's jycaajsatja'w sūju'ty. ³Tyā'wēyā'tje', i'cue'sha' mwēese'jwe ley ewsa ma'wē jycaatje' tyāa yu'sa' jyuca. Nava tyāawe'sh na'wē yu' yūuna fi'nzenuwe. Tyāawe'sha' nasa yuutyi' leya's

nwēese!jwa!ja's jycaajrrava tyāawe'sh yu' leya's nwēese!je'tsmeeta'.
 4Tū'swa!j iiméj wala dujsa pjeu!ju'ty tyā'sa' quim yujva chjāchjameena.
 Tyā'wēsa'styi nasaty ctū'se!je', nava tyāawe'sh yu' le'chcuē cuseterrāa
 yujva at pu'chji'tsmeeta'. 5Maava uycajn sūjrra iiwejch iiwejch yajcyna
 āate yu' quījva yu'ty Dyusna yaaquitstja'w jīna. Tyāasaty Dyus jycaajni's
 etste fi'jrra cajate acjrra dyictjeuy vite' cusesu tundrra fi'nze'. Sa' nasa
 jiyuni fi'nzeya' sūjrra atjni ropava tjaacue jyu'jsa iijyūrraty fi'nze'. 6Fiesta
 yat-su pi'cyni u'jrra', cachni wejy ewsarrāanaty pacue' iiwejch yajcyna.
 Sa' judiuwe'sh pcjaacjenisuva tyā'wēytyi yu'. 7Clliecjunsu msuuva nasaty
 wala ewrrāa we'wena wechaa jytjāasnaty pecūju', caapiya!jsa jīna cysus
 jytjāasna.

8Nava i'cue'sha' tyā'wē caapiya!jsa jīna cysus jytjāasna fi'nzenuwe.
 Tyāa pa'gatey i'cue'sha' caapiya!jsamée maa yacjva jyuca pyacjsarrāai'cue,
 naasāa caapiya!jsa' teeche yuurráa ji'pji'cue tyā' Dyus caajni Cristo'.
 9I'cue'sha' naa quiwetewe'shtyi' quim yujnava tata jīna cysusnuwe, tyāa
 pa'gatey teeche Tata yuurráa ji'pji'cue tyā' cielute ūsa'. 10Sa' npiitstjēlj
 jype!jsa jīna cysus jytjāasnava fi'nzenuwe, tyāa pa'gatey Npiitstjēlj
 jype!jsa' teeche yuurráa ji'pji'cue tyā' Cristo'. 11Maatyva selpiina fi'nzerra
 yuurráa jytujtjesa yuune'cue. 12Tyā'wēme', maava peequírrāa walasatj
 sūjna iiwejch iiwejch yaacysa' ājmeecuēsa yuuna, nava ājmeecuesatj sūjna
 fi'nzesa' walasa yuuna.

13Ley caapiya!jsa vite' fariseowe'sh āaterrāa ew we'werra' ūuste
 yu' ewmeerrāa yaacysa, i'cue'sh yacja' seena' yuj ūucjūucja', tyā'wē
 Dyus jycaajnite u'cawa!ja's apja'i'cue maava u'cacajmén. Sa' vitesaty
 ca'ga!jmeerra', i'cue'shrrāa yujva u'catsmeel'cue, tyāa pa'ga ūucjūucja'.

14Ley caapiya!jsa vite' fariseowe'sh āaterrāa ew we'werra' ūuste yu'
 ewmeerrāa yaacysa, i'cue'sh yacja' seena' yuj ūucjūucja'. Viudawe'sh
 yattyi cusa!jrra tyāa cusa!jnity caapechcana!jya' sūjrra wala jyu'lj
 lisa'i'cue. Tyā'wē yūupa'ga i'cue'sha' jytjaacue Dyus castigāyni yuune'cue.

15Ley caapiya!jsa vite' fariseowe'sh āaterrāa ew we'werra' ūuste yu'
 ewmeerrāa yaacysa, i'cue'sh yacja' seena' yuj ūucjūucja'. Mtee mteeva
 pecūju'i'cue nasaty i'cue'sh ju'ngu tupjy wēerra i'cue'sh caapiya!jni's
 pta'shna. Nava nasaty cnayrra', tyāa nasaty! i'cue'sh ūswa!j infiernotey
 nviit-sa i'cue yu'.

16I'cue'sh yacja' seena' yuj ūucjūucja', jiimeerra na!jīna i'cue caapiya!ja'
 naa pa'ga: Puuty we'weni's cytey yu'nja jīrra dyuus yata'srrāa cysusna
 jurāyni's cytey yuumeeteva, quīj yuumeena. Nava dyuus yatte vyyu beja's
 cysusna jurāyni's yuurrá' cytey yuuwa!j yuja' jī'i'cue. 17Jiimée luucu
 we'wesa, Dyus dyi'pte' ¿quīj wejy jytjaacue ewsacy, vyyu beja' meerra'
 dyuus yata'? E'nzīi ¿Dyus jīrrarrāa meetyna'? 18Tyā'wēy na!jī'i'cue:
 Dyuus yatte altala'srrāa cysusna jurāynisa's cytey yuumeeteva, quījva
 yuumeena. Nava altalte cambwa!ja's cysusna jurāynisa's yuurrá' cytey

yuuwa'lj yuja' jī'i'cue. ¹⁹Jiimée luucu we'wesa, Dyus dyi'pte' ¿quǐj wejy jytjaacue ewsacy, dyuus yatte altala' meerra' altalte cambnisa'? E'nzǐ ¿Dyus jǐirráa meetyna'? ²⁰Maava dyuus yatte altala's cysusna jurāysa' tyā'srráana cysussa yu'tsme!. Altalte cambnisa'sva jyucac cysussa yu'. ²¹Tyā'wēy maava dyuus yata's cysusna jurāysa' tyā'srráana cysussa yu'tsme!. Cytee ūssa Dyus ityisa's cysussac yu'. ²²Tyā'wēy cielu's cysusna jurāysa' cielurráana cysussa yu'tsme!. Dyus jycaajna ūsni's jyucac cysussa yu' pety Dyus yā'jrra.

²³Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūcjūucja'. I'cue'sh ūsterráa yajcyrra caapiya'jrra', putatyjá' ma'c yuu meerra' me'sucue ma'c yuu comino ma'c yuu tyā'wēsaty diez ets ujderra' teech etsa's cutyi'ji'cue Dyus jī' jīna. Nava Dyus ley jycaajrra': Dyus dyi'pte ew fi'nzena, vite nasaty peeygājna, Dyusa's ūsuj jyuca yajcyna tyā'wē yūuwa'ja' jī'c tyāa isa jycaajni yu's cytey yu'tsmeei'cue. Nava na'wē Dyus jī' jī'i'cue tyāa yu' nviitwa'lj yu'me!. ²⁴Jiimée caapiya'jsa, fish le'chcuesa yuutyi' a'tsja'i'cue, nava camello walasa yu'sa' uymeerra jycjēeje'i'cue.

²⁵Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūcjūucja'. Vaso ma'c yuu meerra' plaatu ma'c yuu tyā'wēsaty ecaju yu' wala ew pcji'cji'i'cue, nava dyiicjē yu' vite jīity pesweerra ambnisarráa uta jī'pita'. ²⁶Fariseo jiyu'tsmeeng. Dyiicjē cjuē'y pcji'cywa'ja' vaso vite' plaatuty, cyaj ecajuva jyuca ate yuuna.

²⁷Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūcjūucja'. Uusáa pendani's cajcucjē pchiime'tje', zhichcuc vya!. Nava dyiite yu' uusáa dyi'tjrráa utac canzh putana ūsu!. ²⁸I'cue'sha' tyā'wēysa i'cue. Āacjē yu' nasaa dyi'pte wala ew na'wē tjengu'i'cue. Nava ūste yu' canzh ewmée yaacynisarráa uta ūsa'.

²⁹Ley caapiya'jsa vite' fariseowe'sh āaterráa ew we'werra' ūste yu' ewmeerráa yaacysa, i'cue'sh yacja' seena' yuj ūcjūucja'. I'cue'sha' ewcuē pjeu'jna nes yu' Dyus yuwe pta'shsa vite' nasa ewsa tyāawe'shtyi pendani' cafysu. ³⁰Sa' na'jī'i'cue: Cue'sh yatsgawe'sh fi'nzeni ente cue'sh ūsvatsa', cue'sha' icjwa'ljme'ntca'w yu' Dyus yuwe pta'shsatyī' jī'i'cue. ³¹I'cue'sha' Dyus yuwe pta'shsawe'shtyi icjsa nwe'shi'cue, tyāasa i'cue tyāa icjsawe'shtyi' cue'sh jī'j yatsgawe'sh jīna we'we'. ³²I'cue'sh yatsgawe'sh quǐjne'ta yūusa yu', atsa' i'cue'shva tyā'wēy yūuna nes yuune'cue.

³³Ul weeswée seena'sa jī'j, ¿ma'wē yūurra infiernote castigāywa'tje paljmée yuuqui'cue? ³⁴Tyā'wēsa yā'jī'cue na' i'cue'sha' maafityi' cluscjē qui'pna icjna, vitetyi's judiuwe'sh pcjaacjeni yatsu pāpana, vitetyi's ajtserra chjamb iisa icjya' pacuena nes yuucajn andya' caajya'vatj Dyus yuwe pta'shsa vite' quǐjteva wala jiisa vite' caapiya'jsa tyāawe'shtyi.

³⁵Tyā'wē Abela's icjnijūjy nasa ewsaty icjya' tacjrra Berequias nchi'c Zacariasa's Dyus altal pucate icji'cue tyāa entepcach icjnisaty i'cue'shrrarráa yuuwesa yuune'cue. ³⁶Isatj we'we' nyafitey icjnisaty's nasa naa ensuwe'sh tyā'wē yuuwesa yuutyna.

Jesusa' Jerusalena's tjengrra ũ'neni

(Lc. 13.34-35)

³⁷Jerusalente nasa, i'cue'sha' Dyus jycaajnisá tyajy yuwe's pta'shsawe'shtyi icje'i'cue, maaíityi' cuet wāatatajna. Manz usva pcjacjrra nwe'we wēetj i'cue'sh luuchtyi, atallva ma'wēga luuchcuētyi's fyuu cu'ta dyiite āshi' tyā'wēy, nava wa'li'cue. ³⁸Mwēese'jwe: i'cue'sh ũsni' tjengnimée neeyūuna. ³⁹Na'jī'tj na': peena yu' andya's uymeene'cue, Dyus tashu yuusa wala ewsa yuja' jīna we'wewa'j en ājpcach.

Dyuus yat ptsuwa'ja's Jesus pta'shni

(Mr. 13.1-2; Lc. 21.5-6)

24 ¹Dyuus yatu casejrra Jesusa' u'juetspcachja', tyāa yacj u'jusawe'sha' utyaarra we'wety dyuus yata's pta'shna. ²Atsa' Jesusa' na'wēc pas:

—Tyā'wē yuj seena' zhichcue wala'. Nava na'jī'tj na': jyuca ptsuuna, atsa' tyāa yattewe'sh teeche cuetrráa yujva quēese'jnimeesa yu' neeyūumeena jīc.

Naa quiwe ptsuwa'j en ājatste seena'sa vyaawa'j

(Mr. 13.3-23; Lc. 21.7-24; 17.22-24)

³Tyājū' Olivos vitsnaty u'j. Cytee pa'jrra Jesus cachrra u'pte', tyāa yacj u'jusawe'sh maafi yu' na'jīnaty we'we paatste:

—Meen peeta'sh, ¿bagach tyā'wē jyuca ptsuucy? Sa' iindy quīwa'j en vite' naa quiwe ptsuwa'j en ājatste', ¿quīj seena'sa vyaacy? jīte', ⁴Jesusa' pta'shcu:

—Mpa'yajcywe, i'cue'shtyi caypumba'jwe'shte. ⁵Tyā'wēme', wala pa'jatyna andy yase's cysusna na'jīna: Dyus caajnisá Cristotj jītyna, sa' tyā'wē yūurra wala caypumba'jatyna išhiina. ⁶I'cue'sha' wēse'jene'cue guerra msuu msuuva u'pa' jīni. Tyā'wē yūuteva i'cue'sha' ũucjnuwe, tyā' nmej en yu' me'. ⁷Gobierno' vite quiwete gobierno yacj puiityna, naapcachja' puuty jyul'j quiwe'jū pwe'shva puiityna. Tyā'wē mtee mteeva jyuca guerra quiiteena. Sa' wēje enva pa'jana, wee seena'sava pa'jana, ejndva seena'sa u'juetya mtee mteeva. ⁸Tyā'wē seena'sa pa'jrrava tyāa yu' nyafyte ũusya' tacjnisarráa yuuna.

⁹Tyājū' i'cue'shtyi uwerra ducjetyna pāpana icjcajn, sa' naa quiwete mteewe'shva jyucaysa atsetyna andy jycaajni's nwēese'pja'garráa.

¹⁰Tyā'wē yūute', maanzcuēesava Dyus tashu tyuteetya, sa' puuty

jajtsena vitesa uwerra icjwal'ja's vitutyna. ¹¹Wala îshiisa vyaatyna, andya' Dyus caajni yujtj jîna nasa maanzcuêesatyva îshiiyatyna. ¹²Sa' ewmée yûuna fi'nzewal'jrráa tyacue wala pa'tje', puuty ya'peeygâjna fi'nzewal' ju'sa' iviitutyna maanzcuêesava. ¹³Nava uu entepcach Dyus yacj tyutemée fi'nzesa' ewte neeyûutyna. ¹⁴Naapcachja' Dyus jycaajwal'ja's pta'shnisa' maa quiweteva jyuca pta'shni yuuna mteewe'shva jyuca jiyucajn. Tyâ'wê yûunijû nmej ensa pa'jana.

¹⁵Na'wê yûuwa'ja's jypa'yacy lëeyrra jii mfi'nzewe Dyus yuwe pta'shsa Daniela' pta'shna fi'cj dyuus yatte canzh ewmée yûuna pa'jwal'ja's. Atsa' tyâ'wê seena' canzhsa pa'jrra dyuus yatte u'catste uyrra', ¹⁶Judea quiwesuwe'shva jyuca ûpjna u'juene'cue vits walasu ûsya'. ¹⁷Sa' êe yat-su ûssava sa'jrra quijrránava cutyi'ljwal'j en ji'pjumeetyna. ¹⁸Tyâ'wêy mjii ejsu u'jusava tyajy atyja's nicyya' yatna u'ljwal'j enrâa yujva ji'pjumeetyna. ¹⁹Tyâa ente' u'ywe'sh nasa ji'pjsa meerrava luuch âpâcuê ji'pjsawe'sha' wala yuj pytjaa yuutyna. ²⁰I'cue'sha' Dyusa's mpêjywe tyâ'wê nus ente meerrava jycaase ente ûpjna u'ljwal'j yuucajmên. ²¹Tyâ'wê tyâa ente' seena' yuj wala ñuswa'j yuuna. Naa quiwe's pjeu'jiyna bagachte yujva tyâ'wêsa yu' iiu'pume', sa' tyâ'wêsa scjêwniijûyâ'ja' peena yu' u'pumeena tyâ'wêysa yu'. ²²Dyusa' en tyâ'wê seena'sa's tyachmée vitmeete yu', quim yujva îtyi neeyûumeetyna. Nava tyajy nasa tyjityjnisaty peeygâjrra, en tyâ'wê seena'sa's tyachmeerrâa vituna.

²³Maava i'cue'shtyi we'werra', mtjengwe Cristo ayte ûsa' jityna, meerrava cytee ûsa' jityna, nava tyâl'jini's nwêese'jnuwe. ²⁴Tyâa pa'gatey wala îshiisa pa'jatyna, andya' Dyus yuwe pta'shsatj sa' Dyus caajnisá Cristotj jityna, tyâ'wê quim yujva âjanimeesa's caavya'ja'jatyna caypumba'j wêerra. Tyâ'wê yûurra maaiityi' caypumba'jatyna Dyus tyjityjnisa yujtyva. ²⁵Tyâ'wê yûuwa'ja's pta'shyâ'tj i'cue'shtyi dyiicjêy. ²⁶Tyâa pa'ga nwêese'jmeene'cue macue tyâ'wê cytee ûsa' nasa u'pnimeete jîteva meerra' ay dyiite ûsa' jityna. ²⁷Tyâa pa'gatey Dyus Nchi'c Nasa Yuusáa quii ente', cpi'shva ma'wêga sec cãanijû cwejnerra' sec cjëenijûva vya' tyâ'wêyrrâa yuuna naa dundte jyucaysa dyi'pte. ²⁸Cacue uuniisa mcaa ûsteva cytee pcjaacjetya mēewējya' ū'ya'.

Dyus Nchi'c Nasa Yuusáa seena' zhichcue vyaana
(Mr. 13.24-37; Lc. 21.25-33; 17.26-30, 34-36)

²⁹Tyâ'wê seena' ñuswa'j en scjêuutspcachja', seca' chji'ndyina, atsa' a'te' cweetjmeena. Naapcachja' estrella ûshityna, êe walasu quij seena'sava jyuca quêese'jni yuutyna. ³⁰Tyâ'wê yûunijû', Dyus Nchi'c Nasa Yuusáa quiiwa'ja's caajiyu'jsa vyaana cieluju, atsa' naa quiwete nasa maanzcuêesava û'netyna Dyus Nchi'c Nasa Yuusáa tyâ'wê cieluju tâapj pyâjte seena' zhichcue vyaana yujte uyrra. ³¹Sa' tyajy angeleswe'shtyi

jycaajana seena' sus tujcarra tyajy tyjityjnisaty!' pccajcajn naa quiwetewe'sh mtee mteewe'shva jyucaysaty.

³²Naa ejemplo's pechcananuwe: higuera fytüu tasha' ets umburra qui' u'se yeetsutste uyrra', yünya'vateva jiyu'i'cue. ³³Tyä'wëy na'wë seena'sa vyaatste uyrra', jii mfi'nzewe, ptsuwa'j en utyaatste tyä'wë yuuna. ³⁴Isatj we'we', naa ensu nasa' uumey tyä'wë seena'saty uyuune'cue. ³⁵Cielu naa quiwe jyuca scjëuutyna, nava andy we'weni yu' cytey yuumey yu' scjëwmeetya.

³⁶Nava quíj ente quíj orate tyä'wë yüuwa'j yu'sa' quim yujva jiimeeta', cielute angeleswe'sh Dyus Nchi'c tyäawe'sh yujva, naasáa Dyus yuurráa jiaa'.

³⁷Noe enteva ma'wëga yuu tyä'wëyrráa yuuna, Dyus Nchi'c Nasa Yuusáa quíi enteva. ³⁸Tyáa ensu nasa' ícj utameyna yu' wala wechana üs'ty ü'na tundyna cambana Noe arcate u'capcach. ³⁹Sa' Dyus castigo's jiiimée üsí, ícj utate jyuca ptsuutsyá'jrrarráaty jiyu, tyä'wëyrráa jiyumeetya Dyus Nchi'c Nasa Yuusáa quíi enteva. ⁴⁰Tyáa ente' e'nz pitstj'ej mjiina ij üsutyna, atsa' teehsa's jyüna u'jni yuuna, nava vite's nviitni yuuna. ⁴¹Tyä'wëy e'nz u'y ij ü'cjna üsutyna, atsa' teehsa's jyüna u'jni yuuna, nava vite's nviitni yuuna.

⁴²I'cue'sha' jypa'yacy meswe. Tyä'wëme', quíj ente quíj orate Dyus Nchi'c quíiwa'jsateva jiimeei'cue. ⁴³Nava jypa'yacy meswe. Yat namuva ma'wë peswée quíj orate yujteva jiyurra' dejmée jypa'yacy ütjasna u'pucy yatte pesweecajmén, tyä'wëy myüuwe. ⁴⁴Tyáa pa'ga i'cue'shva jyuca pjeu'jrra meswe. Tyä'wëme', yajcymée üsiyna Dyus Nchi'c Nasa Yuusa' quíjrráa yuuna.

Selpisáa ewsa vite' ewmeesa

(Lc. 12.41-48)

⁴⁵Selpisáa ¿maa ewqui patron neewe'werra nvijtte cyte yattewe'shtyi cwëeje'jmée sã'jīwa'jsa? ⁴⁶Patron neewe'werra nviitni's jyuca cytey yuuna üste patrona' tjengna pa'tje', tyáa selpisáa yacja' wala yuj wecha yujna. ⁴⁷Isatj we'we': tyä'wë yüusa's patrona' tyajy jip'juni's jyuca neewe'werra nviituna. ⁴⁸Nava selpisáa ewmeesa' patron pa'jya' jytjëeyuuna süjrra ⁴⁹cyte vite selpisaaty pcyuuna tüusaawe'sh yacj tundyna ü'na yüuna üste', ⁵⁰yajcymée üsiyna patrona' quíj ente quíj orateva pa'jrráa yuuna. ⁵¹Sa' seena' wala ñus ñus castigáina tyä'wë yuwejurráa ew we'werra' üuste yu' ewmeerráa yaacsawe'shtyi na'wëy. Tyajüyã'ja' tyáa selpisáa ewmeesa' seena' wala pembeena qui'tjtyi csuusu'jna.

Diez cna'sa yacj caaja'nda'jni

25 ¹Dyus jycaajwa'j en äjte', na'wë yuuna: Diez cna'sava ma'wëta lampara aceite awniisa's atra boda yatna u'j novio's jypa'gaya',

tyā'wēy yuutyna. ²Tyāa cna'sawe'sh tajtssa' jypa'yacymeerra pjeu'jmeety u'j, sa' vite tajtssa' jypa'yacyrra jyuca pjeu'jrraty u'j. ³Tajtssa' ew ūs yajcymeerra', lampara yu'sa' jyūrra u'jrrava aceite yu' jyūmeety u'j ptsuute qui' awwa'j. ⁴Nava vite tajtssa' aceite jyūrraty u'j lamparatewe'sh ptsuute' qui' awwa'j. ⁵Novio pa'jya' jytjēyuuute', tyāawe'shtyi wala deewēe yuute' dejty. ⁶Tyajū' cuspyāj yuutste!, ptjūusec na'jīna sus we'weni: Novio yujyā'ja', atsa' jypa'gaya' myujwe jīni. ⁷Naapcachja' cna'sawe'sh cyanzíi quiiterra lampara's pjeu'jty. ⁸Atsa' tajtssa jypa'yacymée u'jsawe'sha' vite tajtssaty aceite tjāastyi: Le'chcuērráava peesune'cue. Tyā'wēme', cue'sh pqui'tanisa' ūchjatsa' jīnaty we'we. ⁹Nava cna'sawe'sh jypa'yacy pjeu'jrra u'jsa' na'wēty pas: Ūsme'nja'w. Tyā'wēme', cue'sh jīi yujva ājmée jī'ptja'w, atsa' i'cue'shtyi ūswa'j yu' wejy ājmeena. Wejy yuuva me'jwe weyya' jī'ty. ¹⁰Tyā'wē tajtssa jypa'yacymeerra aceite weyya' u'juetspcachja', ptamusá novio' pa'cj. Atsa' jypa'yacy ūytjāssawe'sha' boda yatte novio yacj u'catspcachja', vitya's apjtyi. ¹¹Tyāa e'suyā'jty vite cna'sawe'sh cūjrra: Meen pjaande jīna we'we. ¹²Nava pasrra': Isa, andya' i'cue'shtyi' jīimeetj jīc.

¹³I'cue'sha' jypa'yajcy meswe. Tyā'wēme', quīj ente quīj orate Dyus Nchi'c Nasa Yuusáa pa'jwa'ja's jīimeei'cue.

Mjīiya' ājawa'jsaty vyu's neewe'werra u'jni yacj caaja'nda'jni

¹⁴Teech pitstjē'jva ma'wēga vite quiwen u'juetsrra', tyā'sna selpisaawe'shtyi pa'yarra tyajy vyu's neewe'werra ūsrra u'j, tyā'wē yūuna Dyus jycaajwa'j en ājte'.

¹⁵Tyāa pitstjē'ja' selpisáa teechna's vyu tajts milcu ūs, sa' vite's e'nz milcu ūs, sa' vite's teech milcu ūs, teechna na'wērraj macuesa's shiingmée iijyūya' ājawa'jsateva tyacuerráac ūsrra u'j. ¹⁶Teech selpisáa tajts mil vyu jypa'gasa', tyāa vyu's cmāaji'jrra qui' vite tajts mil íic āj cnay. ¹⁷Tyā'wēy e'nz mil jypa'gasava qui' vite e'nz mil íic āj cnay. ¹⁸Nava teech milrráa jypa'gasa' patron vyu's cafi'jrra quiwetec pendáa.

¹⁹Patrona' wala tyachte qui' shawendna pa'jrra', tyāa selpisaawe'shtyi vyu ūsni's qui' pējycu. ²⁰Nyafyte' tajts mil vyu jypa'gasa' cjuē'y utyaana cūjrra qui' vite tajts mil íic āj caashwendu'j na'jīna patrona's: Indya' tajts milngu ūs, atsa' qui' vite tajts mil íitj cnay cmāaji'jrra jīte', ²¹patrona' na'wēc we'we: Indya' vyu'sa' psuwmeeng wala ew cmāaji'j. Tyā'wē le'chcuērráasanava psuwmeé cmāaji'pja'ga, wejy walasanava neewe'werra iindy cusete nviitu'nja. Āchja' me'ca andy yacj wechana ūsya' jīc.

²²Tyajū' vite selpisáa e'nz mil jypa'gasava cūjc na'jīna patrona's: Indya' e'nz milrráang ūs, nava tyā'sa' cmāaji'jrra qui' vite e'nz mil íitj āj cnay jīte', ²³patrona' na'wēc pas: Indya' vyu'sa' psuwmeeng wala ew cmāaji'j. Tyā'wē le'chcuērráasanava psuwmeé ewngu cmāaji'pja'ga āchja' tyāate jytjaacue walasanava nviitu'nja iindy cusete. Me'ca andy yacj wechana

ũsya' jïc. ²⁴ Tyajũ' teech milrráa jypa'gasava cūjc patrona's na'ljina: Indya' wala weesweeteva jiiť, sa' iindy uutjashmeesuva jyucang pcjacje' quiřva ujmeerrava. ²⁵ Tyāa pa'ga ũcjrra iindy vyyu's jyaawťju quiwete pendaarra. Nava āchja' ducjetstju indy macuene'nga ũs tyā'sa' jite', ²⁶ patrona' na'wēc pas: Indya' seelpimée watycuēng. Andya' tyā'wē juuna'rra quiřva ujmeerrava vite jiiťy pcjacjsateva jiiť j'i'ng na', ²⁷ ĩmjitenga andy vyyu's bancoga jyaawmée tyāate jytjaacuecuē nuypejnarra caashwendu'jya'? jirra', ²⁸ cytee ũssaty na'wēc jycaaj: Tyāa pitstjē'j vyyu mil ji'pjsa's cusa'jrra diez mil ji'pjsa's meswe. ²⁹ Tyāa pa'gatey ji'pjsa's jwee'irráa jytjaacue ũswa'ja' wala ji'pjucajn. Nava ji'pjmeesa's jyuca cusa'jwa'ja' le'chcuerráa ji'pjuni'sva. ³⁰ Sa' tyāa pitstjē'j seelpimeesa's uwerra ecaju chji'ndy walate macjwe. Cyte' seena' yuj pembeena qui'tjtyi csuusujna ũswa'ja' jïc.

Naa quiwetewe'shtyi jyuca ewsaty fii tyundeni

³¹ Dyus Nchi'c Nasa Yuusa' jycaajsa yuurra angeleswe'sh cshavyte quiřrra tyajy jycaajwa'tje cachjiina. ³² Tyajũ' nasa' naa quiwete mtee mteewe'shva jyuca pcjacjetyna tyajy tashte, atsa' teehsa na'wērraj tyjityjrra tyundena, piisháa-tjengsava ma'wēga fii tyundé' piisháa vite' caplaty tyā'wēy. ³³ Sa' piishaaty' patsu ju'ngu tyajrra', caplaty' jembu ju'ngu tyajana. ³⁴ Tyā'wē yuurra jycaajsa' we'wena patsu ju'ngu ũssaty' na'ljina: Andy Tata peeygāanisa, i'cue'sha' myujwe tyā'wē naa quiwe's vityyna i'cue'sh jycaajwa'j pjeu'jni ũsa' tyā'sna jypa'gaya'. ³⁵ Tyāa pa'gatey i'cue'sha' andya's sālji i'cue wēena u'jute'. Sa' yū'wēena u'jute', yusi'cue. Nasa ecajuwe'sh na'wē u'jute', deewa'j pqui'ji'cue. ³⁶ Atjwa'j ropa ji'pjmée u'jute', ropa ũsi'cue. Uuya' ũste', tjengya' pa'ji'cue. Carcelte ũste', cyteeva tjengya' pa'ji'cue jite', ³⁷ nasa ew yūusa' na'ljityna: Indya' ĩbagach wēena u'jutetca'w uyrra ũ' puuts? ĩBagach yū'wēena u'jutetca'w tundywa'j ũs? ³⁸ Indya' ĩbagach tyā'wē ecajuwe'sh na'wē u'jute uyrratca'w deewa'j pqui'j? ĩBagach tyā'wē ropa ji'pjmée u'jutetca'w ropava ũs? ³⁹ ĩBagach ātsa'na ũstetca'w tjengya' pa'j? ĩBagach carcelte ũstetca'w cyteeva tjengya' pa'j? jityna. ⁴⁰ Atsa' jycaajsa' na'wē pasuna: Isatj we'we', andy yacjtjē'jwe'sh macue wala pyťjaa ājmeecuesarrava ayte ũsta' tyāaty tyā'wē yūusa' andyna pu'chsarra i'cue tyā'wē yūu jina.

⁴¹ Tyajũ' jembu ju'ngu ũssaty' jycaajsa' na'ljina we'wena: Andy tashu mtyuteewe, i'cue'sha' ewmeetewe'sh yā'ji'cue. Tyāa pa'ga echtjē'j jii echtjē'j angeleswe'sh jii pjeu'jni ũsa' infierno ipy wala cytee mel'jwe jina jycaajana. ⁴² Tyā'wē andy wēena u'juteva, puutsmeei'cue. Yū'wēena u'juteva tundywa'j ũsmeei'cue. ⁴³ Nasa ecajuwe'sh na'wē u'juteva, deewa'j pqui'jmeei'cue. Ropa ji'pjmée u'juteva, atjwa'j ũsmeei'cue. Ātsa'na ũsteva, tjengya' pa'jmeei'cue. Sa' carcelte ũsteva, cyteeva tjengya' pa'jmeei'cue jite', ⁴⁴ tyāawe'sha' na'wē pasutyna: Indya' ĩbagach wēena u'jutetca'w puutsmée? ĩBagach yū'wēena u'jutetca'w tundywa'j ũsmée? ĩBagach

ecajuwe'sh na'wẽ u'jutetca'w deewa'l pquij'mée? ¿Bagach ropa ji'pjmée u'jutetca'w atjwa'l ũsmée? ¿Bagach ätsa'na ũstetca'w tjengya' pa'jmée? ¿Bagach carcelte ũstetca'w cyteeva tjengya' pa'jmée? jityna. ⁴⁵Atsa' jycaajsa' na'wẽ pasuna: Isatj we'we', naa nasa pytjaa äjmeecuēsaty quijte yujva pu'chmee'cue na' andyna pu'chsameerrai'cue tyā'wẽ yuu jina. ⁴⁶Tyāa pa'ga ew yūusame' infierno ipy ptsuwa'jmeete cjēeya' u'juetyna, naapcachja' ew yūusawe'sha' bagachteva ptsuwa'jmée ityi fi'nzewa'ja's ji'pjutyna.

Jesusa's icjwa'ja's puuty we'weni
(Mr. 14.1-2; Lc. 22.1-2; Jn. 11.45-53)

26 ¹Jesusa' tyā'wẽ pta'shna jyā'jrra', tyāa yacj u'jusawe'shtyi na'jīnac we'we:

²—I'cue'sha' jii i'cue Pascua fiesta äjya' e'nz enrrāa yā'j peejya', atsa' tyāa ente' Dyus Nchi'c Nasa Yuusa's uwerra ducjni yuuna cluuscjē a'cyrra icjajcn jīc.

³Tyāa entey sacerdote npiitstjē'jwe'sh, ley caapiya'jsawe'sh, judiu ntjē'jsawe'sha' pcjaacjety sacerdote npiitstjē'j Caifas yat patyute, ⁴sa' tyāawe'sh pwe'sh puuty we'wety nasa jiyunimeete paatste Jesusa's uwerra icjya'. ⁵Tyāasaty fiesta ente yu' tyā'wẽ icjya'mée puuty we'we nasa wala suscajmen.

Aceite pa'gasa's teech u'y Jesus dyictjecjē awni
(Mr. 14.3-9; Jn. 12.1-8)

⁶Tyāa ensu' Jesusa' Betania chjambte Simon wā'jy weeju catyjisa yatted ũsu'. ⁷Atsa' teech u'y utyaana cūjc aceite wēt putasa's frascote uta awniisa wala pa'gasa's atrra. Sa' Jesus cachrra u'pte', tyajy dyictjecjēc jyuca aw.

⁸Tyā'wẽ yūuni's Jesus yacj u'jusawe'sh uyrra', na'jīnaty ũuscha we'we:

—¿Tyacue yuja' wala psuwmañ? ⁹Tyā'wẽ yūupcachte wejyva pa'gate tyweyrra tyāa vyu's puuplesaty peesvatsne' wejy ew yu' jīte', ¹⁰Jesus wēse'jrra' na'wēc we'we:

—¿Quijcue cuch susu' naa u'ya's? Na'wẽ yūunisa' psuwnisame'.

¹¹Puuplesa' bagachteva i'cue'sh yacj nes yuutyna. Nava andya' i'cue'sh yacj nes yuuwa'jsameetj. ¹²Naa u'y andy cacuecjē aceite wēt putasa's awcu, nava andy uute pendaawa'ja's pjeu'jnarrāac tyā'wẽ yūu. ¹³Isatj we'we': Naa quiwete mtee mteeva Dyus yuwe's pta'shna pecūjsa' naa u'y tyā'wẽ yūuni'sva ja'nda pta'shni yuuna pechcanamée jīc.

Jesusa's preesu'jwa'ja's Judas ũus yaacyni
(Mr. 14.10-11; Lc. 22.3-6)

¹⁴Tyājū' Jesus yacj u'jusa docesatewe'sh Judas Iscariote yaasesa' sacerdote npiitstjē'jwe'sh yacj puuty we'weya' u'jrra ¹⁵tyāawe'shtyi na'jīc:

—Jesusna uwerra ducjte! ¿manz deweequi'cue? jíte!, tyāawe'sha' treinta vyuty deweya' neeyūu. ¹⁶Tyājū! Jesusa's ma'wē yūurra tyāawe'sh cuseté ducjya' ājawa'ja's wala pacuec.

Jesusa' docesawe'sh yacj nmej ū'ni

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Pan levadura ji'pjmée ū'ni fiesta en ājatste!, Jesus yacj u'jusawe'sha' tyajy tashte utyaarra na'wēty pējy:

—Pascuate ū'wa'ja's ¿mteenga pjeu'lj jytjāasu'? jíte!, ¹⁸na'wēc jycaaj:

—Jerusalenna me'ljwe, cytee teech pitstjē'ja's jii i'cue tyā'sna na'ljīne'cue: Cue'shtyi caapiya'jsa' na'ljīnac yuwe caaj: Andy uuwa'lj en utyaac, atsa' iindy yatte Pascua's yu'scjēwya'vatj andy yacj u'jusawe'sh yacj jīne'cue jíte!, ¹⁹tyāa yacj u'jusawe'sha' Jesus jycaajni's cytey yuuty, sa' ū'wa'ja's pjeu'ljty.

²⁰Tyājū! jyuca chji'ndyitste!, Jesusa' docesawe'sh yacj cachcu mesate ū'ya!. ²¹Sa' ū'na u'prra', na'wēc we'we:

—Isatj we'we!, i'cue'sh yacj u'jusa teehsa' andya's atsesawe'sh cuseté ducjya'va' jíte!, ²²tyāawe'sha' wala ñusrra paapējytyi teech teehrraj:

—¿Andy ma'tj? jīna. ²³Atsa' Jesusa' pta'shcu:

—Maa tyā'wē andy yacj ja'ndarra'j cuse's acjena plaatucjē tyāa tyā'wē andya's atsesawe'sh cuseté ducjwa'jsa'. ²⁴Dyus Nchi'c Nasa Yuusa' ma'wē uuwa'jsateva Dyus librute pta'shi'c tyā'sa' cytey yuuya'va'. Nava andya's atsesawe'sh cuseté ducjsa' ¡seena' yuj ñuste cjējena! Tyāa pitstjē'ja' naa quiwete wejy yuuva upymeevatsne' wejy ew yu' jíte!, ²⁵Judasa' pējycu:

—Meerra! ¿andyvá'ntcacy? jíte!, Jesus pasrra!:

—Indyīng jīc.

²⁶Ū'na u'prra!, Jesusa' pana's jypa'gana'va Dyusa's wecharra pe'ltendec, sa' tyāa yacj u'jusawe'shtyi ūsu'scu na'ljīna:

—Mē'we, naa pana' andy cacue na'wēsa' jīrra!, ²⁷vaso'sva jypa'gana'va Dyusa's wecharra tyāawe'shtyi ūscu na'ljīna:

—Jyucaysa mtundywe naa vasotewe'sha's. ²⁸Naa vasotewe'sha' andy ee na'wēsa!. Dyusa' maanzcuēesa pcaltyiva cjūcjrna nwe'wewa'ja's vitcu, nava andy eeal's pcawrra yuurráac tyā'wē nwe'wewa'ja's vit.

²⁹Nava na'ljī'tj na': āchjūyā'ja' peena yu' tundyme'nja naa uva yu'a's, naasáa andy Tata jycaajwa'lj enterráa yā'lj qui' i'cue'sh yacj pcjaacjerra tundyi'nja jīc.

Pedro íshiiwa'ja's Jesus pta'shni

(Mr. 14.26-31; Lc. 22.31-34; Jn. 13.36-38)

³⁰Tyājū! Dyusna wechana memna jyā'ljrra!, u'ljty Olivos tjā'lj vitsna.

³¹Atsa' cytee pa'ljrra!, Jesusa' na'ljīnac we'we:

—Naa custe! i'cue'sh jyucaysa andyrráana nvijtrra tyuteene'cue. Tyāa pa'gatey tyā'wē yūuwa'ja's Dyus librute na'jī'c: Piisháa-tjengsa's icjte', piishá' jyuca ūpjuutyna jī'c. ³²Nava andya' uurrava qui' ityi yuurra' i'cue'sh yatste u'jue'nja Galilean jīte', ³³Pedro' na'wēc pas:

—Macue vite yu' indyrráana nvijtrra tyuteeteva, andy yu' tyā'wē yūume'nja jīte', ³⁴Jesus pasrra':

—Isatj we'we', naa custe atall we'wemeyna indya' Jesusa's jiimeetj jīna tecj us ishijane'nga jīte', ³⁵Pedro' na'wēc we'we':

—Macue indy yacj ja'ndatey uuwa'jma'c casej, nava indya's jiimeetj jīna yu' īshiime'nja.

Atsa' tyāa yacj u'jusawe'sh jyucaysa tyā'wērrarráaty we'we.

Jesusa' Getsemanite Dyus yacj puuty we'weni

(Mr. 14.32-42; Lc. 22.39-46)

³⁶Tyajū' Jesusa' tyāa yacj u'jusawe'sh yacj Getsemaní yaasesate pa'jrra', na'wēc we'we:

—Ayte mcaachwe, naapcachja' andya' Tata yacj puuty we'weya' u'juetstju jīrra', ³⁷Pedro vite' Zebedeo nchi'c e'nzsaty pe'jrrac u'j. Sa' ūuste wala ñus ūusutjete', na'jīc:

³⁸—Tyacue wala pytjaa yuurra uuwa'ja's yajcyte', wala ñus yuja'. Atsa' i'cue'sha' aytee neeyūorra dejmée jypa'yacy me'pwe andy na'wēy jīrra', ³⁹Jesusa' jyu'jmée u'jrrarráa tycaa pquipja weterra Dyus yacj puuty we'wec na'jīna:

—Tata, indya's ewuwechte', andya's meen nwe'we tyacue wala pytjaa yuuwa'ja's jypa'gacajmen. Nava andy jytjāasni yu'sa' cytey yuumeerrava, iindy jytjāasnirrá's cytey meen yūu.

⁴⁰Tyajū' Jesusa' qui' shawendcu Pedrowe'sh tashtey, sa' dejna ūste yurra' na'wēc we'we Pedro's:

—Andy yacj jypa'yacy dejmée ūsya' ājameevá'cue teech orarráava. ⁴¹Ewmeete weteya'mée jypa'yacy dejmée me'pwe Dyus yacj puuty we'wena. I'cue'sha' ūusuj yu' chjāchjai'cue yaaqui', nava i'cue'sh cacue yu' chjāchjatsme' cytey yuuya'.

⁴²Tyajū' Jesusa' qui'quin u'jrra', na'jīnac Dyus yacj puuty we'we:

—Tata, tyacue wala pytjaa yuuwa'ja's yu'ptjeja' ewuwechmeete', iindy jytjāasni cytey yuuvatsrráa ewna jīrra', ⁴³Pedrowe'sh tashte qui' shawendrra', tyāawe'sh yafy chjāchjameete qui' dejna ūstec uy.

⁴⁴Sa' nyafii na'wēyrráa we'werra tecj usva qui' u'cj, Dyus yacj puuty we'weya'. ⁴⁵Tyā'wē yūurrac Pedrowe'sh tashna shawendna cūjrra', na'wē we'we:

—Āchj yuurrá' mdejujūiwe jycaaseya'. Dyus Nchi'c Nasa Yuusa's pcalsawe'sh cusete ducjwa'j en ājc. ⁴⁶Atsa' quiiterra u'juega. Andya's atsesawe'sh cusete ducjwa'jsa' yujyā'ja' jīc.

Jesusa's preesu'jni

(Mr. 14.43-50; Lc. 22.47-53; Jn. 18.2-11)

⁴⁷Jesús cytee we'wena nee ūsiyna, Judasa' pa'cj. Tyā' docesatewe'shíírrác yu'. Atsa' tyāa yacj nasa wala cuj pa'jty cchill vite' fytū atrra. Tyāawe'sha' sacerdote npiitstjē'jwe'sh vite' judiu ntjē'jsawe'sh jycaajnisaty yu'. ⁴⁸Judasa' na'jīnaga yu'cywe'werra pe'jna yuwé' Jesusa's tundcajn:

—Ma'sna dyi'pte andy wecha'nja tyā'sna tundrra jyūna u'juene'cue jīnaga we'we.

⁴⁹Tyāasac Jesús tashte utyaarra na'wē we'we:

—Cue'shtyi jype'jsa jīna'va wechac.

⁵⁰Atsa' Jesusa' na'jīc:

—Namicu, ¿qui'jya' yujnga? jītspcachja', tundtyi jyūna u'jya'.

⁵¹Tyā'wē tundutspcachja', Jesús yacj pi'cyna u'jusa tee'cha's cchilla's jycuutyi'jrra sacerdote npiitstjē'ja's selpisáa tjū'wē's spē'tjcu. ⁵²Atsa' Jesusa' we'wec:

—Iindy cchilla's mjyaaw. Tyā'wēme', jyucay maava cchilluj puiisa', cchillteyrráa uuwa'jsata'. ⁵³Andy Tata's maanzcuēe angeleswe'shva



(San Mateo 26.52)

andyna nwe'wewa'jsa pějyete', cytey yuuna sūju'tsmeevá'nga. ⁵⁴Tyā'wě pějyete', cytey yuuyujuna, nava Dyus librute' nyafiitey pta'shni yā'cj yu' āchj na'wě tundutsta' tyā' cytey yuucajn, atsa' nwe'wewa'jsa pějyme'nja.

⁵⁵Tyā'jīrra' tundsatytcu we'we:

—Andya' pesweetjas i'cue andya's tundya' cchill pety fytū atrra pa'j. Andya' caapiya'jya' een isatj dyuus yatte i'cue'sh cshavyte nes yu'. Nava tyagachjī yu' tundmeei'cue. ⁵⁶Nava Dyus yuwe pta'shsawe'sh fi'jrra nviitni cytey yuucajnrrāa tyā'wě yuutsa' jic. Naapcachja' Jesus yacj u'jusawe'sha' tyā'srrāana nvijtrra jyuca ūpjna u'jty.

Caifas tashte Jesusa's cuutya'jni

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷Atsa' Jesusa's tundrra jyūna u'jty sacerdote npiitstjē'j Caifas tashte. Cyteea' ley caapiya'jsa vite' judiu ntjē'jsawe'sh tyāawe'shtyi pcjaacjerra ūs yu'. ⁵⁸Atsa' Pedro' e'ste jyul'j neeyūrrac yujna ūsu', sacerdote npiitstjē'j yat patyute u'capcach, sa' cytee policiawe'sh yacj cachrra neeyūuc quīj yūuteva uyya'.

⁵⁹Naapcachja' sacerdotewe'sh, judiu ntjē'jsawe'sh vite' jyucay cytee pcjaacjerra ūssawe'sha' Jesusa's quicje'jya' sūjrra quījrrāava īshiiwa'jsa pacue'ty. ⁶⁰Macue nasa maanzcuēesa quījrrāava pta'shna cūjteva, īshiinirráac caseje'. Nava nmejte' e'nz nasa īshiisa cūjrra na'wēty pta'sh:

⁶¹—Naa pitstjē'ja' na'jī'c: Andya' naa dyuus yata's pētyrra tecj ente' qui' tyaja'nja jī'c jīna pta'shte', ⁶²sacerdote npiitstjē'ja' quiiterra Jesusa's na'wēc we'we:

—¿Quīj yūurranga ma'wērrāava pasu'tsmée? Meerra' ¿isa yuj tyā'jīvá'nta? jīteva, ⁶³Jesusa' pasme'. Atsa' sacerdote npiitstjē'ja' na'wēc we'we:

—Dyus ītyisa dyi'pte jurāyrra isasarrá's mpeeta'sh. Indya' ¿Cristo Dyus Nchi'c dyijngá'? jīte', ⁶⁴Jesus pasrra':

—Indya' isang we'we'. Andya' i'cue'shtyi na'jī'tj na': Dyus Nchi'c Nasa Yuusa's uyuune'cue Dyus pucate cachrra u'pte sa' cieluju tāapj pyājte quījsteva uyuune'cue jīte', ⁶⁵sacerdote npiitstjē'ja' ūsacharra peecy atjni ropa's sundec na'jīna:

—Naa pitstjē'ja' tyajy yuweju yuu atsewe'wec Dyusa's, atsa' ¿quījya'rrāa testigo jwee pejiicytja'w? Tyajy atsewe'weni's i'cue'shīiva wēse'ji'cue. ⁶⁶Sa' āchja' ¿maa sūju'cue? jīte', tyāawe'sha' na'wēty pas:

—Tyā' yuuwesa', tyāa pa'ga icjwa'j yuuna jīty.

⁶⁷Tyājū' Jesus dyi'pte fyne'sh avytjetjrra uyiity, atsa' vite' dyi'ptety uca'ca na'jīna:

⁶⁸—Indya' Cristo dyijrra', mjiyu quimga dyi'pte ujca.

Jesusa's jiimeetj jīna Pedro we'weni
(*Mr. 14.66-72; Lc. 22.56-62; Jn. 18.15-18, 25-27*)

⁶⁹Tyā'wē yuutspcachja', Pedro' ecaju patyutec cachrra u'pu'. Atsa' teech cna'sa selpisáa utyaana cūjrra na'wēc we'we:

—Indyva Jesus Galileajuwe'sh yacj u'jusang jīte', ⁷⁰Pedro' jyucaysa dyi'pte:

—I'cue we'weni's jiimeetj jīnac īshii.

⁷¹Tyājū' Pedro' vityte casejna u'juetspcachja', vite cna'sa selpisaava uyrra' cytee ūssaty na'wēc pta'sh:

—Naa pitstjē'jva Nasarettewe'sh Jesus yacj u'jute uytju jīte', ⁷²Pedro' qui' īshiic jurāyna:

—Tyāa pitstjē'ja's andya' jiimeetj jīc.

⁷³Tyachmeynarrāa cytee ūssawe'sh Pedro tashte utyaarra na'wēty we'we:

—Isa, īshiimée indyva tyāawe'sh yacj u'jusang. Tyā'wērraíi iindy we'weni' peendame' jīte', ⁷⁴qui' jurāyrra na'wēc we'we:

—Tyāa pitstjē'ja's jiimeetj, isa Dyus uyte.

Tyā'jīna ūspcachja', atall we'wec. ⁷⁵Atsa' Pedro' yajcyu Jesus na'jīna we'weni's: Atall we'wemeyna, indya' tecj us īshiiiane'nga jiimeetj jīni's. Tyā's yajcyrra', Pedro' eca casejrra seena' wala nūsna ū' nec.

Jesusa's Pilato cusete dućjni
(*Mr. 15.1; Lc. 23.1-2; Jn. 18.28-32*)

27 ¹Tyājū' cјicјyna sējetste', sacerdote npiitstjē'jwe'sh vite' judiu ntjē'jsawe'sh tyāawe'sha' puuty we'wety Jesusa's quiićje'jya'. ²Sa' tundra jyūna u'jty ne'jue'sh Poncio Pilato tashte cuutya'jya'.

Judas uuní

³Jesusna cuuwe'јsa Judasa' Jesusa's icјwa'ј vitni's jiyurra', iiméj wala nūsca. Tyā'wē yūumeevatsa' ewne' yu' sūjrra treinta vyutyi' caashwendu'јya' u'ćј sacerdotewe'sh vite' judiu ntjē'jsawe'sh tashna na'јīna:

⁴—Andya' ājmeetj yūu, tyā'wē pitstjē'ј quijteva yuuwemeesa's icјcajn cuuwe'јja'ga jīte', tyāawe'sha' na'wēty pas:

—Cue'sha' ǀjiitca'wá'? Tyā'wē yūusa indy jiine'nga јīrra јypa'gameete', ⁵Judasa' tyāa vyu's dyuus yatte wāataјna'va u'јrra ya'јytјјuccu.

⁶Tyā'wē yūute', sacerdotewe'sha' tyāa vyu's pćјacјrra na'wēty puuty we'we:

—Naa vyu's ofrenda cajate acјya' āјame'nja'w. Tyā'wēme', nasa's quiićje'јni vya' naa pa'ga јīrra', ⁷tyāa vyuju mityj umsáa quiwe'styi wey, nasa ecaјuwe'sh pa'јrra uusaaty pendaawa'ј. ⁸Tyāa pa'ga āchpcach

tyāa quiwe' ee pcawnisa quiwe' jī'ty. ⁹Atsa' Dyus yuwe pta'shsa Jeremias we'weni cytey yuuc. Tyā' na'wēc we'we: Israelwe'sh macuetene'ta tyweyya' puuty we'we tyāa treinta vyyu's jypa'garraty ¹⁰mityj umsāa quiwe's wey, Dyusa' andya's jycaacj quiwe weycajn tyā'sa' cytey yuuty jīnac fi'j.

Jesusa's Pilato pēyni

(Mr. 15.2-5; Lc. 23.3-5; Jn. 18.33-38)

¹¹Jesusa' ne'jue'sh tashte jyūna u'jnic yuu, atsa' tyā' na'jīnac pējy:

—Indy vāa tyā'wē judiuwe'shtyi jycaajsane'nga jīte', Jesus pasrra':

—Indya' isang we'we'. Andya' tyā'wēsafītj jīc.

¹²Tyājū' sacerdotewe'sh vite' judiu ntjē'jsa tyāawe'sha' Jesusa's ewmeesang jīna we'wete', Jesusa' pasu'tsme'. ¹³Atsa' Pilato' na'wēc we'we:

—Indya's na'wēty quījteva jyuca ewmeesa' jīna yuwe ūsu' atsa' wēse'jetsmeevá'nga jīteva, ¹⁴Jesusa' quījva pasme'.

Jesusa's icjwal'j vitni

(Mr. 15.6-20; Lc. 23.13-25; Jn. 18.38-19.16)

Tyā'wē pasmeete', ne'jue'sha' ma'wē yūuya'rrāa yujva ājameerra', na'wē yūuya'c yajcy. ¹⁵Fiesta ensu' ne'jue'sha' teech preesu tyjweete'c ma'sna nasa pēyityna tyā'sna. ¹⁶Atsa' tyāa fiesta ensu' teech preesu jytyjtjesa ūsu'c Barabas yaasesa. ¹⁷Cyajc Pilato' na'jīna pējy tyāawe'sh pcjaacjerra ūssaty:

—I'cue'sha' ¿quimnacue tyjweete jyjtjāasu'? ¿Barabasma', meerra' Cristo jī'i'cue tyā'sna vāa caatyjweete'je'nja?

¹⁸Tyā'wē Jesusa's ajtserra tyajy tashte ducjteva jiyurrac tyā'jī.

¹⁹Pilato' jycaajna u'pnite u'pte', tyajy nyua' na'jīnaga yuwe caaj: Tyāa pitstjē'j yuuwemeesa yacja' cuch yuumeena. Tyā'wēme', āchj cus iimēj seena' ūucjūucj csha'wtju tyāa pitstjē'j ma'wē yūuwa'jsateva.

²⁰Tyā'jīna pta'shteva, sacerdotewe'sh vite' judiu ntjē'jsa tyāawe'sha' nasaty cnaytyi yu'cywe'werra, tyā'wē Barabasa's tyjweeterra Jesusa's quicje'jwal'ja's pēycajn. ²¹Tyā'wēteva, ne'jue'sha' qui' pējycu na'jīna:

—Naa e'nzsaty' i'cue'sha' ¿ma'snacue caatyjweete'j jyjtjāasu'? jīte', tyāawe'sha' na'wēty pas:

—Barabasma metyjwete jīte', ²²Pilato we'werra':

—Barabasa's tyjweeterra', naa Jesusa's Cristo jī'i'cue tyā'sa' ¿quīj yūutca? jīte', jyucaysa pasrra':

—Cluuste mcaafyutsu'j jī'ty.

²³Atsa' Pilato' na'wēc pējy:

—¿Quījga ewmēe yūu? jīte', tyāawe'sha' qui' sus we'werra':

—Cluuste mcaafyutsu'j jī'ty.



(San Mateo 27.29)

²⁴Tyajū' Pilato' quíjva yūuya' ājanimeeterráa nasa' jweefírráa seena' wala suste', yu' jyūucaajrra nasaa dyi'pte tyajy cuse'chechac na'jína:

—Naa pitstjē'j quíjteva yuuwemeesa's icjni's andya' yuuwemeesatj. Tyā'sa' i'cue'sh pasune'cue jíte', ²⁵nasa jyucaysa we'werra':

—Tyā'sa' cue'sh luuch yā'jrra jyuca paswa'jsatja'w jī'ty. ²⁶Tyajū' Pilato' caatyjweete'cj Barabasa's, nava Jesusa's caapechucue'jrra cluuste fyutscajn ducju.

²⁷Tyā'wē yūute', soldauwe'sha' ne'jue'sh u'pnite ca'ga'jrra, soldauwe'sh jyucaysaty pa'yarra Jesusa's jyuca cytandrraty yuju. ²⁸Tyajū' csūupi'jrra atyj bejsaty caatje'j. ²⁹Sa' tsjūtsja's corona na'wē vitrra dyictjete qui'ptyi. Patsu cuseju yu', fytūu zunzcuēty caatu'j. Tyā'wē yūurraty tyajy tashte peejyūcue:

—Judiuwe'shtyi jycaasatj jī'ne'nga jína weechna. ³⁰Sa' fyne'sh avytjetjna fytū's cusa'jrra, dyictjegaty pecue'cue. ³¹Tyā'wē Jesusa's

weechna jyā'jrra', tyāa atyj bejsa's csūupi'jrra Jesus ropa's qui' caatje'jty. Tyā'wē yūurraty cluuscjē fyutsya' jyūna ul'.

Jesusa's cluuste fyutsni

(Mr. 15.21-32; Lc. 23.26-43; Jn. 19.17-27)

³² Tyajū casejna u'juetsrra', teech pitstjē'j Cirenejūwe'sh Simon yaasesa yacjtyi pu'jycjēw. Sa' Jesus yacjni cluusa's tyā'snaty cyaacje'j.

³³ Tyā'wē yūurraty pa'j teech ajte Golgota yaasesate. Tyāa yu' Uusá Dyictjé Dyi'tjrráasa jīni'. ³⁴ Cyteea' vinote yaasa's awrraty Jesusa's yus wēe. Nava tyā'sa' yuwete isarrarráa tundyme'.

³⁵ Cluuscjē a'cyrra', soldauwe'sha' suerte caajty Jesus atjni ropa's maa soldau cnayteva jiyuya'. Dyus yuwe pta'shsa' na'jīnac we'we tyā' cytey yuuc: Suerte caajrra andy ropa's tyundeendety tyāawe'sh pwe'sh jīnac we'we. ³⁶ Tyā'wē yūurraty cytee tjengna cach. ³⁷ Sa' tyajy dyictjé cacuey fi'jrra qui'ptyi quīj yūsate icjrrava na'jīna pta'shna: Naaí Jesus Judiuwe'shtyi Jycaajsa' jīnac fi'jni yu'.

³⁸ Sa' Jesus pucacjē pdyi'ptyi e'nz pesweety qui'pni yuu cluuscjē. ³⁹ Atsa' cluus tashuy uycjēwsa' na'jīnaty wēeshu' dyictjeety caawūjna:

⁴⁰—Dyuus yata's pētyrra tecj ente' qui' quiissatjē'j, indya' ya'menwe'we. Dyus Nchi'c dyijrra', cluusuj msal' jī'ty.

⁴¹ Tyā'wēy sacerdotewe'sh, ley caapiya'jsawe'sh, fariseowe'sh, vite' judiu ntjē'jsawe'sh tyāawe'sh pwe'sh na'jīnaty weech we'we':

⁴²—Vite yuutyi' nwe'wec, nava peequí yu' ya'nwe'weya' āja'tsme'. Israelwe'shtyi Jycaajsa dyijrra', cluusuj sa'jana ats yuurráa ishijja'tsmeega sūju'nja'w. ⁴³ Dyus Nchi'ctju jī'c na' Dyusnane' neewe'we', atsa' tyā'sa' āchjīi Dyusa' nwe'wena, nwe'weya' ājarra yu' jī'ty. ⁴⁴ Atsa' cluuscjē fyutsni qui'pnisa peswée yujva wēeshu pu'chji'ty.

Jesus uuní

(Mr. 15.33-41; Lc. 23.44-49; Jn. 19.28-30)

⁴⁵ Tyajū' ēepyāj walajūy chji'ndyrra cusutste las trestepcachcu chji'ndy naa quiwete jyuca. ⁴⁶ Atsa' las tres ājatspcachja', Jesusa' na'jīnac sus we'we:

—Eli, Eli, ¿lama sabactani?—tyā' na'jīni': Andy Dyusngu sa' ¿mjīi pa'ganga andya's tjengmée nvijt? jīni'.


⁴⁷ Atsa' cytee ūssa' tyā'jīni's wēse'jrra', na'wēty we'we:

—Dyus yuwe pta'shsa Eliasa's pa'yatsa' jī'ty.

⁴⁸ Naapcachja' teeche'sa' wuwuuna u'jrra esponja's vino puste acjrra fyttū vitste qui'prra yuwete utyac chanzhacajn. ⁴⁹ Nava vite yu' na'jī'ty:

—Cuch yuunu. Aan Elias pa'jana nwe'weya' jī'ty.

⁵⁰ Tyajū' Jesusa' qui' seena' sus we'werra' uuc. ⁵¹ Naapcachja' dyuus yatte tyundenisa liensu pesatj a'cynisa' puupyājcjē sutec cute ēeju



(San Mateo 27.48)

pějycu, atsa' Pilato' yuwe caacj tee ducj jīna. ⁵⁹Tyājū' Josea' Jesus cacue's spajcyrra liensu finusatec yap. ⁶⁰Sa' cuet peñate u'se cafil'jrra ji'pju'c peecy cacue's pendaawal'j tycaa cji'c'jrra', u'cani cagyte yu' cuet walasaju apjrrac u'lj. ⁶¹Cytee tyā'wē yūutste', pendańi cagy dyi'puj utyaty tjengna u'pu' Maria Magdalena vite Mariava.

Jesusa's pendańi cagyte tjengsa

⁶²Jycaasena fi'nzeyā' jyuca pjeu'ljna jyā'lnijū cuscuscjē' sacerdote npiitstjē'ljwe'sh vite' fariseo tyāawe'sha' Pilato tashte u'l'jrra na'wēty we'we:

quiwete quīj. Naapcachja' ejndva chjāchja u'tje', peña yujva upety, ⁵²atsa' uusaawe'sh pendańi cagyva pjaatete', Dyusna jypa'garra uusaawe'sha' qui' ityi yuuty. ⁵³Atsa' Jesus uurrava qui' ityi yuunijū' tyāawe'sha' pendańi cagy casejrra Jerusalente u'cate', maanzcuēesava uytyi.

⁵⁴Tyājū' cytee Jesusna jypa'yacy tjengna ūssawe'sh vite' soldau cpiitan tyāawe'sha' wala ūcjtji ejnd u'ljna vite' quījva seena' yūuni's uyrra. Sa' na'wēty we'we:

—Isa, naa pitstjē'ja' Dyus Nchi'c yuj yu'ga ji'ty.

⁵⁵Cyteea' cuj u'ytyi ūsu' jyu'ju tjengna, tyāawe'sha' Jesusna selpiina u'ljusaty yu' Galileajūy yuusa. ⁵⁶Tyāawe'sh cshavyte' Maria Magdalena, vite Maria Jacobo Jose njī'j, vite' Zebedeo nyu tyāawe'shtyi yu'.

Jesusa's pendańi

(Mr. 15.42-47; Lc. 23.50-56; Jn. 19.38-42)

⁵⁷Cusna quījatste', teech pitstjē'lj wala ji'pjsa Jose yaasesa Arimatea chjambuwe'shcu pa'lj. Tyāava Jesus yacj u'ljusac yu'. ⁵⁸Tyāa pitstjē'ja' Pilato tashte u'l'jrra', Jesus cacue's

63—¿Wēse'ngá!, ne'jue'sh? Tyāa īshijjtjē'ja' nee ītyi u'ljorra', uurrava tecj ente' qui' ītyi yu'nja jīni'stja'w yajcy. 64Tyāa pa'ga mcaaj pendańi cafyte wala ew apjcajn tecj entepcach. Tyā'wē yūumeete!, tyāa yacj u'ljusawe'sha' cus pa'lrra cacue's pesweetyna, sa' e'suyā'ja' na'ljīna we'wetyna nasaty: Uurrava qui' ītyi yuuga jityna. Atsa' tyā'wē yūurra īshiini' nyaffi īshiinite tjaacuesa yuuna jīte!, 65Pilato' na'wēc we'we:

—Soldauwe'sh cytee ūsta' tyāaty pe'lrra me'ljwe, sa' pendańi cafyte wala ew mapjwe. I'cue'shtyi ma'wē wejy ew tjengte!, tyā'wē myūuwe.

66Tyā'jīte!, u'lrra pendańi cafyte wala ew apjrra tyāa apjni cajcuete sello qui'ptyi, sa' jypa'yacy tjengna ūswa'jsa soldauwe'sh tyajty.

Jesus qui' ītyi yuuni

(Mr. 16.1-8; Lc. 24.1-12; Jn. 20.1-10)

28 1Jycaase en scjēwniijū cuscuscjē mjīiwal'j en āanite wala cusfitey Maria Magdalena vite Maria yacj tyāawe'sha' u'ljty pendańi cafyte tjengya'. 2Naapcachja' ejnd seena' chjāchja u'cj, tyā'wē Dyus angel cieluju quījrra pendańi cafyte apjni cueta's quiispa'ga. Sa' tyāa yu' tyāa cuet cajcuete cachrra 3cpi'sh cueneni na'wēc cjcjyina u'p yu', atsa' tyajy atjni ropa' seena' zhichcue chijme yu'ty. 4Atsa' soldauwe'sha' tyā'wēsa's uyrra', ūucjnite jyuca yayarra uuní na'wēty wete. 5Atsa' tyāa u'ywe'shtyi' Dyus angela' na'wēc we'we:

—Ūucjnuwe, andya' jīitj, Jesusna cluuste fyutsty tyā'sna i'cue'sha' tjengya' yujj'cue. 6Nava ayte' meeyā'ja'. Uunijū qui' ītyi yuurra u'cj ma'wēga pta'sh tyā' cytey yuuc. Mcaane'ta cjcj tycaa myujwe tjengya'. 7Sa' wala dund me'ljwe, tyāa yacj u'ljusawe'shtyi na'wē pta'shya': Uurrava qui' ītyi yuurra Galilea quiwen u'juetsa' i'cue'sh yatste. Cytee puuty uyuune'cue jīna pta'shine'cue. Tyā'wē pta'shwa'tj jī'pju i'cue'shtyi jīc Dyus angela'.

8Tyajū' u'ywe'sha' wala dund wuwuuna u'ljty Jesus yacj u'ljusawe'shtyi pta'shya' ūucjnava ūuste wēt wēt yajcy. 9Naapcachja' Jesusa' tyāawe'sh u'ljuetste dyi'tje vyaarra wechana cūjc. Atsa' tyāawe'sha' Jesus tashte peejyūcuerra tyajy chindaty psha'ndrra wechaty. 10Atsa' Jesusa' na'ljīc:

—Ūucjmée me'ljwe, sa' andy yacjtjē'ljwe'shtyi pta'shine'cue Galilea quiwen u'lrra cytee andya's puuty uyuune'cue jīnac pta'shcaaj.

Jesus ītyi yuuni's soldauwe'sh pta'shni

11U'ywe'sh tyā'wē u'ljuetspcachja', pendańiite tjengna ūssa soldauwe'sh maafí yu' u'ljty Jerusalente sacerdotewe'shtyi pta'shya' quīj yūuni'sva jyuca. 12Tyajū' sacerdotewe'sha' judiu ntjē'jsawe'sh tashte u'lrra puuty we'wety. Tyā'wē yūurra soldauwe'shtyi' wala vyu ducjtyi. 13Sa' na'wēty we'wecaaj: Cuspyāj cue'sh deenite Jesus yacj u'ljusawe'sh pa'lrra uuní cacue's pesweeta jīne'cue i'cue'sha'. 14Atsa' tyā'wē yuj dejne'ta sūjrra

ne'jue'sha' i'cue'shtyi ewmeete nviit wējeváana, nava cue'sh u'jrra tyāa yacj puuty we'we'nja'w i'cue'sh ju'ngu tyā'wē yūucajmén.

¹⁵Tyā'wē cwe'we'tje!, soldauwe'sha' vyu's jypa'garra cytey yuuty. Atsa' tyāasaty judiuwe'sha' āchpcach tyā'wērráa pta'shi'!

Jesusa' tyāa yacj u'jusawe'shtyi neewe'werra nviitni
(Mr. 16.14-18; Lc. 24.36-49; Jn. 20.19-23)

¹⁶Tyā'wē yūuyā'tje!, Jesus yacj u'jusa oncesawe'sha' Galilean u'jty, tjā'j vitste mteene! Jesus pta'sh cytee. ¹⁷Sa' Jesusa's uyrra', peejyücuerra wechaty, nava viteíi yu' tyāmée váana sūjna cujty yaaqui!. ¹⁸Tyājü' Jesusa' tyāawe'sh tashte utyaarra na'wēc we'we:

—Cielute vite! naa quiweteva andynarrarráac neewe'weni yuu jycaajwa'ja's. ¹⁹Tyāasatj i'cue'shtyi jycaaja!: Me'jwe Dyus yuwe's pta'shya' maa quiweteva nasa jyucaysaty. Tyā'wē yūurra' yu'te bautisaïne'cue, Dyus vite! Dyus Nchi'c vite! Dyus Espiritu tyāawe'shtyi neewe'werra. ²⁰Sa' Dyusa's nwēese'jwa'ja's caapiya'jane'cue quijteva jyuca, andy ma'wēta i'cue'shtyi jycaaj tyā'wēy. Mjiyuwe, āchjüyā'ja' een isa bagachteva i'cue'sh yacj nes yuuya'vatj naa quiwe ptsuupcach jic.



(San Mateo 28.20)